

Tekst van het erfpachtregister

(f22)

Jaerpachten binnen Gemert

Inden iersten Jan van Geldrop, daer nae Lenart Valcks, daernae die weduwe Lenaert Valcks, daernae die kynder, nu hevet Jan Lenaert Valcks soen vercoft eenen geheyten Dierck Michiels; Dierck Michiels hevet daer op getimmert een nieu huys; nu syn kynder, nu Jan Anssems gilt tsjaers xvi vat rogge.

Gelegen aenden kerck tegen den Vroyendyck over twe loopen lantsaets, non inveni litteras nisi registrum, maer Jan Valcks heeft mij synen brief gleent daer hyt mede vanden voirsz oerden gecoeft heeft, die luijt aldus:

Wij Jan Voedarts, Jan van Steyn, Jan Knoop, Jan die Smet, Jan Aellaerts, Ansem Boenenberchs ende Willem Kersmeeker, scepenen in Gemert doen condt eenen yegelycken dat voer ons coemen is heer Aert van der Dussen commandeur tot Gemert ende heeft bij raede sijns overste der eerweerdigen heer Jans van den Velde lantcommandeur in den Balyen van der Biessen ende heer tot Gemert vuytgegeven ende erffelijck verpacht Jannen van Geldrop Goyartss twe loepensaets lants gelegen binnen der heerlijkheyd van Gemert neven erffenis 't huys van Gemert aen een sijde ende een steghe gaende tot Diercks huijse van Gemert was, dander sijde streckende van erffenis Diercks van Gemert vs. was totte straeten toe. Alsoe van den vs. Jannen pechter erfelyck te gebruycken ende te betuighen (?) metten recht van eenen dach heymaets alle weken des woensdachs totter plaetsen ende velde geheyten dat auwe harde, daer die vrijheyden van Gemert gewoenlijcken sijn op te meyen, voir ende omme sestien loopen rogs erfpachts der maeten van Gemert alle jaer ewelijck ende erffelijck op onsen vrouwen lichtmisse dach te betaelen ende opten huijse van Gemert te leveren.

Ende heer Aert verpechter vs. heeft op die voirscreven twe loepensaet lants ende op ten dach van den recht heymaets vs. helmighe vertegen tot behoef Jans vs. pechter. Gelovende hem als principael schulder ende op allen des oerdens goede dat vuytgegeven, verpachten ende vertijden ewelijks vast ende stedich te houden sonder ewich wederleggen ende die twe loepensaet lants ende den heymaet vs. erffelijck te vrijen ende te weren alsunen erve schuldich is te weren boven die vs. seshien lopen rogs erfpachts van allen anderen oncoemere.

Ende Jan vs. pechter heeft wederom geloeft als principael schulder op hem ende op allen sijn goet hebbende ende vercrigende den voregenoemden heeren Aerden commandeur vs. tot behoef 't huijs van Gemert die vs. seshien loepen rogs erfpachts

alle jaer op te vs. op onser vrouwen lichtmissedach te betaelen ende op ten huijse van Gemert vs. te leveren gelijk voirscreven is vuijten gepachten erffenisse vs. ende voer die betaelinghe der seshien vaten lopen rogs erffpachts vs. die gepachte erffenisse altoes goet genoch ende waeldoegende te maeken met voerwaerde toe gedaen dat men den dag heymaets vs. hebben ende gebruijcken sal tot behoeff der gepachte erffenisse vs. als dat myst daer af coemen daer op te voeren ende sij sal die vs. gepachte erffenisse egheen recht van vrijheyte hebben gelijk vrijguede te Gemert gewoenlijck sijn te gebruijcken.

Alle argelist hier in vuijtgesloeten. Bezegelt metten gemeynen zegel ons scependomps van Gemert. Gegeven vijftwintich daghen in junio int jaer ons heeren doe men schreef duesent vierhondert seven en seventich.

Maes Raets, nu die weduwe Maes Raets, nu Jan Maes Raetssoen ghelt tsjaers vuijt haeren huijs daer hij in woent, i malder rogge

Ende is een loopen lants groet; opten brief steet boeven gescreven Dierck van Geldrop; Copie vuijten erffbrief:

(afschrift van AKDOG 606, regest 376, dd 25-6-1477)

Wy Jan Voederarts, Jan van Steyn, Jan Knoop, Joest die Smet, Jan Aellarts, Ansem Boenenberchs ende Willem Kersmeeker scepenen in Gemert doen cont enen iegelycken dat voor ons coemen is heer Aert van der Dussen commandeur tot Gemert ende heeft bij raede syns oversten des Eerwaerdigen heer Johans van den Velde lantcommandeur inder balyen van den Biessen ende heer tot Gemert vuytgegeven ende erfflyck verpacht Diercken van Geldrop Godartssoen een lopensaet lants gemeten voer vijftich roeden gelegen binnen der heerlickheyt van Gemert neven erffenis Jans van Geldrop aen een syde ende erffenis shuijsen van Gemert aen dander syde, streckende van erffenis Diercks van Gemert was tot heeren straet aldaer. Alsoe vanden voirsz Diercken pechter erffelyck te hebben te betaelen ende besuighen voor ende omme ses lopen rogs erfpachts der maeten van Gemert alle iaer ewelyck ende erffelyck op onser vrouwen lichtmis dach te betaelen ende opten huijse van Gemert te leveren, ende heer Aert verpechter vrsz heeft opt voorsz loopensaets lants helmelinghe vertegen tot behoef Diercks vrsz pechter, Geloevende hem als principael schulder op hem ende op allen der Oerdens gueden overgeven, vertijde verpachter vrsz ewelyck vast ende stedig te houden sonder enich wederseggen. Ende dat voirscreven loopensaet lants te weren als men erve schuldig is te weren boeven die vrsz ses lopen rogs erfpachts van allen ander oncommer. Ende Dierck vrsz pechter heeft wederom geloofd als principael schulder op hem ende allen goet hebbende ende vercrijgende den voirge. heer Aert commendeur tot behoef des huijs van Gemert die voirscreven ses lopen rogs erfpachts alle jaer opten vrsz onser vrouwen lichtmis dach te betaelen ende opten voirscreven huys te leveren gelyck

voerscreven is vuytten gepachten erffnisse ende van dien betalinge der ses lopen rogs erfpachs vrsz die gepachte erffnisse vrsz altyt goet genoch ende wael doegende te maeken. ende en sal die vrsz gepachte erffnisse off die bruijcker daer aff egheen recht van vrijheyte hebben, gelyck vrygueden tot Gemert gewoonlyck te gebruijcken. Alle argelist hier in vuytgesloeten, Bezegelt metten gemeynen zegel ons scependomps van Gemert. Gegeven vyf en twintich dagen in junio der maent, int jaer ons heeren doemen schreeff duijsent vierhondert seven en seventich.

Dierck Maessen Dierck Michiels, nu Aelken die weduwe Dierck Michielssoen, nu Thomas Diercks gilt tsjaers vuyt haeren huijse daer sij oft hij in woent iii mud roggem

Copie van den brief van iii mudden roggem

(f23verso)

Wy Joest de Smet, Peter Aerts, Jan van Hout, Aert Mickarts, Jacop van Hugenvoert, Geret Roeloffssoen, Jan Geritssen, scepen in Gemert tuegen in desen openen brieve dat voir ons coemen is Dierck soen wylen Dierck Michielssoen, ende heeft erffelyck opgedragen ende overgegeven onsen Eerwerdigen heer commandeur tot Gemert geheyten heer Jan Eynatten, hem opgedragen van des oerdens wegen drie mudden roggen erffelycken pachs der maeten van Gemert erffelyck te vergelden ende jaerlicks te betaelen altoes op onser vrouwen lichtmis dach alsmen kerssen bornt van ende vuijt den selven camp lants die welcke camp lants Dierck vrsz vercregen hadde ter erffelyckheyt voertyts vanden commendeur van Gemert voerscreven welcken camp lants vrsz metten huijsse ende schuer daer op staende is daer men desen erfpacht vrsz vuijt geldende is jaerlycx is gelegen in Gemert ontrent der kercken aldaer beneven den kerckhoff van Gemert metten eenre syden, metter andere syden beneven erffenisse Diercks van Geldrop, metter eenre eijnde op der hoeve erve plach Dierck van Gemert, metter anderen eynde op die gemeyne straet, eest als sy seeden. Voert soe heeft die selve Dierck vrsz helmeling vertegen op dese drie erff mudden voirsz ende op allen rechten hem daer in toebehoerende tot behoeff des eerwerdigen Johans commendeur van des oerdens vrsz. Modo geloevende die vrsz Dierck als principael schuldener dat opdragen, dat overgeven, ende dat vertyen ewelyck vast ende stedich te hauwen sonder enich wederseggen, ende dat onderpant altyt goet genoch ende wael doegende te maeken als voer den erffpacht vrsz op hem ende op allen syn goet. Nu ter tyt hebbende off naemaels vercrygende. Ende al sonder argelist. Besegelt metten gemeynen zegel ons scependomps van Gemert. Inden jaer ons heeren vyffthien hondert ende een, den twee ende twintichsten dach octobris.

Melis Jan Karissoen ghilt vuijt twee loepen landts verpacht, item noch van eenre zyllen landts affter sijn huijs, ende vuijt die Streepen beemden Ghemunde neven erffenisse der heeren, geheyten der heeren beemden, ende die alsoo te vreden datten heere van synre syde egheen schaede ghescheyde. Nu Jan van Haendel die jonge gilt vii vat roggen

Opten brieff steet Jan Portman, die aldus luyt: (kopie van AKDOG 665, regest 162, dd 3-3-1410, ook transcriptie origineel is beschikbaar)

(f24)

Wy Corstiaen vanden Mortel Dierck vanden Bleeke Ansem Goessenssoen Gerit Fijen soen Wynric Geritssoen Henrick Queden ende Johan Karrel scepenen in Gemert tueghen in desen oepenen bieve dat voir ons is coemen Heer Dierck van Betgenhuijsen Commenduer tot Gemert in diere tijt heeft vuytgegeven ende erffelyck verpacht met rade sijns overste heer Reynaert van Huesen lantcommendeur der Balyen vanden Biessen ende met rade der broederen des huus van Gemert, enen goeden sekeren man Johan diemen heijt Portman wilen eer Dierck Pluchars soens soen was, een zille erfs vijf roeden meer, ende was toe behoerende den goede van Haenele. Eyn horst die geleghen is aen gheen Schoendonck metten eenre sijde ende met beyden eynden aen des oerdens erve ende oec rueret wat metten eenen eynde aen Heynen Quedens erve, dander sijde lancx neven Johan Hannen soens kynder erve, ende Johan heeft met desen erve eenen wech totter ghemeynt toe te naesten velde ende ter minster schaede die vrsz erve daer over te bruijcken, voert soe heeft die selve eene placke beemps ynt Gemunde alsoe ver als Johan vrsz gepaelt is dat Joncfrouwe Sophie van Gemert aen hadde doen graeven aenden Campen, die haer den lantcommendeur Heer Reynart van Huesen verleent hadde haeren leefdach, welck erve dat gelegen is metter eenre syden ende metter eenen eynde neven der heeren gemeynt, dander syde neven des oerdens erve, dander eynde aen die Polbeempde gelyck als dese vrsz erfenisse gelegen is binnen hueren paelsteden, dar vuyjt heeft desen Johan geloeft voer hem ende syn naecoemelingen den voergenoemden commendeur seven vaten erffroggs tsjaers ende te leveren en te betaalen jaerlycx altoes opten heeren huijs van Gemert opten sulre op onser lieven vrouwen dach purificatio te leveren metten geboeden maete van Gemert vuyjt desen voerghenuemden erve, Ende Johan heeft voert geloeft dese voirscreven erfenisse ynt gemunde synen beempt alsoe te bevreden dat des ordens erve die bempt die daer beneven gelegen is wael bevredt sal wesen van synre syden, ende dat des oerdens beemde aen Jans erve vreden sal te beyden eynde, ende al sonder argelist. In oirconde der waerheyt soe hebben wy scepenen voirschr onsen zegel ons gemeyns scependomps van Gemert aen desen brief gehangen ende gegeven inden jaere ons heeren duijsent vierhondert ende thiene, drie dagen in martio.

(f24verso)

Aert Geben, daernae Johannes van der Moelen, daernae syn kynderen, daernae Peter van der Rennen, nu ter tyt Dierck Peters Verrennen swaeger, ende dat huijs van Gemert hevet ierst vuytgegeven Jannen van der Moelen rentmeester voor twe mud roggen erffpachs, ende ick meynde dat heer Jan van Eynatten vuyt heeft gegeven doen hij die Strepen in die Haege vuytgaeff, ende dit voergenuemde erffnisse van den twe mudden voersz is gelegen affter in die Haghe ende is ooc eenen streep ende gelegen die een syde neven Wouter Joerdens erve, dander syde neven Ruellen Wouters erve, het een eynde op myns heeren beslooten bempt, het ander eynde op die gemeyn straet.

Dierck Verennen gilt tsjaers ii mud roggen als voirscreven is, wy en connen egheen brieven daer aff gevonden nisi registrum, mer sy hebben mij geloeft sy sullen mij haeren brief verleenen. Item Dierck Verennen heeft my synen erff brief geleent vanden twe mudden roggen voerscreven, ende dien brief steet alsoe after int boeck opten brief steet buijten gescreven Jan van der Moelen, folio 77 verso.

Lemmen van den Eynd, daernae Faes Mauwers syn swaeger, daernae Faes Mauwers kynderen, daernae Ariaen Corstgens, nu die weduwe, nu haer dochter ghilt vuyt haeren goeden daer sy in woent in die Deelstraet gelegen vi vat roggen

Opten brief steet boeven gecreven Melis Maessoen van der Hostadt, ende luyt aldus (afschrift van AKDOG 602D, regest 158, dd 14-3-1409)

(in de kantlijn: den brief gelt twe malder ende wort het ander gehouden by Joest Vervoirt ende Jenneken Faessen, vide infra folio)

Wy Corstiaen van de Mortel, Dierck vanden Bleeck, Ansem Goessenssoen, Geret Fyensoen, Wynric Geretssn, Henrick Queden ende Johan Karrel scepenen in Gemert tuijgen in desen openen brieve dat voer ons is coemen Melis Maessoen was vander Hostadt in synen heelen bedde, ende heeft overgegeven heeren Dierck van Betgenhuijsen commandeur van Gemert in dier tyt een erff mud roggen tot behoef des huijs van Gemert toebehoerende den Duijtschen Oerden dat is te weten een erff malder roggen in Aerts erve van Haenele, dat gelegen is in geen Deelee tusschen Willem Spruits erve ende Jacob Lutensoens kynderen erve, metten eenen eynde aen des heeren straet, ende dat ander malder in Haywijghen Smollersdochter was haer erve ende hoeren kynderen,

(f25)

die sij natuerlycke hadde bij Peteren, diemen heet die Horter, dat ooc gelegen is in geen Deele metter eenre seyden neven des heeren straete, dander syde neven Johan Zaelden swaegers kynder erve , deen eynde aen Maes Scrijvers hoeff, dander eynde aen Mechtelden Wouters kynder erve gelycke als dese voerscreven onderpanden gelegen syn binnen haeren paelsteden, ende die erff brieve onderpande begrypen ende inhouden by beijde malderen aen Aert vrsz, Hadewyghen ende hoeren kynderen voersz daer Melis voersz dien erfrog mede manende was op synen pachtdach, die selve brieve heeft Melis vrsz den commandeure voergenuempt over gegeven ende mechtich gemaect in urber des huijs voersz, die twe malder erfroggen mede te maenen ende te vorderen opten pacht daeghen nae inhouden der voerscreven brieve. Ende Melis vrsz heeft helmelinghe vertegen met hande ende met monde op die voersz twe malder erff roggen ende op die onderpande ende op die voersz brieve die daer op gemaect syn tot behoef des huijs van Gemert. Ende Melis heeft voert geloeft des voergenuemden commandeur tot behoef des huijs van Gemert die twe malder roggen te weeren in die voerscreven onderpanden ende die onderpanden daer goet ende wael doegende te maeken op hem ende op allen syn goet. Alle argelist ende nieuwe vonden altoes vuytgescheyden. In oerconde der waarheyt soe hebben wy scepen voerscreven onsen segel ons gemeyns scependomps van Gemert aen desen brief gehangen, ende gegeven inden iaer ons heeren duijsent vier hondert ende negen, vierthien dagen in martio.

Goessen Gheven, nu Beelken Engelkens , nu Ansem Lucas haer soen, bewoent dat huijs ende erffnisse nu, ghilt die selve vuyt eenen bempt aen die Speedonck gelegen ii mud roggen

Opten brief steet Goert van Gemert ende luyt aldus. (afschrift van AKDOG 789, regist 205 dd 25-1-1425)

Wy Korstiaen van den Mortel, Ansem Goesswynss, Ansem van der Heelderdonck, Wynric Geretssoen, Maes Maessoen van Haselbosch, Willem Wyntgenssoen ende Dierck die Smet scepen in Gemert doen condt eenen iegelyck dat voer ons is gestaen die Eerbaere

(f25verso)

gheestelycke goede ons lieve ghemynde heer, heer IJwan van Cortenbach lantcommandeur der balyen van der Byessen Duijts Oerdens, heere des dorps van Gemert ende heeft verleent, vuytgegeven ende erffelycken verpacht vanden oerden weeghen Godert van Gemert wittige soen Dircx van Gemert wylen die helft van eenen bempt geheyten die half Speedonck met allen synen graven al omme plegen te vreden, geleghen inde heerlyckheyte van Gemert metter eenre syden neven erffnisse heeren Darcken Nouwenhuijs toebehoerende, ende dander syde neven erffnisse Ansem Goeswyns ende Dircx Cox dat den heeren te weesen plach metten eenen eynde aen erffnisse Melis van der Hostadt geheyten Drogmans campe ende dander eynde aen die gemeynthe van Gemert als sy seyde, dat te weten omme twee mudden rogs jaerlicxs ende erffelycxs pachts der maeten van Gemert cusbers choerens allen iaeren op onser vrouwen lichtmisdach des vrsz verpechtere van den voirsz pechter te gelden erffelycken ende te betaelen ende opten huijse opten choeren sulre te custen ende te leveren inden dorpe van Gemert. Voert soo heeft geloeft onsen heere die verpechter voersz den voerscreven pechter die helft van desen bempt vrsz over twee mudden rogs erfpachs van allen anderen oncommer daer in wesende te vrijen erffelycken ende te weren. Ende Goedert pechter voersz heeft weder gelooft als principaele den voersz verpechter dese twe mudden rogs erfpachts vrsz allen jaeren op die schoutdaghen daer af te gelden ende te betaelen ende als principael schulder opten sulre vrsz opten huysse tot Gemert vrsz te leveren. Bezegelt metten gemeynen zegel ons schependomps van Gemert. Int jaer ons heeren duysent vierhondert twentich ende vyve op sinte Pauwels dach conversio.

Jaer pachten, Noyen kynderen van den Goir gelden die selve tsjaers vuyt hueren erve iiiij mud ende iiiij vat roggen, welcken sullen betaelen die vijf kynderen Noyen van den Goir voersz te weten, Inden iersten Henrick Slaets, nu die erffgenaemen Henrick Slaets, die erfgenaemen Teuwen Denis, Goessen Clerx, nu Peter Goessens, Lyn Noyen, ende Peterken Noijen, nu die erfgenaemen.

(f26)

Henrick Slaets, nu die erfgenaemen Henrick Slaets gelden van den pacht vrsz van Noyen kynderen van den Goir tsjaers xv vat roggen

Item noch die selve erfgenaemen Henric Slaets gelden stjaers ii vaet roggen, int gemeyn tsamen alle iaer xvii vat roggen

Mattheus Denis, nu die erfgenaemen gelden tsjaers van Noyen kijnderen van de Goir iii mud rogge

Goessen Clercx, nu Peter Goessens gilt tsjaers van Noyen kijnderen van de Goir ii vat rogge

Lyn Noyen, nu die erfgenaemen Lyn Noyen gelden tsjaers van Noyen kynderen van de Goir vii vat rogge

Peterken, nu syn erfgenaemen te weten Noij Noijen ende Geeff Noyen gelden tsjaers van Noyen kynderen vanden Goir ii vat rogge

Item heeft dat huijs van Gemert tsjaers geldende aen Noyen kynderen vanden Goir voirscreven als hier nae volgen sal, primo vijften halven Groeten Ecker gelegen neven Jan Fyen goet metter eenre syde ende vijften halven bempt gelegen neven die Buersen Bempt al geheel vi vat roggen

Opten brief steet Gerrit Fyensoen, item die selver vi vat rogge vuijt eenen ecker gelegen by Boekent op die Auwestraet neven Melis erve van der Hostadt uno latere, altero latere Valkarts hooff, dat een eynde aen Peter Claes erve, opten brief steet oock Gerit Fyensoen, ende is vier loepense groet ende negen roeden ende een vierdeel roede, item syn die twe brieven van den twe malder roggen aen een gevesten.

(f26verso)

Copie van den twe brieven die aen een gevest syn. (afschrift van AKDOG 687, regest 204, dd 25-11-1424)

Wy Korstiaen vanden Mortel, Ansem Goessenssoen, Ansem van de Heelderdonck, Maes Maessoen van Haselbosch, Wynric Geretssoen, Willem Wyntgenssn ende Dierck die Smet, scepen in Gemert doen condt eenen iegelycke dat voer ons coemen is ende gestaen die eerbaere geestelycke ende onsen lieven ghemeynden heer, heer Ywan van Cortenbach lantcommendeur der Ballyen vanden Byessen, Duijts Oerdens, heer des dorps van Gemert ende heeft verleent vuytgegeven ende erffelycke verpacht Geret Fyensoen die helft vanden Groeten Ecker, die gelegen is in die heerlyckheyte van Gemert, metter eenre syde neven erffnisse Jan Voedaerts ende Henric van der Hallen ende Margarieten syne suster ende metter ander syde neven erffnisse Jan Fyen soene, als hy sede, ende voert die helft van eenen bempt die al heele gelegen is neven den Buersen Bempt, ende neven Jans erve vander Zantvoert, alsoo verre alst den heere daer thoebehoerende was binnen syne paelsteden, dat te weten omme sesse lopen rogs erffpachts der maeten van Gemert allen iaers op onsen vrouwen lichtmis dach den voersz verpechter van den voersz pechter te gelden ende te betaelen, ende allen jaeren opten choere sulre opten huijse tot Gemert te custen ende te leveren, Ende heer Ywaen verpechter voersz heeft geloeft vrsz Geret pechter dese voerscreven erffnisse die hy hem verpacht heeft als voersz is, over dese voersz sesse loepen rogs erffpachs van allen anderen oncommer te vryen erffelycke ende te weren, ende Geret pechter voersz heeft weder geloeft den vrsz verpechter totten Oerden behoeff dese vrsz sesse loepen rogs erffpachs opten voerscreven schoutdach vuyt voerscreven erffnisse alle iaeren te gelden ende te betaelen in alden maete voerscreven. Besegelt metten gemeynen segel ons scependomps van Gemert. Int jaer ons heeren duijsent vierhondert twintich ende vier, op Sinte Katharinen dach.

Copie van den doerstekenen brief ooc van sesse loepen rogs erfpachts (afschrift van AKDOG 696, regest 168, dd 25-1-1413)

Wy Korstiaen vanden Mortel, Dierck vanden Bleecke, Ansem Goessenssoen, Wynric Geretssoen, Geret Fyensoen, Henric Queden ende Johan Karrel scepen in Gemert tugen in desen openen brieve, dat voer ons is

(f27)

coemen heer Dierck van Betgenhuijsen Commenduer tot Gemert in dier tyt, ende heet vuytgegeven ende erffelyck verpacht met raede syns overste der eerweerdigen heeren Ywan van Cortenbach lantcommendeur der balyen vander Biessen ende met raede der broederen des huijs van Gemert. Eenen goeden sekeren man Gerit Fyen soen eenen ackerlants die gelegen is by Boekent op die Auwestraet metter eenre syden beneven Melis erve was van der Hostadt, dander syden beneven Valkarts hooff was ende Claes Snyders erve was ende Aerts erve was van den Hoereic deen eynde aen Peter Claes soens erve ende Claes Snyders campe was, ende vuyjt desen voersz erve met allen synen toebehoerten heet Geret geloeft den voergenoemden commandeur in orber ende tot behoeff des huijs van Gemert toebehoerende des Duytschen Oerden een malder erffrogs iaerlycks te betaelen altoes op onser vrouwen lichtmisse dach purificatio, ende te leveren mette geboeden maete van Gemert voersz. Alle argelist vuytgescheyden. In oerconde der waerheyt soo hebben wy scepen voersz onsen segel des scependomps van Gemert aen desen brief gehangen ende gegeven inden jaere ons heeren duijsent vierhondert ende derthien, op sinte Pauels dach.

Item vuyjten Nederen Ecker gelegen neven die Dribbeheysche wech op Scencxstraet metter eender syden den Heghgrave, die kynder Gevarts van Strybosch ii mud roggen.

Ende den ecker helt in groeten ontrent thien loepensaet lants in al, ende opten brief steet Jacop Gevarts van Strijbosch, ende bruyck Ansem Peters, nu syn kynderen den halven ecker, ende Willem Jegers kynder die ander helft, ende vuyjt die Scherpeneckers gelegen met beyde syden aen die straet metten eynde, nu Ansem Peters erve, nu syn kynder, vuyjtte helft ter kercken waert ende vuyjt meer erven daer tegenover nae den Mortel, ii mud roggen.

Helt den ecker inder toelinge thien loepensaets oft daer ontrent styff, opten brief steet Jacop Gevarts van Strybosch.

Copie van den Nederen Ecker van ii mud roggen tsjaers.

(afschrift van AKDOG 689, regest 191, dd 8-6-1421)

Wy Dierck Loyen neve, Ansem Goessenssn, Johan Gevartssoen, Melis van der Hostadt, Maes Maessoen

(f27verso)

van Haselbosche, Wynric Geretssoen vander Vondervoert, ende Ansem vander Heelderdonck scepen in Gemert, doen condit eenen iegelycken dat voer ons is gestaen, den eerbaer geestelycken in goede ons lieve ende gemynde heer, heer Ywaen van Cortenbach lantcommendeur der balyen vanden Bijessen, Duyts Ordens, heer des dorps van Gemert ende heeft verleent, vuytgegeven ende erfelyck verpacht Jacop Gevartssoen van Strybosch een stuck lants geheijten den Nederen Ecker, die gelegen is in die palen van Gemert neven erffenis metten eenre syden den Dribbeleyschen wech ende metten anderen syde neven den Heggrave, ende voert aen neven erffnissen Gorts van Gemert, ende der kynderen Gevarts van Strybosche als sy sede. met allen synen toebehoerten dats te weten omme twe mudden rogs jaerlycx ende erfelycx pachts der maeten van Gemert. Alle jaer op onser vrouwen lichtmisdach den voersz verpechter vanden vrsz pechter te gelden erfelyck ende te betaelen ende opten huijse tot Gemert opten choeren sulre aldaer te cussen ende te leveren. Voert soe gelooft die verpechter vrsz den voersz pechter dese voerscreven erffnisse met desen vrsz twe mudden rogs erffpachts ende van alle anderen oncommer daer in wesende te vrijen erfelycken ende te weren. Ende Jacop die pechter voersz heeft weder gelooft als principael schulder den voerscreven verpechter dese vrsz twe mudden rogs vuyt voerscreven erffnisse met allen hoeren toebehoerten ge;yc voerscreven is te gelden erfelycke ende te betaelen. Bezegelt metten gemeynen zegel ons scependomps van Gemert. Inden jaer ons heeren duijssent vierhondert twentich ende een, opten achten dach in junio.

Item noch van xvi vaet roggen in eenen ecker gecoemen synde vande goede te Scherpenberch, ende is gelegen tusschen twe straeten te weten Scencxstraet aen die een syde ende die Aldestraet der ander syde coemen die erfgenaemen daer alsoe tsjaers te gelden xvi vat roggen

Item daer die helft van vyf mudden haveren opten brief steet Peter Claessoen, Item noch coemen die selve te gelden van iii mud rogge.

Vuijt eenen ecker op die Aldestraet gelegen, gecoemen synde vanden goede te Gruenendael viii vat rogge

Opten brief steet Jan Ghevarts van Strybosch Thoenis Lucas, Jan Jacops, Meeus die cremer etc ut infra patebit folio 29

(f28)

Peter Claessoen van twe mud roggen ende vyf mud haeveren van eenen eckerlants geleghen by Boecout ende is coemen vuyjten hoeven van Scherpenberch

Copie vanden principael brieff (afschrift van AKDOG 682, regist 156, dd 3-3-1409)

Wy Korstiaen vanden Mortel, Dirck vanden Bleeke, Ansem Goesswynssn, Wijnric Geretssoen, Henrick Queden, Johan Karrel scepen in Gemert tuegen in desen openen brieve dat voer ons is coemen heer Jan Clot commendeur tot Gemert en dier tyt ende heeft vuyjtgegeven ende erffelyck verpacht met raede syns oversten heer Reynarts van Huesen lantcommendeur der balyen vanden Biessen ende met raede der broederen des huijs van Gemert eenen goeden sekeren man Peter Claessn van Gemert eenen ecker lants die coemen is vander hoeve ten Scherpenberch thoe behoerende was den huysen van Gemert, welck ecker lants die gelegen is bij Boekent op die Auwestraet met beyde syden lancx neven der heeren straete, die te beyde syden van desen vrsz ecker gelegen sijn, metten eenen eynde aen Peters hoff vrsz dander eijnde vanden voirsz acker is geleghen neven eenen acker lants ghehoert totter hoeven ten Gruenendael, gelyck als dit vrsz gelegen binnen synen paelsteden, ende met allen synen thoebehoerten, daer vuyjt heeft Peter voirsz geloeft voer hem ende vuyjt synen erven oft naecoemelinge den huijse van Gemert thoebehoerende den Duytschen Oerden erffelyck te gelden twe mudden roggen ende twe loepen roggen ende vyf mud haeveren tjaers met die geboeden maete van Gemert ende te leveren alle jaer erffelycke ende ommermeer ende wael te betaelen op onsen vrouwen dach purificatio dat is te lichtmisse bijnen der heeren woenhuys te Gemert opten sulre. Ende Peter heeft geleoft alle onraet te voldoen dat die vrsz ackerlants thoebehoerende is, weert van ynde te houden of van gebuerlycke rechten, ende omme te meer sekerheyt wille, ende den huysen van Gemert syns erffpachs te sekere te wesen, soo heeft Peter voirsz den huysen te onderpande geset erffelycke drie loepen saet lants die gelegen syn op die vrsz Oudestraete metter eenre syden lancx neven den wech, dander syde beneven Johan Claussoens erve ende den heeren erve Melis Maessoens erve, Diercx erve vanden Bleeke, Agnees Henricx erve, deen eynde beneven der heeren erve vrsz gelyc synen paelsteden. Dit geloeft Peter vrsz den huysen van Gemert te weren ende allen oncommer af te doen vuyjtgescheyden des heeren chyns vanden

(f28verso)

gronde, ende daer toe goet ende wael doegende te maeken op hem ende op syn goet als voer drie erffmalder roggen der maeten van Gemert, Alle argelist altoes vuytgescheyden, in oerconde der waerheyt soe hebben wy scepen vrsz onsen zegel ons scependomps van Gemert aen desen brieff gehangen ende gegeven inden iaer ons heeren duijsent vierhondert ende negen, drie dagen in martio.

Vanwegen Noyen kynderen vanden Goer gelden Jan ende Jacop die Jeger, nu syn kynderen te weten Jannen ende Jacops voerscreven i mud rogge

Item dat mud rogge van Jannen ende Jacops die Jeger voersz wordt bracht tsjaers van Melis Ansems op Strybosch, nu syn erfgenaemen als hier nae bescreven steet jaer xiiii aen metten iaer xxxviii toe al betaelt. Ende Melis voerscreven gilt dat mud roggen des Jegers kijnder vuytter Eeldonck gelegen in die Deelstraet. Mer die erfgenaemen voersz moetent mynen heer goet doen, non vidi aliquas litteras nisi registrum.

Ansem Celen, nu Marcelis Janssoen van den Eenswinckel gilt tsjaers van den selven goede te weten vuyt die Scherpeckers gelegen op die Cranenbraken metten eynde die Ruelstraet i malder rogge.

Die weduwe Ariaen Roevers, nu die kynderen Ariaen Roevers, nu Peter Roevers gelden vanden selven goede van Jan Guylyckers wegen ende Jacop Goessens wegen viii vaet roggen

Item gelden dese acht vaet roggen vrsz vuyt vier lopensaet lants aent Haegelcruys gelegen neven Ransecker.

Item noch xii elle lynen vlessens laekens

Ende heeft heymaet daer toe, maer niet voerder dan tot dien lande dat Peter Claes van den heere gepacht heeft, ende carta, opten brief steet Peter Claessoen

Copie van den principael brieff (afschrift van AKDOG 795, regest 137, dd 14-2-1409)

(f29)

Wy Korstiaen van den Mortel, Dierck van den Bleeke, Ansem Goessenssoen, Geret Fyensoen, Wijnric Geretssn, Henrick Queden ende Johan Karrel scepen in Gemert tuegen in desen openen brieven, dat voer ons is coemen heer Dierck van Betgenhuysen commendeur tot Gemert tot dier tyt, ende heeft vuytgegeven ende erffelyc verpacht met raede syns oversten heere Reynarts van Huesen lantcommendeur der balyen van den Biessen ende met raede der broederen des huys van Gemert. Eenen goeden sekeren man Peter Claessoen eenen ecker lants op de Auwe straet is geheyten heeren Wautghers Stucke, ende is gemeten voer vier loepensaet lants voer elck loepensaet vijftich roeden gemeten, dat lant is gelegen op die Auwe straet aen dat Haegelcruys metter eenre syde neven den wech, dander syde neven Ransecker Willems erve Henrick Maessoens soen, ende metter derder syde neven Katherinen erve Ghevarts was van Gruenendael, Ende Peter heeft eenen heymaet met desen vrsz stuck lants met eenre syessen te meyen, gelyc die ander laeten hy ende syn naecoemelingen opten Auder Harden dat den Oerden altoes toebehoerdt heeft, Haenrevelt, oft waert gelegen is binnen de palen van Gemert, Ende altoes ten goeden tyt, ende met diere heyden voirscreven en gheen landt te bedryven, dan Peter voorsz van den heere van Gemert heeft, soe waer dat gelegen is binnen de paelen van Gemert, Ende Peter voorsz heeft den vrsz commendeur geloeft tot behoef des huijs van Gemert, vuyt desen vrsz stuck landts erffelyck te gelden acht vaet roggen ende twelf ellen goets vlessens laekens tsjaers voer den heymaet, ende te betaelen opten heere huys van Gemert, den rogge opten sulre, metter geboeden maete van Gemert altoes op Onsen Lieven Vrouwen dach purificatio, ende dat laeken te betaelen opten heyligen pinxtdach. Alle argelist altoes vuytgescheyden. In oerconde der waarheyt soo hebben wy scepen vrsz onsen segel ons gemeyns scependomps van Gemert aen desen brieff gehangen, ende gegheven int jaer ons heeren duijsent vier hondert ende negen, verthien dage in februario.

Die erfgenaemen Ansem Wouters te weten Aert Wouters ende Daem Leijten, nu Claes Daemen ende Henrick Daemen syn broeder gelden tsjaers xi vat rogge.

(f29verso)

Vuijten halven groeten ecker op die Alde Straet gelegen den heelen ecker neven Peter Grieten soens, nu Ansem Peters erve, nu syn kynderen, off Noijen kynderen vanden Goer, Item Thonis Lucas, nu syn erffgenaemen te weten Jan Jacops van Asten heeft die ander helft ut habetur in loco suo sequenti folio 44verso.

Opten brief steet buijten gescreven Jan Gevartssoen van Strybosch.

Copie van den erffbrief (afschrift van AKDOG 663, regist 173, dd 13-7-1414)

Wy Dierck vanden Bleke, Ansem Goessenssn, Korstiaen vande Mortel, Aert Gheebensoenssn, Wynric Geretssoen, Henric Queden ende Johan Karrel scepen in Gemert tuegen in desen opene brieve, dat voer ons is coemen heer Dierck van Betgenhuijsen, commendeur tot Gemert tot dier tyt ende heeft vuijtgegeven ende erffelyc verpacht met raede syns overste den eerweerdigen heer IJwaen lantcommendeur der Ballyen vande Biessen van Cortenbach, ende heer des dorps van Gemert ende met raede der broederen des huijs van Gemert eenen sekeren man Johan Ghevartssoen was van Strybosch, eenen acker lants, die coemen is vande hoeve ten Gruenendael, die gelegen is tot Gemert tot eenre stede heijt op die Auwe straet voer aen beneven die straet alsoe omme beneven Henrick Snyders erve was, Heyne Aertssoens erve, Melis erve van den Hoernic, Willem Kaerlis erve, al tot des heeren straet toe, daer wederomme beneven Peter Claussoens erve, weder tot de Aude straet toe, gelyc als desen voersz acker landts gelegen is binne syne paelsteden, ende met alle syne toebehoeren, daer vuijt heeft Johan vrsz geloeft den voergenoemden commendeur voer hem selven ende voer syne naecoemelinge driedehalf mud rogs tot behoeff des huijs van Gemert erffelycke ende jaerlycx te betaelen altoes op Onser Vrouwen Lichtmisdach purificatio, ende te leveren metter geboeden maeten van Gemert opten heeren choeren sulre des huijs van Gemert, ende die voergenuemde commendeur heeft Johan geloeft dat vrsz erve te weren erffelycken van des huijs wegen van Gemert als voer desen voergenuemden erffpacht. Alle argelist altoes vuytgescheyden. In oirconde der waerheyt soe hebben wy scepen voerscreven onsen zegel ons gemeyns scepenstoels van Gemert aen desen brief gehangen ende gegeven inden jaer ons heeren duysent vierhondert ende verthien, op sinte Margrieten dach.

(f30)

Joest die Smet, daer nae Luytghen syn huysvrou, en nu die weduwe Aert Jacobs, nu Pauels Maessn gilt tsjaers vuijt eenen stucke landts van vier loepensaets ende een half loepensaet landts secundis registrum, heyt den Vloetecker vanden goede ter Watermoelen gelegen inde Moelenstraet vi vaet rogge. Opten brieff steet buijten gescreven Henrick Bloyman.

Copie van den brieff principael (afschrift van AKDOG 686, regest 174, dd 9-2-1415)

Wy Korstiaen vanden Mortel, Dirck vanden Bleeck, Ansem Goessenssoen, Wijnric Geretssoen, Geret Fyensoen, Henrick Queden ende Johan Karrel scepen in Gemert tuegen in desen opene brieve dat voer ons is coemen Henrick die Moler die men heyt Bloyman ende heeft ontfangen vanden eerbaeren eerweerdighen heer, heer Ywaen van Cortenbach lantcommendeur der balyen vande Biessen een overste des huijs van Gemert ende des dorps, eenen acker lants die Vloetecker, ende is coemen vander hoeven ter Watermoelen, ende is gelegen metter eenre syde beneven Spierincx erve van Gemert, ende Willem Wyntkenssoens, dander syde is gelegen beneven Diercx ende Johans erve van Strybosch, metter eenre eynde aen des heeren straet, ende uut desen voergenuemden erve heeft Henrick voersz geloeft den voirgenuemden lantcommendeur in urber ende tot behoeff des huijs van Gemert thoebehoerende den Duijtschen Oerden een malder roggen tsjaers erffelycke daer vuijt te gelden, ende jaerlycx te betaelen altoes op onsen vrouwen lichtmissedach, ende te leveren metter geboeden maete van Gemert binnen der heeren woeninge van Gemert opten choeren sulre vuyt desen voergescreven ecker. Ende die vrsz lantcommendeur heeft Henrick geloeft dien ecker te weren voer dat erffmalder rogge. In oirconde der waerheyt soe hebben wy scepen voersz onsen zegel ons gemeyns scependomps van Gemert aen desen brieff gehangen ende gegeven inden jaer ons heeren duijsent vierhondert ende vyfthien, negen dagen in februario.

Die kynder Dierck Smeets, daer nae heer Peter Tewens, nu Thoenis heer Peters natuerlycke soen gilt tsjaers vuyt Huijben ecker affter die Dribbeley gelegen xv vat rogge.

(f30verso)

Daer syn twe brieven aff, die doersteken syn, op elcken brieff steet buijten gescreven Jan die Smet.

Copie van den eenen brieff (afschrift van AKDOG 733, regest 138, dd 14-2-1409, transcriptie van het origineel is ook beschikbaar)

Wy Korstiaen vanden Mortel, Dierck van den Bleeck, Ansem Goessenssoen, Geret Fyensoen, Wynric Gerets, Henric Queden ende Johan Karrel scep en in Gemert tueghen in desen opene brieve dat voer ons is coemen heer Joest van Middelborch bewaere des huijs van Gemert tot dier tyt ende heeft vuytgegeven ende erfelyc verpacht met raede sijns oversten heren Reynarts van Husen lantcomendeur deser Balyen van den Biessen ende met raede der broederen van Gemert eenen goeden sekeren man Johan die Smet in syne heele bedde een stuck lants heyt Houben Ecker ende is gelegen aen der Dribbeleden metter eenre syde daer neven der heeren erve van Gemert dander syde neven des heeren straete ende dan voirts om neven Melis kijnder erve vanden Broeke ende neven der heeren erve. Item noch twe stucken lants die beide gelegen op die Boekouts Ecker metten enen eynde aen die Mortels straete dander eynde aen Aert Eyckmans kijnder erve. Ende Johan vrsz heeft heeren Joesten vrsz geloeft vijfthien vaet roggen tsjaers erffelycken tot behoef des huijs van Gemert ende die te betaelen jaerlycx altoes op onser liever vrouwen dach purificatio, opten vrsz huijse opten sulre ende te leveren metten geboeden maete van Gemert. Ende dese voersch vijfthien vaet erfrogge heeft Johan die Smet den huijse van Gemert veronderpandt met vijf vaet erfrogge in eenen malder erfroggen dat Johan die Smet geldende heeft in eenen onderpande in gheen Haeghe huijs ende hoff dat Heynen Lysensoens was tusschen Korstiaens erve vander Vorst ende Lijsbette Sweelden erve dat vrsz onderpandt heeft Jan die Smet vrsz den huise van Gemert geloeft op hem ende alle sijn goet te weren in dien onderpande goet en wael doegende te maeken ende alle oncommer aff te doen van dien vijf vaet erfrogge voerscreven. Alle argelist ende nyevonde altoes vuytgescheyden. In oerconde der waerheyt soe hebben wij scep en voerscreven onsen zegel ons gemeyns scepdomps van Gemert aen desen brief gehangen ende gegeven inden jaer ons heeren duysent vierhondert ende negen, veerthien daege in februario.

(f31)

Copie van den tweden brief

(Afschrift is niet opgenomen. Het gaat om dezelfde tekst als de eerste brief, op sommige plaatsen zijn er afwijkingen in de spelling)

Die kynderen vel die erffgenaemen Dierck Smets, nu Jan die Smet, woenende aen Boekent gilt tsjaers van wegen Melis Stoeven vuijt eenen eusel geheyten die Rulle vii vat roggen.

(f31verso)

Die Speeckdonck gilt tsjaers ii mud rogge

Die erffgenaemen Ansem ende Dierck Smets gelden tsjaers vuytter Speeckdonck xj vaet rogge, Opten brieff steet Dierck Smets ende Ansem Goesweijns

Die erffgenaemen Lenarts vanden Bleeck, nu Delis van Strijbosch ende die weduwe Andries Slaets gelden tsjaers vuytter Speeckdonck xj vat roggen.

Geret Lucas daer nae syn soen Thoenis, nu Lenart Goessens gilt tsjaers vuytter Speeckdonck iii vat rogge.

Copie vanden principael brieff vande twe mudden rogge vander Speeckdonck, gelden die luijden voerscreven.(afschrift van AKDOG 789, regest 206, dd 25-1-1425)

Wy Korstiaen vanden Mortel, Ansem vander Heelderdonck, Wynric Geretssoen, Maes Maessoen van Haeselbosche ende Willem Wyntkens scep en in gemert doen condt eenen iegelycken dat voer ons is gestaen den eerbaeren geestelycken in goede, onse lieve ghemynde heer, heer Ywaen van Cortenbach lantcommendeur der balyen vanden Bijessen Duijts Oerdens, heere des dorps van Gemert ende heeft vuytgegeven ende erffelycke verpacht vanden oerden wegen Ansem Goessenssoen ende Dierck die Smet onse mede scep en, die helft van eenen bempt geheyten die half Speeckdonck met alle synen graven alomme daer ment mede plege te vreden, gelegen inder heerlyckheyt van Gemert metten eenre syden neven Goederts erve van Gemert, dat den heere weesen plach, ende metter andere syde neven erffnisse Voedearts kynderen, metten eenen eynde aen die gemeynt ende dander eynde aen erffnis Diercks Taxs kynderen, als sy seyde, dats te weten omme twe mudden rogs iaerlycx ende erffelycx pachs der maeten van Gemert alle iaeren op Onser Vrouwen Lichtmisse dach den voersz verpechter vanden vrsz pechter te gelden ende te betaelen ende opten huuse van Gemert opten choeren sulre cusbers choerens te custen ende te leveren, voert soe heeft geloeft onsen heer verpechter voersz den voerscreven pechteren desen vrsz halven bempt mette graven alomme voerscreven over dese twe mudden rogs erffpachs van al anderen voercoemmer

(f32)

te vryen erffelycks ende te weren, Ende Ansem ende Dierck pechteren hebben wederom geloeft als principael schulderen voerscreven verpechter dese twe mudden rogs erfpachts vuyter halven vrsz bempt opten voerscreven schoudach daer aff erffelyck te gelden ende te betaelen als voerscreven is. Besegelt metten gemeynen zegel ons scependomps van Gemert. Int iaer ons heeren duysent vierhondert twentich ende vyve op sinte Pauels dach conversio.

Die erffgenaemen Lenarts vanden Bleeck ende die erfgen. Jans Vervoert gelden tsjaers ii mud roggen

Opten brief steet Willem Saelden vuyt erven den Sloetelbosch geheyten, daer die selve beyde op woenen, ende hebben daer op getimmert, ende Jan van Nouwenhuys huijs ende hostat reent daer ooc aen, is ooc vanden onderpanden inden brief begrepen. Item die overste laeren syn ooc een onderpandt daer af, ende daer mach men leem graven erffelyck voer der heeren laeten ende hoeven. Gelden die selve erfgenaemen voersz van een stuc lants aen die moelen thient vrij verleent per heeren Ywaen van Cortenbach anno duysent vierhondert ende dertich vj vat roggen erffelycx pachts ut habetur in antiquo registro pergauwio(?) tsamen iii mud roggen. Ende vande vj vaet vrsz syn ooc twe brieven doersteecken. Op die doersteken brieven steet Emont Wouterssoen boeven gescreven.

Die erfgenaemen Lenarts vanden Bleeck, nu Arnoldus Andree cum suis, nu syn kynderen gelden tsjaers vuytter Sloetelbosch xx vat roggen

Die kynderen ende erfgenaemen Jans Vervoert gelden tsjaers vuytten Sloetelbosch xx vat roggen

Copie vanden principael brief vanden twe mudden roggen. Opten brief steet boeven gescreven Willem Saelden vanden Sloetelbosch ende die laeten.

(afschrift van AKDOG 602E, regest 175 dd 1-8-1416)

Wy Dierck vanden Bleecke, Ansem Goessenssoen, Berniere Willemssoen, Melis Melyssoen was vander Hostadt, Wynric Geretssoen, Henric Queden ende Johan Karrel

(f32verso)

scepen in Gemert tuegen in desen opene brieve, dat voer ons is coemen Willem Zaelden neve ende heeft ontfangen voer eenen erfacht vanden eerweerdigen onsen heer, heer Ywaen van Cortenbach lantcommendeur der balyen vanden Byessen ende een heer des dorps van Gemert ende een overste des huijs van Gemert thoebehoerende den Duytschen Oerden dat is te weeten den Sloetelbosch ende die laeren voer ende after, alsoe verre als dese voersz erffenis den huys van Gemert ende den Oerden thoebehoerende was, uutgescheyden dat dat huijs van Gemert ende hoer goede, hoeren leem graven sullen op die voersz laeren ende orbaeren daer sy des behoeven of haer laeten erffelycks, Voert meer soe sullen die watermoelen haer recht behouden op die voerste laeren rousch te steeken die diecken daer mede te houden soe wanneer dat die moller des behoeven. Ende voert vuyt gescheyden dat alle man syn erve daer over bruycken sal te vaeren of te drijeven, die daer tot daeghe toe van rechts weegen over geweecht hebben, eest Moelenbroeck off die Voert of soe wie dat des te doen heeft. Voert meer soe heeft Willem vrsz gelooft voer hem ende voer syn naecoemeling den eerweerdigen lantcoemmendeur voersz tot behoef des huys van Gemert twe mudden rogs tsjaers erffelycke te gelden ende iaerlycx schuldich syn te betaelen altoes op onser vrouwen lichtmis dach purificatio, ende te leveren op des huys choeren sulre te Gemert vuyt den voergenuemde onderpande ende erve ende die vrsz onderpanden syn gelegen gelyc als hier nae gescreven steet. Item den Sloetelbosch metter eenre syden beneven die voerste laeren metten holen grave, alsoo omme beneven den wech die compt van de leemcuelen ende gheet ter moelen waert, alsoe weder omme beneven den moelen grave, alsoe voert nederwaert metten heelen grave beneven die steghe al tot Heynen Queens erve toe, datmen heyt die Waterbempt, ende teynde beneven Heynnen erve vrsz totter voerste laeren toe, ende die voerste laeren gaen aen voer aenden moelenwiel ende daer behouden die moller eenen erffwech aff ende aen te vaeren ende te gaen ende metten anderen eynde aen die Voert ende aen die oude leemcuelen Willem Heynnsensoens erve, ende Willem voersz en sal dat waterlaet niet stoppen den nieuwen grave ende houden alsoe dat dat waeter synen ganck gaen mach beneven dien voerscreven Sloetelbosch totter waetermoelen wijel, Ende die overste laeren gaen aen beneven den nieuwen grave by Aerts erve van Middelschoet, Aleyten erve vander Beec vyfeycx eussel totter Groescuijlen, tot des heeren gemeynt, alsoe verre als die voergenuemde laeten den Oerden ende den huijse van Gemert thoebehoerende waeren, ende dese

(f33)

voersz laeten behouden hoer weggen te lanx ende te wers te vaeren ende te drijven over die vrsz laeren gelyck als sy voertyts plaegen tot behoeff alle der geenre dies te doen hebben off sullen hebben, Ende Willem vrsz ende syn naecoemelinghe sullen dit vrsz erve bruijcken ende besuighen(?) erffelycke voer desen voergenuemden pacht ende daer voer salt hem den Oerden weren, Alle argelist altoes vuytgescheyden. In oirconde der waerheijt soe hebben wy scepen voersz onsen zegel ons gemeyns scepenstoels van Gemert aen desen brieff gehangen ende gegeven inden iaer ons heeren duijsent vierhondert ende seshien, op sincte Petersdach ad vincula.

Die weduwe des iongen Dierck Daenels, nu Joris Hoegers woenende in die Moelenstraet gilt tsjaers vuijt lxxiii roeden landts, gelegen by die alde wyntmoelen steet op die ecker, nu neven Lenarts vanden Bleeck kynder erve. Opten brieff steet boeven gescreven Emont Woutersssn iii vat rogge

(afschrift van AKDOG 796, regest 143, dd 14-2-1409)

Wy Korstiaen vanden Mortel, Dierck vanden Bleeck, Ansem Goessenssoen, Geret Fyensoen, Wynric Geretssoen, Henrick Queden ende Johan Karrel scepen in Gemert tuegen in desen opene brieven dat voer ons is coemen heer Jan Clotte commendeur te Gemert in diere tyt ende heeft vuijtgegeven ende erffelyc verpacht met raede syns overste heer Reynarts van Huesen lantcommendeur der balyen vanden Biessen ende met raede der broederen des huys van Gemert eenen goeden sekeren man Emont Wouterssoen was in synen heelen bedde een stucke landts dat gemeten is voer lxxiii roeden ende gelegen is dien ecker byder auwer wyntmoelen steet, metter eenre syden neven Diercx erve van Gemert, dander syde beneven erffenissee was Heynen Wolfs ende metten eenen eynde aen Henrick Smollers erve, gelyck als dat voersz stucke landts gelegen is binnen synen paelsteeden, daer vuijt heeft Emont vrsz den voergenuemden commendeur geloeft tot behoeff des huys van Gemert drie vaeten roggen tsjaers

(f33verso)

erffelycken te gelden ende te betaelen opten huuse van Gemert opten sulre iaerlycx altoes op onser lieven vrouwen dach purificatio, ende te leveren metter geboeder maeten van Gemert, vuyt die voergenuemden erve. Alle argelist off nijevonden altoes vuytgescheyden. In oerconde der waerheyt soe hebben wy scepenen vrsz onsen zegel ons gemeyns scepenstoels van Gemert aen desen brief gehangen ende gegeven inden iaer ons heeren duysent vierhondert ende negen, vierthien daegen in februario.

(Dan volgt een afschrift van dezelfde akte met hier en daar een afwijkende spelling. In origineel is de akte ook in duplo)

(f34)

Jan Haywychen kijnder, Enxken Smets ende die kynderen Dierck Smets, nu die weduwe Ansem Haywychen cum suis, gelden tsjaers van Mathys wegen, ende erve haldende int geheel viij loepen saet landts geheyten de Moelenecker, gelegen by die brugge te Gemert iii mud rogge.

Opten brief steet buijten gescreven Willem Schoenmeekers. Gilt daer af die weduwe Ansem Haywychen tsjaers xv vat roggen, nu die weduwe Jan Walravens.

Enxken Smets ende die kynderen Dierck Smets, nu Henrick die Snijder, nu Peter Ruellen Berkerssn gilt vande iij mud voersz xv vat roggen, ende is een onderpandt, ende syn twe brieven transfix doer een gesteeken.

Copie van de brieven voerscreven. (afschrift van AKDOG 756, regist 141, dd 14-2-1409)

Wy Korstiaen vande Mortel, Dierck vanden Bleeke, Ansem Goessensoen, Geret Fyensoen, Wynric Geretssn, Henrick Queden ende Johan Karrel scepen in Gemert tugen in desen openen brieve dat voer ons is coemen heer Dirck van Betgenhuysen commendeur te Gemert tot diere tyt ende heeft vuytgegeven ende erffelyck verpacht met raede syns oversten heer Reynarts van Huesen ende met raede des broederen des huijs van Gemert eenen goeden sekeren man Willem Schoenmeekers Wynric Mariensoens soen was in synen heelen bedde eenen ecker lants is geheyten den Moelenecker met synen toebehoerten ende is gelegen metten eenre syde ende metter eenre eynde beneven Spierincx erve van Gemert, metter ander syde beneven Diercx erve van Gemert ende Jans erve van Merxsel, gelyc als dit erve voersscr gelegen is binnen syne paelsteden dat is Willem vrsz geleverd ende gemeten voer achtehalf lopensaet lants vyftich roeden voer elck loepensaet gemeten, daer vuyt heeft Willem vrsz geloeft voer hem ende syn naecomelinge derderhalf mudde roggen den voergenuemden commendeur tot behoeff des huijs van Gemert tsjaers erffelycke te gelden ende iaerlycx te betaelen altoes op onser liever vrouwendach purificatio ende te leveren opten huise van Gemert opten sulre mette geboede maeten

(f34verso)

van Gemert vuyt desen voergenuemden erve. Alle argelist oft nijevonden altoes vuytgescheyden. In oirconde der waerheyt soe hebben wy scepen voerscreven onsen segel ons gemeyns scependomps van Gemert aen desen brief gehangen ende gegeven inden jaer ons heeren duysent vierhondert ende negen, vierthien daegen in februario.

Transfix

(Volgt dezelfde tekst als hiervoor met enkele verschillen in spelling. In origineel is de akte ook in duplo)

(f35)

Roelloff Enxkens off Zegers, ende die kynderen Rut Enxkens, nu ter tyt Peter Queens, nu syn kynder gelden tsjaers xiiij vat roggen

vuijt twelf loepenssche landts ende twentich roeden geheyten den Boentuyn, neven den Leuecker gelegen

Opten brief steet buijten gescreven Ansem Heynnssoen.

Rut Enxkens, nu ter tyt Goert van Cuijck, alias Goert die Smet, Goert Stynnen swager gilt tsjaers vuijttten Boentuijn xiii vat roggen

Ende is een onderpandt tsamen xxvi vat roggen

Ansem Heijnns soen

(afschrift AKDOG 694, regest 136, dd 14-2-1409)

Wy Korstiaen vande Mortel, Dierck vanden Bleeke, Ansem Goessenssoen, Geret Fyensoen, Wynrick Geretssn, Henrick Queden ende Johan Karrel scepen in Gemert tugen in desen openen brieve dat voer ons is coemen heer Dierck van Betgenhuysen commendeur tot Gemert in dier tyt ende heeft vuijtgeheven ende erffelyc verpacht met raede syns overste heeren Reynarts van Huesen lantcommendeur der balyen vanden Biessen ende met raede der bruederen des huijs van Gemert eenen goeden sekeren man Ansem Henricksoenssoen was eenen acker heyt die Boentuijn ende dat Cleyn Gheroetken met synen toebehoerten, dat Ansem gemeten ende geleverd voer twelf loepensaet ende twentich roeden, voer elck loepensaet vyftich roeden gemeten, ende dese vrsz erffenis is gelegen neven des heeren straete die leget neven den Leuecker, ende alsoe voert langs neven die straet die geet totten Groeten Gheroedt toe ende alsoe wederom Goessen Knoden erve daer neven metten waterlate, alsoe voert neven Jacops erve van Ghelre ende neven Ansems erve voersz alsoe omgaende neven dat erve vander Beecke tot Goessen Knoden erve toe ende neven Goessens erve weder totter straten toe, ende die vrsz straete totten

(f35verso)

hoelen grave toe, die totten Leuecker hoert, die Ansem vrsz die weyde die daer op wast bruijcken ende besingen erffelyck sonder anders iemant engheen schade te doen, ende en geen ander recht en heeft Ansem voersz aende straeten dan gelyc de anderen gebueren daer over te vaeren ende te wandelen, ende die vrsz straete en sal Ansem niet argeren, versperren met graven noch met engheen punten, ende vuyt dese voergenoemde lande heeft Ansem voersz den commendeur voergenumpt geloeft in orber ende tot behoeff des huijs van Gemert twe mud ende twe vaet roggen tsjaers erffelijcken daer vuyt te gelden ende te betaelen opten huijse van Gemert opten sulre jaerlycx altoes op onser liever vrouwendach purificatio, ende te leveren mette geboeden maete van Gemert, vuyt dien voergenoemden erve, ende dese vrsz erffenis sal Ansem voersz ende syn naecoemelinghe erffelycke besetten, bruycken ende besinghen als voer syn erve, voer desen voergenoemden erffpacht, gelyc voerscreven is. Alle argelist oft nyevonden altoes vuytgescheyden. In oerconde der waerheyt soe hebben wy scepen voerscreven onsen segel ons gemeyns scependomps van Gemert aen desen brief gehangen ende gegeven inden jaer ons heeren duysent vierhondert ende negen, vierthien daegen in februario.

Wyffelet van Gerwen eermaels scholtet, daer nae Peter Willems syn swaeger, nu ter tyt die weduwe Peter Willems woenende by joncffrou Beckers, nu Dierck Peters hen soen gilt tsjaers vuyt synen huysse ende erffenis daer hy in woent ii mud roggen, opten brief steet buyten gescreven Willem Saelden.

Copie vanden brief (afschrift van AKDOG 674, regest 147, dd 14-2-1409; van het origineel is ook een transcriptie beschikbaar)

Wy Korstiaen van den Mortel, Dierck van den Bleeke, Ansem Goessens soen, Geret Fyen soen, Wijnric Geretssn, Henrick Queden ende Johan Karrel, scepen in Ghemert tuegen in desen openen brieve dat voer ons is coemen heer Dierck van Betgenhuijsen commendeur tot Ghemert dier tijt

(f36)

ende heeft vuytgegeven ende erffelyck verpacht met raede sijns oversten heer Reynarts van Huesen lantcommendeur der Balyen van den Biessen ende met raede der broederen des huys van Gemert, eenen goeden sekeren man Willem Saelden neve een erffenis is genoempt dat Calvereussel dat toebehoerende was den hoffgoede ende is gelegen metten eenre syde beneven des heerenstraete dander syde vanden voersz erve is gelegen neven Willems erve des pechters vrsz ende voert beneven Aleyten kynder erve van der Beke ende beneven Gevarts kynder erve van den Gruenendael ende after beneven Melis kynder erve van den Broeck ende dat ander eynde is gelegen aen Henrick Maessoens kynder erve ende Johans erve van Wetviert (in het origineel staat Berwout) voert gelyc als dit voerschr. erve gelegen is bynnen sijnen paelsteden ende met allen synen toebehoerten daer heeft Willem voersz geloeft den commendeur voergenoempt tot behoeff des huys van Gemert thoebehorende den Duytschen Oerden twe mud roggen tsjaers erffelycke die sal Willem voerscreven ende syn naecomelinge jaerlycx altoes betaelen op onser liever vrouwen dach purificatio ende te leveren metter geboeden maete van Gemert opten huys van Gemert opten sulre ende Willem voerschr. ende sijn naecoemelinge sullen die vrsz erve bruycken ende besinghen tot ewelycken daege als voer hoer erve, voer dese twe erffmud rogge vrscr die sy den huijse voerscreven jaerlycx daer vuyt gelden sullen. Alle argelist oft nyevonden altoes vuytgescheyden. In oerconde der waerheyt soe hebben wy scepen voerschr. onsen segel ons gemeyns scephendoms van Gemert aen desen brief gehangen ende gegeven inden jaer ons heeren duyssent vierhondert ende negen vierthien dagen in februario.

Die kijnderen Frederick Eyckmans, nu Jan Fredericks, nu syn kynder gelden tsjaers vuyt eenen bempt aen die Rulle gelegen iijj vat roggen

Opten brief steet buyten gescreven Aert Eyckmans.

Copie vanden brieve (afschrift van AKDOG 602F, regest 188, dd 27-2-1421)

(f36verso)

Wy Dierck Loyen neve, Ansem Goessenssn, Jan Gevarts, Melis vander Hofstadt, Wynric Geretssoen, Maes Maessoen van Haeselbosch ende Ansem vander Heelderdonck scepen in Gemert doen condt een iegelyck dat voer ons is gestaen der eerber geestelycken in goede ons lieve ende gemynde heer, heer Ywaen van Cortenbach landtcommendeur der Balyen vanden Biessen Duyts Oerdens, heer des dorps van Gemert ende heeft verleent, vuytgegeven ende erffelycken verpacht Arnden wittich soen wylen Arnts geheyten Eyckmans eenen bempt gelegen inde paelen van Gemert met allen synen toebehoerten, metter eenre syde neven erffnisse der heeren van Gemert ende metter andere syde neven erffenis Berniers ende Arnte pechters voersz, ende metten eenen eynde aenden heeren erve voerscr gelyck die paelsteden aldaer ter steden begrepen, dats te weten omme vier vaeten rogs jaerlycx ende erffelycx pachs der maeten van Gemert alle jaer op onser vrouwen lichtmis dach den voerscreven verpechter vanden voersz pechter te gelden, erffelyck ende te betaelen ende opten huuse van Gemert opten choeren sulre te custen ende te leveren, Voert soe heeft geloeft ons heer heer Ywan vrsz den voersz Aert pechter desen voersz bempt over desen voersz erfpacht dien hy hem verpacht heeft, van allen anderen voercommer daer in wessende te vryen erffelyck ende te weren, ende Aert pechter voersz heeft weder geloeft als principael schulder den voersz verpechter desen voersz erffpacht den vrsz bempt met allen synen toebehoerten gelyc als voerscreven is jaerlycx daer opten voerscreven schoudag te gelden erffelycken ende te betaelen. Bezegelt metten gemeynen segel ons scependomps van Gemert. Inden jaer ons heeren duysent vierhondert twentich ende een, opten naesten donderdach nae Sente Mathysdaeghe.

Lysbeth Boykens, Ghritgen Hermans haer suster, daer nae Jan van Ploesterdonck, nu Reynart Rutten van Vlierden gilt tsjaers vuyt huys ende hoff ende drie loepensaet lants, geheyten aen die Haege eijck ende heyt den Byehoff, xiiij vat rogge. Opten brief steet buyten gescreven Waltger Aertssoen.

(f37)

Copie van den brieve (afschrift van AKDOG 698, regest 135, dd 14-2-1409)

Wy Korstiaen vanden Mortel, Dierck vanden Bleek, Ansem Goessenssoen, Geret Fyensoen, Wynric Geretssn, Henric Queden ende Johan Karrel scepen in Gemert tugen in desen openen brieve dat voer ons is coemen heer Jan Clot commenduer tot Gemert tot diere tyt heeft vuytgegeven ende erffelyc verpacht met raede syns overste heere Reynarts van Husen lantcommendeur der Balyen vanden Biessen ende met raede der broederen des huys van Gemert, Eenen goeden sekeren man Waltger Aert Maessoenssoen was drie lopensaet lants inden Byehoff voer elck lopensaet vyftich roeden gemeten. welck erve voersz dat gelegen is metter eenre syden ende metter eenen eynde neven des heeren straet, dander syde neven Peters Huiters erve, dander eynde neven Heynen soens erve dat van desen erve gedeilt wordt ende vuyt desen vrsz erve heeft Waltger voersz geloeft den voergenoemden commendeur tot behoeff des huys van Gemert toebehoerende den Duytschen Oerden vierthien vaet rogge tsjaers erffelycken te gelden ende te betaelen opten huysse van Gemert opten sulre op onser liever vrouwendach purificatio, ende te leveren metten geboeden maete van Gemert vuyt desen voergenuemden erve, ende Waltger vrsz ende syn naecoemelinghe sullen dat voersz erve bruycken ende besinghen als hoer erve voer dese voergenoemde verthien vaet rogge erffpachts, Alle argelist oft nijevonden altoes vuytgescheyden. In oerconde der waerheyt soe hebben wy scepen voerscreven onsen segel ons gemeyns scependomps van Gemert aen desen brief gehangen ende gegeven inden jaer ons heeren duysent vierhondert ende negen, vierthien dagen in februario.

Joest die Smet, daer nae Gerart Hogarts, nu Jan Gerart Hoegartssoen, nu die weduwe te weten Hilleken Hoegarts gilt tsjaers uut erve inden Bieshoff gelegen, daer Hilleken voersz op woent int geheel drie lopensaet lants ende twelf roeden coempt Hilleken van synen gedeelte te gelden tsjaers vij vat rogge, ende dit goet is gelegen aenden Fellenoert neven erffenisse Phlips die Snyder metter eenre syden, metter andere

(f37verso)

syden neven erffenisse Jan die Lange, dat een eynt langs beneven die straet, dat ander eynde Jans die Lange erve voersz.

Jan van Geeldrop, daer nae Wrenskens vander Luet, daer nae Stans Verlocht, nu Willem Vermolen gilt tsjaers vuyt syne erve inden Bieshoff gelegen ende is gedeilt van Gerets Hoegarts erve voersz viij vat rogge, ende is ooc gelegen aenden Fellenoert.

Den Peracker. Goessen Fredericks, nu Ansem vande Sande off Ansem Goessens, ende Heyn Verryt, nu Frans Stanssen syn swager, vuyt een stuck lants ende weyvelts daerby gelegen toebehoerende Denken Denen vander Rennen gelegen teynde die hoeve op Meelschot ii mud rogge, gecoefft tegen Lenarden vanden Bleeck, ende Michiel Jan Maessoen als erffgenamen Goert vanden Bleeck, overgegeven den huuse van Gemert. Opten brief steet buyten geschreven Lenart vanden Bleeck ende Michiel Jan Maessn.

Ansem vande Sandt vel Ansem Goessens gilt vanden twe mud rogge voersz tsjaers i mud rogge

Frans Stanssen vel Frans Jan Stanssensoen gilt dat ander mud tsjaers i mud rogge.

Copie van den principael brief (afschrift AKDOG 750, dd 29-5-1505)

Wy Joest die Smet, Jan van Hout, Jacop van Huevoert, Eymbrecht Michiels, Aert Mickarts, Geret Roelofs, Jan vander Voert, scepen in Gemert tugen in desen openen brieve dat voer ons coemen is Lenart wittighe soen

(f38)

Goerts vanden Bleeck vylner in synen heelen bedde ende met hem Michiel Jan Maessoen als man ende momber Yda synder huysvrouwen ooc een wittige dochter Goerts vanden Bleeck vrsz, ende hebben gesamenderhandt eendrechtelyck onverscheyden ende ongedeelt tusschen Lenarden ende Michielen vrsz met hebben afgedielt Jannen vander Voert hennen meden swager, gelyck in eenen scepenen deylbrieff van Gemert daer voertyts op gemaect wael begrypt ende inhelt te weten: inden iersten soe hebben Lenaert ende Michiel vrsz erffelycken opgedragen ende mette alde brieven overgegeven Johans vander Moelen diender myns heeren lantcommendeurs tot behoeff des oerdens ende des huys van Gemert een mud roggen erffpachts der maeten van Gemert, welck mud roggen vrsz Jan vanden Sande voertyts opgedragen ende overgegeven heeft Goerden vanden Bleeck voersz ende gelooft had jaerlycx te betaelen altoes tot onser vrouwendach purificatio van ende vuyt eenen stuck lants gelegen op Meelschot aldaer beneven der heeren erve van Gemert met beyde syden ende metten eenen eijnde ende metten anderen eynde op erffnisse der kynderen Jans Sluwen gelyck in eenen scepenen brief van Gemert daer voertyts af gemaect ende inhelt ende wael begrypt. Item noch soo hebben Lenart ende Michiel voersz opgedragen ende metten alde brieff overgegeven Janissen vander Moelen een mud rogge erffpachts tot behoeff des oerden ende des huys van Gemert, welck mud rogge voersz die selve Jan vanden Sande vrsz ooc opgedragen ende overgegeven had Goerden vanden Bleeck vrsz ende gelooft had jaerlycx te betaelen van ende vuyt eenen stuck bempts gelegen op Meelschot aldaer beneven erffnisse Maessen vander Locht aen een syde ende erffnisse der kynderen Janss vander Rennen aen dander syde ende metten eenen eynde op der heeren erff van Gemert metten anderen eynde op Maess kynderen erf voersz gelyck eenen alden scepenenbrief van Gemert daer voertyts op gemaect volcoemelyck wael begrypt ende inhelt. Voert soe hebben Lenart ende Michiel voersz met heer Jan vander Voert gesamender handt helmeling vertegen op dese twe mud roggen pachts ende op alde brieff ende op alle rechten hen daer in toebehoerende tot behoef des oerdens ende des huys van Gemert, gelovende noch Lenardt ende Michiel vrsz Janissen voerscreven als principael schulders dat opdragen ende dat overgeven ende dat vertyen voersz ewelyck vast ende stedich te houden sonder enich wederseggen.

(f38verso)

ende alle voercommer in desen erfacht vrsz van hender weggen daer in wesende, den oerden of den huysse voersz altemael aff sullen doen op hen ende op allen hen goet, nu ter tyt hebbende oft vercrigende. Sonder argelist bezegelt metten gemeynen zegel ons scependomps van Gemert. Inden jaer ons heeren duysent vyfhondert ende vyf, xxix dach meij.

Peter Aerts, daer nae Lyn syn huysvrouw, daer nae Jan vander Luet becker boeven gewegt, nu ter tyt Roeloff Aellarts syn swager gelden tsjaers vuyt twe buenre beempden i malder rogge

Gilt daer aff Roeloff voersz, het is gedeilt iii vat rogge, het goet is in die Panthelaer gelegen.

Dierck Gerets, nu Lemmen Noyen, nu Jan die Schrinnewerker gilt die ander iii vat roggende ende is een onderpandt. Opten brief steet buyten gescreven Emont vander Hoeven.

Copie vanden principael brief (afschrift van AKDOG 675, regist 171, dd 15-3-1414)

Wy Korstiaen vanden Mortel, Dierck vanden Bleeke, Ansem Goessenssn, Wynric Geretssoen, Henric Queden, ende Johan Karrel scepen in Gemert tugen in desen openen brieve dat voer ons is coemen Emonts soen, die selve Emont die Dierck natuerlycken soen was van Gemert ende heeft ontfangen erffelycken tot synen behoefte ende Huybrechs brueder vanden geestelycken eerweerdighe heer Ywaen van Cortenbach lantcommenduer ende een overste der balyen van Biessen ende des dorps van Gemert, dat is twe buenre beemps off alsoe veel meer, als heer Jan Clot die commenduer was tot Gemert Emont voersz daer gemeten ende geleverd heeft, gelyc als Emont voersz heeft doen begraven ende is gelegen in Maesbempt genoempt metten eenen syde neven Geret Ruellens soen erve, alsoe voert beneven der heeren erve voersz, alsoe wederom neven Wynric erve vander Panthelaere, alsoe omme neven Geret Roeloffs soens erve ende Emonts erve

(f39)

Emonts weder voerscreven gelyck als dese voersz bempt geleghen is binnen syne paelsteden, daer vuyt heeft Emont voersz geloeft den voergenuemden lantcommenduer in urber ende tot behoeff des huijs van Gemert een erffmalder roggen jaerlycx daer vuyt te gelden ende te betaelen altoes op onser vrouwen dach purificatio ende te leveren op heeren choeren sulre metter geboeden maete van Gemert ende die voersz lantcommenduer heeft tot Emonts ende Huybrechs behoeff daer helmelinghe op vertegen van syns oerdens wegen op desen voersz bempt als voer dat erffmalder rogge. Alle argelist vuytgescheyden. In oerconde der waerheyte soe hebben wy scepen voerscreven onsen zegel ons gemeyns scependomps van Gemert aen desen brief gehangen ende gegeven inden jaer ons heeren duysent vierhondert vierthien, te halve meert.

Item den Varrenecker gilt tsjaers iii mud ende viiii vaten roggen. Gelden dese persoenen nae bescreven. Inden iersten Jan vander Luet, nu Roeloff Aellarts syn swaeger woenende inde Panthelaer gilt tsjaers vanden Varrenecker viii vat rogge

Gilt van dese viii vat roggen Catharina Valcx iiiii vat rogge

Item is te weeten dat dese parceelen landts van een gedeilt syn van een derdendeel tsamen vanden Varrenecker gelegen op die Molenacker metten eenre eynde op die Molenstraet, dander eynde aenden wech neven den Leuecker die een syde Dierck Timmermans, modo Jans kynderen vander Hostadt, die ander syde Diercx erve van Gemert, modo Gerets vander Hoeven erve daer vuyt te gelden tsjaers xv vat roggen

Lenardt Valcx, daer nae Barbara syn huysvrouw, nu die kynderen Lenardt Valcx, modo Catharina Geret Valcx dochter gilt tsjaers vijften Varrenecker xii vat roggen. Opten brief steet buyten gescreven ffelleort ende syn drie brieven doersteken.

Copie vanden iersten brief vande xv vat roggen voerscreven. (afschrift van AKDOG 692, regist 176, dd 1-8-1416)

(f39verso)

Wy Dierck vanden Bleeke, Ansem Goessenssoen, Wynric Geretssn, Bernier Willemsn, Melis Maessoen was vander Hostadt scepen in Gemert doen condt en yegelycken die desen brief sien oft hoeren sullen lesen, dat voer ons is coemen Dierck die Hoppenbrouwer diemen Feldert ende heeft ontfangen voer eenen erfpacht vanden eerweerdighen onsen heere, heer Ywaen van Cortenbach lantcommenduer der balyen vanden Biessen ende een heer des dorps van Gemert, den Varrenecker die voertyts was Henrick des Horters, daer en Dierck voerscreven aff over creech, die gelegen is metter eenre syde beneven Dierck Timmermans erve, dat oic des oerdens was, dander syde is gelegen beneven Diercks erve van Gemert, metten eenen eynde aen des heeren straete, dander eynde aenden wech by den Leuecker, gelyck als desen voerscreven ecker gelegen is bynnen syne paelsteden, daer vuyt heeft Dierck voersz geloeft voer hem ende voer syne naecoemeling, den lantcommenduer voer genuempt tot behoef des huys van Gemert vyfthien lopen rogs der maete van Gemert, die heet Dierck voersz geloeft te betaelen den huys van Gemert erffelycken ende jaerlycx altoes op onser vrouwen lichtmisdach opten huys van Gemert opten choeren sulre ende Dierck voersz off syn naecoemeling sullen dit vrsz gebruycken ende besinghen erffelycken voer der voergenoempden pacht. Alle argelist altoes vuytgescheyden. In oerconde der waerheyte soe hebben wy scepen voerscreven onsen zegel ons gemeyns scepenstoels van Gemert aen desen brief gehangen ende gegheven inden jaer ons heeren duysent vierhondert ende seshien op sunte peters dach ad vincula.

Jan Verhostadt, nu die kynderen vel erffgenaemen Jans Verhostadt woenende in die Panthelaer sc.

Aelken van Boekel ende Jan Aellarts gelden tsjaers vuyjten Varrenecker xvij vat rogge
Opten brief steet buijten gescreven Dierck Timmermans

Copie vanden brief (afschrift van AKDOG 692, regest 145, dd 14-2-1409)

(f40)

Wy Korstiaen vanden Mortel, Dierck vanden Bleeck, Ansem Goessenssoen, Wynric Geretssoen, Geret Fyen soen, Henrick Queden ende Johan Karrel scepen in Gemert tuegen in desen openen brieff dat voer ons coemen is heer Jan Clot commenduer te Gemert tot dier tyt heeft vuytgegeven ende erffelycken verpacht met raede syns overste heeren Reynarts van Huesen lantcommenduer der balyen vanden Biessen ende met raede der brueder des huys van Gemert eenen goeden sekeren man Dierck Timmerman, diemen heyt van Boerlare een derdendeel vanden Varrenecker gelyc als Dierck met synnen gesellen dien alinghs Varrenecker gedeilt hadden, welck erve dat Diercken gemeten is voer soeven lopensaet ende twaelf roeden ende dit voerscreven erve is gelegen metter eenre syde neven Godert Kaerels erve, dander syde neven Henricx erve diemen heyt die Hoenre deen eynde aen des heeren straete dander eynde aen eenen wech die geleghen is tusschen desen erve ende die Leuecker ende vuyt dese voergenoempde erve heeft Dierck voersz heer Jan Clotte geloeft tot behoeff des huys van Gemert thoebehoerende den Duytschen Oerden vyfthien vaet rogge erffelycken te leveren ende te betaelen jaerlycx altoes op onser lieven vrouwen dach purificatio opten voersz huijse van Gemert metter geboeden maete van Gemert opten sulre vuyt dese voerscreven erve. Alle argelist ende nijevonden altoes vuytgescheyden. In oerconde der waerheyt soe hebben wy scepen voersz onsen zegel ons gemeyns scephendoms van Gemert aen desen brieff gehangen ende gegeven inden jaer ons heeren duijsent vierhondert ende negen, vierthien dagen in februario.

Die jongen Dierck Daendels, nu die weduwe, nu Joris Hoegarts woenende inde Moelenstraet ghilt tsjaers uutten Varrenecker viij vat rogge

Opten brief steet buijten gescreven Goedert Karlis.

Die weduwe Dierck Michiels te weten Aelken Cremers, nu heer Jan Diercks ghilt tsjaers vuytten Varrenecker vi vat rogge

Opten brief steet buyten gescreven Godert Karlis.

(f40 verso)

Copie vanden principael brieff (afschrift van AKDOG 692, regist 146, dd 14-2-1409)

Wy Korstiaen vanden Mortel, Dierck vanden Bleeck, Ansem Goessenssoen, Wynric Geretssoen, Henrick Queden, ende Johan Karrel scepen in Gemert tuegen in desen openen brieve dat voer ons is coemen heer Jan Clot commenduer te Gemert dierer tyt heeft vuytgegeven ende erffelyck verpacht met raede syns oversten heeren Reynarts van Huesen lantcommenduer der balyen vander Biessen ende met met raede der brueder des huys van Gemert eenen goeden sekeren man Goevert Kaerel een derdel vanden Varrecker die gemeten is voer achtehalff lopensaet landts dat derdel ende gelegen is tot twe steden , dat is te weten dat een stuck is gelegen metter eenre syde neven Goessen Knoeden erve ende Henrick die Mollers erve dat hy vanden Oerden heeft, dander syde is gelegen neven Dierck Timmermans erve metten eenen eynde aen des heeren straete, dat ander stuck lants is gelegen op dander syde vanden Varrecker voer aen des heeren straete metter eenre syde gelyc als Goedert voersz dit voerscreven erve gedeilt heeft vanden Varrecker voersz met synen gesellen. Ende vuyt dese voergenoempden erve soe heet Goert voersz gelooft den voergenoempden commendeur tot behoef des huys van Gemert vyfthien vaet roggen tsjaers erffelycken te gelden ende te betaelen opten huysen van Gemert opten sulre jaerlycx op onser liever vrouwendach purificatio. Ende te leveren metter geboedender maete van Gemert vuyt desen voergenoemden erve. Alle argelist ende nijevonde altoes vuytgescheyden. In oerconde der waerheyt soe hebben wy scepen voerscreven onsen zegel ons gemeyns scependomps van Gemert aen desen brief gehangen ende ghegeven inden jaer ons heeren duysent vier hondert ende negen, vierthien dagen in februario.

Heyn die Molder, daernae Vreyns van Beeck, nu Anna Vreynssen van Beeck dochter, nu Laureyns haer soen, woenende in die Moelenstraet, ende dat goet leet ooc bij die steenen moelen, ghelden tsjaers vuytten selven goet iii malder rogge, vuyt soeven lopensaet lants. Opten brief steet buijten gescreven Willem Weders alias Cock.

(f41)

Copie vanden principael brieff, (afschrift van AKDOG 797, regest 249, dd 27-12-1438)

Wy Dierck die Smet, Bernier Willemssoen, Geret Roeloffs, Henrick vander Hostadt, Henrick Aertssoen, Herman Waltgerssoen, ende Willem vander Oesterbraken scepen in Gemert tuegen in desen openen brieve dat voer ons is coemen heer Claus vander Dussen commendeur tot Gemert nuwe ter tyt met raede syns oversten heeren Dierck van Betgenhuijssen lantcommendeur der balyen vanden Biessen ende heeft effelyck verpacht Willem Weders anders geheyt die Kock een stuck dat hem gemeten ende geleverd is soeven lopensaet groet ende is gelegen inde heerlyckheyt van Gemert aldaer byder wynmoelen te wers over die straet, streckende metter eenre syde ende metten eenre eynde neven die straet metten andere syde neven Diercks van Gemert, Goedert van Erp, Henrick Bloeymans ende Goederts erve van Felleort, metten anderen eynde neven erffnisse der wilneer Godert Karlis als sy seden. Dat is te weten voer ende om drie malder rogs erfpachts effelycken te gelden ende te betaelen altoes op onser liever vrouwen dach purificatio alssmen kerssen bornt den heeren van Gemert opten haeren huys van Gemert aldaer opten choeren sulre. Voert soe heeft heer Claus commendeur voerscreven van syns oerdens weggen geloeft Willem den pechter vrsz die voergen. stuck lants te weren als men erff schuldich is te weren ende allen voercommer boeven den erffpacht voersz daer in wesende af te doen. Sonder argelist. Oerconde der waerheyt soe hebben wy scepen voersz onsen gemeynen zegel ons scependomps van Gemert aen desen brief gehangen int jaer ons heeren duysent vierhondert negen ende dertich, soeven ende twintich dage in decembri.

Mechtelt Gevarts, daernae Heijlwich haer dochter, nu die kijnderen vel die erffgenaemen Jacop Herberts woenende aenden Vossenberch, gelden tsjaers vuyt hoeren erven aenden Mortel oft aenden Vossenberch gelegen xi vat rogge

Opten brief steet buijten gescreven Corstiaen vanden Mortel ende dit erve is gedeilt vande hoeve te Scerpenberch.

(f41verso)

Copie van den principael brief (afschrift van AKDOG 683, regest 161, dd 3-3-1410)

Wij Korstiaen vanden Mortel, Dierck vanden Bleecke, Ansem Goessenssoen, Geret Fijen soen, Henric Queden, ende Johan Karrel scep en in Gemert tugen in desen openen brieve dat voer ons is coemen broeder Joest van Middelborch priester bewaerer des huys van Gemert tot diere tijt ende hadde met wille syns overste heer Reynarts van Huesen lantcommendeur vanden Biessen ende met raede der brueders des huijs van Gemert vuytgegeven ende erffelyck verpacht eenen goeden sekeren man Korstiaen vanden Mortel die Aert Ghebensoenssoen was een erffenisse heyt die Loeheide, die vande hoeve te Scherpenberchs coemen is, ende is gelegen byden Mortel metten eenre syden ende metten eenen eynde neven Korstiaens erve voerscreven dander syde beneven Metten kynder erve vander Oesterbraken metten anderen eynde aen Johan Spruyts erve was, ende vuyt desen voersz erve heeft Korstiaen vrsz geloeft heeren Joesten voerscreven in urber ende tot behoef des huys van Gemert thoebehoerende den Duytschen Oerden elff loepen roggen tsjaers die Korstiaen voersz geloeft heeft erffelycken te betaelen ende te leveren binnen der heeren hoff te Gemert op horen sulre die Korstiaen voersz off syn naecoemelinghe gewijst sal worden vanden genen die dat vorsz huijs bewaeren oft bewoenen sullen ende te leveren metter geboeder maeten van Gemert jaerlycx altoes op onser liever vrouwen dach purificatio te lichtmisse, ende omme des huijse van Gemert syns erfpachs te vaster ende te sekerder te wesen van Korstiaen voersz of van synen erfgenaemen, soe heeft hy den oerden tot eenen erffelycken onderpandt geset eenen halven boenre heyden, die beneven die Loeheiden gelegen is met eenre syde, dander syde beneven Ansems erve van Scherpenberch, dat onderpandt heet Korstiaen den Oerden geloeft te weren ende allen voercommer af te doen, vuytgescheyden des heeren chijns vanden gronde, ende daer voer goet ende wael doegende te maeken op hem ende op syn goet. Alle ergelist off nijevonde altoes vuytgescheyden. In oerconde der waerheyte soe hebben wy scep en voersz onsen zegel ons gemeyns scep endomps van Gemert aen desen brief gehangen ende gegeven inden jaer ons heeren duijsent vierhondert ende thiene drie daegen in Martio.

(f42)

Moey Stevens, Henrick Steffens haer soen ende Lenart vander Hostadt haer swaeger, gelden die selve tsjaers van viij lopensaet ende soeven roeden aen dat Laer geleghen, non inveni litteras xxij vat roggen

Vuyt eenen camp neven den Dorengrave ende Lenardt Verhostadt voer vij lopensaet ende xvii roeden vuytter helft neven den Doerengrave, Hilleken Stevens xi vat ut sequetur in latere sequenti.

Lenart vander Hostadt gilt tsjaers van synde huijsvrouwen wegen, te weten Hilleken Stevens Heyn Stevens suster van viij lopensaet ende vii roeden ut in registro, non inveni litteras, aent Laer geleghen verpacht voertyts Meeus vanden Hoirick anno duyssent vierhondert ende twelf i mud ende xi vat roggen superius scriptum. Item dit erff is geleghen aenden Dyck by Peter Aert Deynen soen tegen over tusschen erve Wouters Jans soen vanden Laer ende Geret Janssoen vanden Laer syn broeder aen een syde ende Aert Geret Keysserssoen ende ooc het een eynd aen Roeloffs erve voersz, dander syde beneven den Dorengrave een gemeyn waterlaet, ende soe voert totter gemeynder straete toe. Mijns heeren erff leet daer teynden aen, ooc die syde geheyten dat Laer, non inveni aliquas litteras, mer sy hebben eenen brief daer aff, maer die en cost ick niet wael gecryghen. Item dese xxij vaten vrsz gelden nu die kynderen Roeloff Janssoen vander Hostadt ende bewoenen dat goet.

Jan van Wynboem, nu Peter Deynen Jans van Wynboems swaeger, gilt tsjaers vuyt erffnisse geleghen by Lenarts Verhofstadt, ende Heyn Stevens, nu die jongen Jan van Wynboem, ende Peter Deynen heeft op getimmert xi vat roggen

Opten brief steet buyten gescreven Aert Spruijt.

Copie vanden principael brieff (afschrift van AKDOG 662, regest 166, dd 25-7-1412)

(f42 verso)

Wij Korstiaen vanden Mortel, Dierck van den Bleeck, Ansem Goessenssoen, Wynric Geretessoen, Geret Fijensoen, Henrick Queden ende Johan Karrel scepen in Gemert tuegen in desen openen brieve dat voer ons is coemen heer Dierck van Betgenhuijsen commenduer tot Gemert in diere tyt ende heeft vuytgegeven ende erffelyck verpacht met raede syns overste den eerweerdigen heeren Ywaen van Cortenbach lantcommenduer der balyen vanden Biessen ende een overste des huys van Gemert thoebehoerende den Duytsche Oerden, eenen goeden sekeren man Arnt diemen heyt Spruijts die halven campe erffnisse die toegehoerende was den goede te Groenendael, ende gelegen is byden Dyck, beneven des heeren straet met eenre syde ende omme beneven Gevarts erve was van Gruenendael, alsoe wederomme beneven Lysbetten Droevers erve ende hoere kynderen, alsoe wederomme beneven Peter des Kersmeekers erve al totten straeten toe, ende vuyt desen voergenoemden erve gelyck als geleghen is binnen synen paelsteden ende met allen synen toebehoerten soe Aert vrsz voer hem ende syn naecomelinghen geloeft den voergenoemden commendeur elf vaet rogge tsjaers erffelycks te gelden tot behoef des huys van Gemert, ende Aert schuldich is te leveren jaerlycx altoes op onser vrouwenlichtmis dach purificatio, metter geboeder maeten van Gemert op des Oerdens choeren sulre te Gemert, ende heer Dierck voersz heet Aert geloeft van des huys wegen van Gemert dat voersz erve te weren erffelycken voer desen voergenoempden pacht. Alle argelist altoes vuyt gescheyden. In oerconde der waerheyt soe hebben wy scepen voersz onsen zegel ons scepenstoels van Gemert aen desen broef gehangen. Inden jaer ons heeren duysent vierhondert ende twelfve op sincte Jacops dach.

#

Die erfgenaemen Jan ende Jacop die Jeger mit Thonis van Asten, nu syn erfgenaemen gelden tsjaers i mud rogge.

Gilt vanden mud voerscreven van Jacops Jegers wegen nu Enx Daendels die Smet vi vat roggen gelegen op die Craenenbraken.

(folio 42a, ongenummerd tussen f42 en f43)

Dit naevolgende is overgeslaghen ende wordt gesuppleert in fol 42 verso luydende als volgt getekent #

Wouter Stevens, Henrick Stevenssoen, nu Peter Aert Dynnensoen, woenende aenden Dyck off aenden Hoevel, heeft desen voerscreven ecker gecoft tegen Wouter Stevens gilt Peter voersz vuijt desen ecker tsjaers xi vaet rogge

Opten brief steet boeven gescreven Peter Kersmeekers.

Copie vanden principael brieff (afschrift van AKDOG 662, regist 165, dd 25-7-1412)

Wy Korstiaen vanden Mortel, Dierck vanden Bleeck, Ansem Goessenssoen, Wynric Geretssoen, Geret Fyensoen, Henrick Queden, ende Johan Karrel scepen in Gemert tuegen in desen openen brieve dat voer ons is coemen heer Dierick van Betgenhuysen commendeur tot Gemert in diere tyt ende heeft vuytgegeven ende erfelycke verpacht met raede ende wille syns overste des eerwerdighen Ywaen van Cortenbach lantcommendeur der balyen vanden Biessen ende een overste des huys van Gemert eenen goeden sekeren man Peter die men heet die Kersmeeker een helft vanden campe thoebehoerende was den goede den Groenendael gelegen byden Dyck deen eynde , ruerende aen des heeren straet, dander eynde aen Peters erve voersz metter eenre syden beneven Ansem Goessenssoens erve met synen gedeelt vander waeterlaete, dander syde is geleghen beneven Aert Spruyts erve dat van desen erve gedeelt wert, gelyck als die voerscreven erve gelegen is bynnen synen paelsteden, ende met allen synen thoebehoerten, daer vuyt heet Peter voersz gelooft voer hem ende voer syne erfgenaemen den voersz commendeur tot behoeff des huys van Gemert elff vaet roggen erfelycken te gelden ende jaerlycx te betaelen, altoes op onser vrouwen lichtmisse dach purificatio ende te leveren metten geboeder maeten van Gemert binnen des heeren woeninghe te Gemert opten choeren sulre, ende die heeren voerscreven sullen Peteren ende synen naecomelingen erfelycke weren als voer

(f42a verso)

desen voerscreven pacht. Alle argelist altoes uutgescheyden. In oirconde der waerheyte soe hebben wy scepen voersz onsen segel ons gemeyns scepenstoels van Gemert aen desen brieffe gehangen ende gegeven inden jaere ons heeren duysent vierhondert ende twelfve op sinte Jacobs dach.

(verder is dit extra blad leeg)

(f43)

Die erfgenaemen Thonis van Asten, daernae Willem die Jeger rentmeester, ende Aert Maes Aertssoen vander Sandtvoert, nu die erfgenaemen Willems te weten Maes die Molder, Thonis Gerets van syns wyfs wegghen, Jenneken Aerts van Haendel dochter het ander malder. En daer is eenen Bosch brief af ende possessie meer than vyftich jaeren, ende dit goet is gelegen in die Deelstraete neven Jacop Jegers erve, Item den Bosch brief steet gescreven in fine libri van woerde te woerde

Jan van Merxsel ende Dierck Emonts, Henrick Mickarts, nu die erfgenaemen, gelden tsjaers van ses zyllen off anderhalven buentre beempts, ende van lande vanden heeren te pacht aengenoemen van Maesbempt affgenaemen een mud roggen, ende een mud haveren, ende steet byden pacht vander haeveren folio 64. Ende opten brief steet buyten gescreven Wijnrick Mariensoen.

Die erfgenaemen Dierck Emonts gelden tsjaers vanden mud roggen ende vanden mud haeveren voersz i malder rogge ende i malder haeveren.

Die erfgenaemen Aert Mickarts, nu Henrick Mickarts, nu Claes Mickarts syn soen, gilt vanden mud rogge voersz ende mud haeveren vrsz tsjaers i malder rogge ende i malder haeveren, ende het malder rogge gilt Claes Mickarts, ende het malder haeveren gilt Henricxken Joseps van wegen haer soens.

Copie van den principael brief (afschrift van AKDOG 675, regest 167, dd 4-1-1413)

Wy Korstiaen vanden Mortel, Dirck vanden Bleeke, Ansem Goessenssoen, Wynrick Geretssn, Geret Fyensoen, Henrick Queden ende Johan Karrel scepen in Gemert tueghen in desen openen brieve dat voer ons is coemen

(f43verso)

heer Jan Clots commendeur tot Gemert in diere tyt ende heeft erffelyck verpacht met raede syns oversten des eerweerdighen heere Ywaen van Cortenbach lantcommendeur der balyen vanden Biessen ende een overste des huys van Gemert eenen goeden sekeren man Wynrick, die Wynrick Mariensoensoen was, anderhalven buenre bempts dat Wynric gemeten waert, ende ghelevert van Maesbempt geheyten, thoebehoerende was den Duytsche Oerden ende des huys van Gemert, welck erve voerscreven gelegen is after beneven Wynric hoff vrsz, alsoe voert beneven Heynen Cathelynsoens erve was, alsoe wederomme beneven des Oerdens erve, al tot Heynen Quedens erve toe, dat oec des Oerdens, ende neven dyen erve weder tot Wynric hoff toe, ende vuyt desen voerscreven erve gelyc alst gelegen is binnen synen paelsteden met allen synen toebehoerten, daer vuyt heeft Wynric voersz den voergenoemden commendeur geloeft tot behoef des huys van Gemert een mud rogs ende een mud haeveren tsjaers erffelycke daer vuyt te gelden ende jaerlycx te betaelen altoes op onser vrouwen lichtmisdach purificatio, ende te leveren metter geboeder maeten van Gemert op des oerdens choeren sulre te Gemert op hoeren huijse ende dat huys van Gemert sal Wynric ende synen erfgenaemen dit voersz erve weren erffelycken als voer dien voergenoemden pacht. Alle argelist altoes vuytgescheyden. In oerconde der waarheyt soe hebben wy scepen voerscreven onsen zegel ons gemeyns scependomps van Gemert aen desen brief gehangen ende gegeven inden jaer ons heeren duijsent vierhondert ende derthien, vier dagen in januario.

Vanden beempt geheyten Maesbeempt geleghen neven der heeren beemden, haldende in groeten eenen buenre beempts, gilt men tsjaers daer vuyt x vat rogge.

Gelden dese persoenen hier nae bescreven, inden iersten Jan vander Luet, daernae Beelken syn huysvrou, nu ter tyt Roeloff Aellartsoen woenende in die Panthelaer, gilt daer vuyt vj vat, i cop roggen.

(f44)

Aelken Denis, off Aelken Mickarts, nu Sijmen Aelken Mickartssoen woenende bij die Haeghe eyck, gilt vanden voersz x vat rogge, iiii vaet ende eenen cop tsaemen x vat rogge.

Copie vanden principaelen brief (afschrift van AKDOG 675, regest 213, dd 7-2-1426. In dit afschrift is de datum foutief overgenomen)

Wij Korstiaen vanden Mortel, Ansem vander Heelderdonck, Ansem Goessenssoen, Wynric Geretssn, Maes Maessoen van Haeselbossche, Willem Wynkenssoen ende Dierck die Smet scepen in Gemert doen condit eenen iegelycken dat voer ons is gestanden ons lieve geneghe heere, heer IJwaen van Cortenbach lantcommendeur der Balyen vanden Biessen der Duytschen Oerden, heer tot Gemert ende heeft met raede syns convents ende der heeren der Balyen voerscreven jaerlycks ende erfelycken verpacht Johan des Langen, Heynen des Langen soens wijlen, eenen buenre beempts gelegen in die heerlyckheyt van Gemert in Maesbeempt metter eenre syden aen erffnisse Willem Heynenssoens ende metten anderen syden neven erffnisse Goeswyn Wolfs ende Willems vrsz, dat is te weten om thien vaet rogs jaerlycx ende erfelycx pachts der maeten van Gemert, allen jaeren op onser vrouwen lichtmisdach, vanden voersz pechter den vrsz verpechter te gelden ende te betaelen ende tot Gemert opten huuse opten choeren sulre cusbers choerens te leveren, Voert soe heeft gelooft die verpechter voersz den vrsz pechter die vrsz buenre beempts over den vrsz pacht te vrijen erfelycken ende te weren, ende Jan pechter voersz heeft weder gelooft als principael schulder den voersz verpechter desen voersz erffpacht jaerlycks op dien schoudach daer aff vuyjten vrsz buenre beempts te gelden ende te betaelen in alder maeten voersz ende omme dat die verpechter vrsz syns erfpachs jaerlycks te sekere syn sal, soe heeft hem Johan pechter vrsz eenen sestersaets landst gelegen in synen erve daer nu ter tyt syn huys aen steet aent Feloert tot eenen sekeren onderpande hier in geset ende verbonden. Bezegelt metten gemeynen segel ons scependomps van Gemert, int jaer ons heeren duysent vierhondert seventich ende sesse, opten naesten donderdach nae onser vrouwendach purificatio.

(f44verso)

Thonis Lucas, daernae Lucas syn soen, nu Jan Jacops van Asten Jan van Schuijl swaeger, gilt tsjaers vuyt erffenisse aen Boecout geleghen, dat coemen is van Hilleken Melis tegen Gerets van Schuyl over, xv vat rogge.

Dat is te weten vanden halven Groeten Ecker op die Aldestraet geleghen, den heelen ecker neven Peter Grietensoens erve off nu Ansem Peters erve secundum litteras scabinorum, nu neven der kynderen erve Noyen vanden Goer ende vanden goede te Gruenendael. Opten brief steet boeven gescreven Jan Gevartssoen van Strybosch.

Den principael brief boeven gescreven eens folio 29

Jan Loyken Loyen soen, van wegghen Loijken synen vader, ende die kynderen Loyen vanden Mortel Jan Jacopssoen van Uden van wegen Alyt Loyen metten kynderen, ende die kynderen Loyen vanden Mortel die kynderen Willem Loyen, te weten Loy, Aert ende Lysbeth, nu die kynderen daer aff gelden tsjaers ii mud rogge vuyt eenen ecker op die Craenenbraken neven eenen wersvaer wech nae Jannen Loyen waert ende ooc vuytten Ruelecker daer tegenover, was toebehoerende der hoeven ter Ynde, Item opten brief steet boeven gescreven Aert Loyen Smollers was hem verleent ter weeken eenen dach heymaeten, met desen erve verpacht heij te meyen gelyck de andere laeten. Datum fier aff anno duysent vierhondert twentich ende een.

(in de kantlijn staat:) Vide supra folio 13 verso.

Jan Loyken Loyen gilt vande twe mud roggen voerscreven tsjaers viij vat rogge

Nu syn huysvrouw Truij Loijen, nu haer kynder.

Jan Jacops van Uden gilt tsjaers vanden twe mud roggen voersz, nu syn erfgenaemen te weten Goerts kynder, Jan kynder ende Jacop kynder ende Mariken huen susters kynder woenende aenden Vossenberch welck waeren kynderen Jan Jacops voersz, viij vat roggen.

(f45)

Die drie kynderen Willem Loyen op Meelschoet, te weten Loy, Aert, ende Lysbeth huysvrou Ansem Peters gelden vande twe mud roggen voercreven, vj vat roggen.

Die erfgenaemen Ansem Peters, nu Willem Ansems gelden vande vi vat rogge, ii vat roggen, ende Willem Ansems betaelt ewelyck die twe vaet roggen by synen pacht, die hy vuytte hoeven Ter Ynden gilt, daer vuyt Willem gilt x vat roggen, ende betaelen opt goet Ter IJnden ewelyck xij vat roggen, soe syn dese twe vaet dan ooc betaelt.

Item Lemmen Noyen, nu Goert Lenarts, gilt vande ses vaet roggen, ii vat roggen.

Item Heyl Loyen, Luitghen cum sororibus, gelden vanden ses vaeten roggen, ij vaet roggen.

Copie vanden principaelen brief vanden twe mud roggen voerscreven. (afschrift van AKDOG 660, regest 189, dd 28-2-1421)

Wij Dierck Johan Loyen neefs swaeger, Ansem Goessenssoen, Johan Gevartssoen, Melis Melissoen vander Hostadt, Wynric Geretssn, Henrick Queden ende Ansem vander Heelderdonck scepen in Gemert tuegen in desen opene brieve dat onsen lieven genedighe heer van Gemert, heer Ywaen van Cortenbach lantcommenduer der balyen vanden Biessen Duijtschen Oerdens ende heer van des huys wegghen van Gemert, erffelycken verpacht Aert Loyen Smollerssoen van Aerlen een erffenis die toebehoerende was der hoeven Terijnden, welck erve dat geleghen is te Gemert op die Craenebraken metten Ruelecker met allen hoeren toebehoerten, alsoe verre alst den goede Ter Ynden toe behoerende was, alle stucken vuytgescheyden den Perecker, ende met dese voersz erve, heeft die lantcommendeur voersz Aert vrsz verpacht eenen dach ter weeken heye te meyen met eenre schysen

(f45verso)

op des oerdens aude harde Haenrevelt ende by Middelschot waert gelegen is binnen der palen van Gemert ende altoes ter goeder tyt te meyen gelyck de andere laeten. Ende Aert voersz sal van desen vrsz erve die hooge IJnde houden, gelyck als dat goet Ter Ynden schuldich was te houden. Ende dese voergenoemden erffenis met allen haeren toebehoerten heet die lantcommendeur voersz Aert overgegeven ende opgedraeghen met eenen helm als voer twe erf mud roggen tsjaers, in urber ende tot behoef des huys van Gemert, die heet Aert geloeft voer hem ende voer syn naecoemeling aen des lantcommendeurs hant erffelycken ende jaerlycx te betaelen altoes tot onser vrouwen lichtmis op den huys van Gemert opten choeren sulre ende te leveren metter geboeden maete van Gemert cusbaere rogge, ende den lantcommendeur voersz heet Aert geloeft van des huys wegghen van Gemert dat erve te weren als voer die twe erffmud roggen, ende al sonder argelist. In oerconde der waerheyt soe hebben wy scepen voersz onsen zegel ons gemeyns scepenstoels van Gemert aen desen brief gehangen ende gegeven inden jaer ons heeren duysent vierhondert twentich ende een, des vrydaechs voer halfvasten.

Item vuyt die Scherpeckers gilt men tsjaers drie malder roggen, Item dese drie malder roggen voersz gelden dese persoenen, Item die Scherpeckers syn gelegen op die Craenenbraken, vuytter helft vanden ecker dat eyndt scherp vuytgaende tot Meelschot waert haldende ontrent thien of twelf lopensaet, ende noch vuyt meer erven ende onderpanden nae inhalt des brieffs daer af. Opten brief steet buyten gescreven Jan Jan Loyen neeffs. Aengaende die Scherpeckers gelden dese persoenen hier nae bescreven.

Nelis Jan Jegerssoen gilt vuyt die Scherpeckers tsjaers i malder rogge.

(f46)

Jan Fredericks gilt tsjaers vuyt die Scherpeckers i malder rogge.

Lucas Vereycken, daer nae syn kynderen, nu Ansem Jegers ende Jan Geffen gelden tsjaers vuyt die Scherpeckers i malder rogge.

Copie van den principalen brieff vande Scherpeckers. (afschrift van AKDOG 690, regest 197, dd 6-2-1422)

Wij Ansem Goessenssoen, Jan Geretssoen, Melis vander Hostadt, Wynric Geretssoen, Ansem vander Heelderdonck, Willem Willem Bernierssoen, ende Maes Maessoen van Haselbossche scepen in Gemert doen condt een yegelyck dat voer ons is coemen, heer Dierck van geldrop, priester, ende heeft wettelycken ende erffelycken verpacht Johan Jan Loyen Neefs soen, die helft van eenen ecker geheyten die Scherpecker, welck heele ecker geleghen is met beyden syden beneven des heeren straete ende metten eenen eynde aen erffenis Aert Loyensoens. Item noch een helft van eenen stuck lants geleghen onder die helft geheyten die Craenenbraken, met beyden syden neven erffenis der heeren van Gemert. Item noch die helft van eenen cleynen ackerken gelegen boven aen die Craenenbraken metter eenre syden neven erffenis Ansem Goessenssoen ende metten andere syden neven erffenis Ansem vander Heelderdonck ende met beyden eynden aen erffenis Aerts Loyensoens voerscreven datter heeren te wesen plach. Ende noch voert eenen plack beempts gelegen after die Rulle metter eenre syden neven erffenis geheyten die Rulle ende metter ander syde neven erffenis Voerdermans kynderen ende metten eenen eynde aen dat cleyn euselken datter heeren te wesen plach als hij seyde, met allen synen toebehoerten in die dingbanc van Gemert, te weten omme drie malder rogs jaerlycx ende erffelycxs pachs der maeten van Gemert alle jaeren op onser vrouwen lichtmisdach den voersz verpechter vanden voersz pechter te gelden erffelycks ende te betaelen tot Gemert opten huysen opten choeren sulre te custen ende te leveren. Ende heer Dierck voerscreven heeft geloeft op hem ende op allen syn goeden vrsz Jan pechter dese

(f46verso)

voerscreven erffenisse die hy hem verpacht heeft als voerscreven is met allen synen toebehoerten over den erfpacht voersz te weren als men erve voer erfpacht schuldich is te weren ende allen voercoemmer van synentwegen daer in wesende af te doen, vuytgenoemen den pacht voersz den selven Jan pechter altemael aff te doen, ende Jan pechter vrsz heeft weder geloeft als principael schulder den voersz heeren Dierck verpechter desen voerscreven erfpacht vuyt desen voerscreven onderpanden, gelyck hy hem die verpacht heeft als voerscreven is met allen hoeren toebehoerten te gelden erffelycken ende te betaelen ende te leveren in alder maeten gelyck voercreven is. Bezegelt metten gemeynen zegel ons scephendoms van Gemert. Inden jaer ons heeren duysent vierhondert twintich ende twe, opten iersten vrydach nae onser vrouwen dach purificatio.

Henrick Gheben, daer nae Lyn syn huijsvrou, daer nae die kynderen Henricks van Tuynen, daernaer Ariaen ver A, nu die weduwe Ariaens ver A, nu Ansem vanden Wijbosch woenende in die Haghe, gilt tsjaers vuyt drie zillen in die Haghe geleghen ende opt huys te Gemert te leveren viij vat rogge.

Opten brief steet buyten gescreven Jan Bloijman.

Copie van den erffbrieff (afschrift AKDOG 727, regest 187, dd 27-2-1421, ook van het origineel is een afschrift beschikbaar)

Wy Dierck Loyen neve, Ansem Goessenssoen, Jan Gevarts, Melis vander Hostadt, Wynric Geretssoen, Maes Maessoen van Haeselbosch ende Ansem vander Helderdonck scepen in Gemert doen condit een iegelycken dat voer ons is gestaen der eerber geestelycken in goede ons lieve ende ghemeynde heer, heer IJwaen van Cortenbach landtcommendeur der Balyen vanden Biessen Duyts Oerdens, heer tot Gemert ende heeft verleent vuytgegeven ende verpacht erffelycken Jan Bloyman soen wilen Claus Bloymans, drie zillen erfs geleghen in die Haghe inden heerenbeempt met allen synen toebehoerten

(f47)

in die palen van Gemert metter eenre syden neven erffenis Jans soen wilen Jan Hannensoens ende metten andere syden neven erffenissen der heeren van Gemert als hij sede, dats te weten omme acht vaeten rogs jaerlycx ende erffelycks pachs der maeten van Gemert, alle jaeren op onser vrouwen lichtmisdach den voersz verpechter vanden vrsz pechter te gelden ende te betaelen erffelycken ende opten huysse tot Gemert op dien choeren sulre te custen ende te leveren, Voert soe heeft geloeft die lantcommendeur verpechter voersz den voersz Jan pechter dese voersz erffenisse met allen hueren toebehoerten over desen vrsz erfpacht van alle anderen voercoemmer daer in wesende te vryen erfflycken ende te weren, ende Johan pechter vrsz heeft weder geloeft als principael schulder den voersz verpechter desen voergenoemden erfpacht voer voersz onderpande alle jaeren opten vrsz schoudach als voerscreven is met allen synen toebehoerten erffelycken te gelden ende te betaelen. Bezegelt metten gemeynen zegel ons scependomps van Gemert, inden jaer ons heeren duysent vierhondert twentich ende een, op naesten donderdaeghe nae sunte Mathijs dach.

Wouter Joerdenssoen, nu Jan Wouters woenende in die Haghe gilt tsjaers vuyt drie zillen ende elff roeden erfs geleghen in die Haeghe byden heeren beempt metten eynde ende aen die straet dat ander eynde. Opten brief steet buyten gescreven Jan Luytgens, ende die erffenis is afgedeilt van Lyn Gheven erve ende op myns heeren solder te leveren vij vat roggen.

Copie vanden erfbrieff (afschrift van AKDOG 727, regest 186, dd 27-2-1421, ook van het origineel is een transcriptie beschikbaar)

Wij Dierck Loyen neve, Ansem Goessenssoen, Jan Gevarts, Melis vander Hostadt, Maes Maessoen van Haeselbosch, Wynric Geretssoen ende Ansem vander Heelderdonck scepen in Gemert doen condt een ijegelyck dat voer ons is gestaen der eerber geestelycken en goede ons lieve ende gemijnden heer,

(f47verso)

heer Ywaen van Cortenbach landtcommenduer der Balyen vanden Biessen Duyts Oerdens, heer des dorps van Gemert ende heeft verleent, vuytgegeven ende erffelycke verpacht Johannem wittighe soen wilen Jans Hannen soen Kynboemen was, drie zillen erfs ende elfte halve roede gelegen in die Haeghe in diere heeren beemden met allen synen toebehoerten bynnen den paelen van Gemert metter eenre syden neven erffenisse Willem Heynen soens ende metten ander syden neven erffenisse Jan Bloedemans, als sy seden. Dats te weten omme acht vaet rogs jaerlycx ende erffelycx pachs der maeten van Gemert allen jaeren op onser vrouwen lichtmisdach, den voerscreven verpechter vanden voersz pechter te gelden ende te betaelen ende opten choeren sulre tot Gemert opten huysen aldaer te custen ende te leveren. Voert soe heeft geloeft die lantcommenduer vrsz den voerscreven verpechter Jan dese voergenoemden erffenisse met allen synen toebehoerten over desen voersz erfpacht van allen anderen voercommer daer in wesende te vryen erffelycks ende te weren als men erffenisse voer erfpacht altoes schuldich is te weren. Ende Johan pechter vrsz heeft weder geloeft als principael schulder den voersz verpechter desen voersz erfpacht vuyten vrsz erffenisse opten voersz schoudach gelyck voerscreven is alle jaeren te gelden te custen, te leveren, ende wael te betaelen den verpechter voersz. Bezegelt metten gemeynen zegel ons scependomps van Gemert inden jaer ons heeren duyssent vierhondert twentich ende een, op iersten donderdach nae suncte Mathysdach.

Heyn Queen, nu syn erfgenaemen, gelden tsjaers vuyt vyf zillen beempts geheyten den Groeten Beempt off den Nijenbeempt van Maesbeempt genoemen, ende plach totten hoeffgoede te behoeren xv vat rogge

Steet opten brief buyten gescreven Henrick Queen gelden dese persoenen hier nae bescreven.

(f48)

Inden iersten Heesken Queens, nu Ysbout van Mierloe, nu syn huysvrou Jenneken gilt vanden xv vaet roggen voerscreven, ij vat rogge.

Margriet Queens ende Styn haer suster, nu Aert Willems, gelden vanden xv vat roggen vrsz, iij cop.

Dierck Emonts, nu syn erfgenaemen te weeten Mr Aert ende Emken Roevers gelden vanden xv vaet roggen voerscreven, iij cop rogge

Lyn Queens, nu haer kynderen, nu Dierck Peter Queenssoen gilt vanden xv vat roggen voerscreven tsjaers, iij vat roggen.

Dierck Everarts Sgrammen soen van Uden gilt tsjaers vanden xv vat roggen voerscreven, iij vat rogge.

Goert Thonis off Goert Thonis Laenen swager, nu Goert Vloemans gilt vanden xv vat rogge voerscreven, ij vat rogge.

Lijsken Teuwen Denis, nu Dierck Verrennen, nu Teuwen Enssen gilt vanden xv vat roggen voerscreven, vj vat roggen

Copie vanden erfbrieff (afschrift van AKDOG 675, regest 160, dd 14-2-1410)

Wij Korstiaen vanden Mortel, Dierck vanden Bleeke, Ansem Goessenssoen, Geret Fyensoen, Wynrick Geretssoen, Henrick Queden ende Johan Karrel scepen in Gemert tuegen in desen openen brieve dat voer ons is coemen heer Dierck van Betgenhuysen commenduer tot Gemert in diere tyt, heeft vuytgegeven

(f48verso)

ende erflycken verpacht met raede syns oversten heer Reynarts van Huesen lantcommenduer der Balyen vanden Biessen ende met der broeders des huys van Gemert eenen goeden sekeren man Henrick die men heyt Queden in synen heelen bedde eenen buenre ende een zille beempts dat hem geleverd ende gemeten is vanden groeten beemde geheyten Maesbeempt ende was toebehoerende den Hoffgoede, dat geleghen is metten eenre syden ende metten eenen eynde neven des Oerdens erve voerscreven, dander syde is geleghen neven Heynen Queens ende Johan Karrels. Ende vuyt desen voerscreven erve heet Henrick Queden gelooft voer hem ende voer syn naecoemlinge den voergenoemden commenduer tot behoef des huys van Gemert vyftich vaet roggen tsjaers erfelycken te gelden ende te betaelen jaerlycx altoes op onser liever vrouwendach purificatio. Ende te leveren opten huys van Gemert opten sulre metter geboeden maete van Gemert. Alle argelist off nijevonden altoes vuytgescheyden. In oerconde der waerheyt soe hebben wy scepen voerscreven onser zegel ons gemeyns scependompts van Gemert aen desen brief gehangen ende gegeven inden jaer ons heeren duysent vierhondert ende thiene, vierthien daeghen in februario.

Jutten Jans kynderen gelden tsjaers vuyt hennen erve xvij vat rogge.

Item vande xi vaet roggen vuytten Perecker byde hoeve Ten Broeck geleghen ierst vuytgegeven Jan Fijensoen, non inveni litteras de illis, mer vanden vi vaeten vuytten halven Groeten Ecker ende die Aelhorst daer is eenen brief aff daer steet buyten op gescreven Jan Fyensoen boeven gescreven byden Groeten Ecker, gelden dese persoenen hier nae bescreven.

(f49)

Inden iersten Jan Henricks, nu Geret Jan Henricksn, nu die kynder Henrick van Oeventghen, gelden vanden xvii vat rogge voerscreven, iij vat rogge

Jan van Hout, nu Henrick van Ovinghen, nu syn kynder gelden vanden xvij vat roggen, iij vat rogge

Henrick Tempelers gilt vanden xvij vat rogge voerscreven, vi vat rogge

Jan Loyen, nu die weduwe Jan Loyen, nu Loy Jan Loyensoen gilt tsjaers vande xvii vaet rogge voerscreven, vi vat rogge

Ende daer is eenen brief af boeven byden Groeten Ecker ende eenen transfix brieff.

Item noch die selve weduwe Jan Loyen, modo Loy Jan Loyensoen, viij vat rogge, thans xv vaet rogge. Daer is ooc eenen brieff af boeven gescreven.

(In de kantlijn staat:) folio 45

Opten brief boeven gescreven Aert Loyen Smollerssoen.

Henrick Joerdens, daer nae Dierck van Zelant, nu ter tyt Jan van Zelant, nu die weduwe Willem Aertywaens gilt vuyt hoeren huys ende erve aen Boecout daer sy in woent, iij malder roggen. Opten brieff steet buyten gescreven Aert vander Hostadt.

Ariaen Roevers, daer nae Haywich syn huysvrou, nu die kynderen Ariaens, nu Peter Roevers gilt tsjaers i malder rogge.

ende is een onderpandt Jan van Zelant te weten tsamen iiii malder rogge. Ende die ecker heyt Delis Ecker. Opten brief steet buyten gescreven Aert vander Hostadt.

(f49verso)

Copie vanden brief. (afschrift van AKDOG 702, regest 185, dd 27-2-1421)

Wy Dierck Loijen neve, Ansem Goessenssoen, Jan Gevartssoen, Melis vander Hostadt, Wynric Geretssoen, Maes Maessoen van Haselbosch ende Ansem vander Heelderdonck scepen in Gemert doen condit ende kennelyck een yegelycken dat voer ons is gestaen der eerber gheestelycke in goede, ons lieve ende gemijnde heer, heer IJwaen van Cortenbach lantcommenduer der balyen vanden Biessen Duyts Oerdens heer des dorps van Gemert ende heeft verleent, vuytgegegeven ende erffelyck verpacht Arnden vander Hostadt wittighen soen Melis vander Hostadt wilner, soeven loepensaets landts geheyten Gijlis Ecker, welck erffenis is geleghen metter eenre syden neven den Doren Ecker, die Melis Maessoens kynderen ende Jan Maessoens kynderen is, ende metter andere syden neven erffenis Gevarts kynderen van Strybosch, dat leet neven den Groenen wech geheyten, ende voert met twe strepen van hem gaende opten Heggrave. Item noch meer een erffenis geheyten die half Drijbleije, met allen synen toebehoerten, dats te weten omme twe mudden rogs jaerlycx ende erffelycks pachs der maeten van Gemert, alle jaeren op onsen vrouwen lichtmisdach, den voersz verpechter vanden voerscreven pechter te gelden erffelyck ende te betaelen, ende opten huuse tot Gemert opten choren sulre te custen ende te leveren. Voert soe heeft geloeft die lantcommenduer verpechter vrsz den voersz pechter dese voerscreven erffenis gelyck hy hem die verpacht heeft in alder manieren voerscreven te weren als men erve schuldich is te weren ende dat hy al anderen voercommer die daer in were den voersz pechter altemael aff sal doen. Ende Arnt vander Hostadt vrsz heeft weder geloeft den vrsz verpechter dese voersz twe mudden rogs uut dese voerscreven erffenis met allen hoeren toebehoerten erffelycken te gelden ende te betaelen in alder maeten ende voerwaarden gelyck voerscreven is. Besegelt metten gemeynen zegel ons scependoms van Gemert. Gegeven int jaer ons heeren duysent vier hondert twentich ende een, opten naesten donderdach nae sunte Mathysdach.

(f50)

Heyn Verhostadt, daernae Jan Verhostadt, nu Willem Janssoen Verhostadt gilt tsjaers vuyt synen erffnisse te weten vander halver Dribbeley, xvi vat rogge

Ansem ende Henrick Maessoen gebroeders van die Dribbelie, xvi vat rogge, steet boeven opten brief gescreven.

Copie van den erfbrieff (afschrift van AKDOG 702, regist 184, dd 27-2-1421)

Wij Dierck Loyen neve, Ansem Goessenssoen, Jan Gevarts, Melis vander Hostadt, Maes Maessoen van Haselbosche, Wynric Geretssoen vander Vondervort ende Ansem vander Heelderdonck scepen in Gemert doen condt een yegelycken dat voer ons is gestaen der eerber gheestelyck in goede, ons lieve ende gemijnde heer, heer IJwaen van Cortenbach lantcommenduer der balyen vanden Biessen Duyts Oerdens heer des dorps van Gemert ende heeft verleent, vuytgegegeven ende erffelyck verpacht Ansemen ende Henricken synen brueder wittighe kynderen wilner Melis vander Hostadt, die helpt van eenre erffnisse geheyten die Dribbelye, gelegen in die dingbancke van Gemert metter eenre eynde aen die straete, die gaende compt van Boekent ter wynmoelen waert, metter allen synen toebehoerten, gelyc dat aldaer gelegen is. Dats te weten omme seshien vaet rogs jaerlycx ende erffelycx pachs der maeten van Gemert, alle jaeren op onsen vrouwen lichtmisdach als men kersen bornt, den voersz verpechter vanden vrsz pechtere te gelden ende te betaelen, ende opten huysse tot Gemert opten choren sulre aldaer te custen ende te leveren. Voert soe heeft geloeft der eerber heer, heer IJwaen verpechter vorrsz den voersz verpechter dese vrsz erffnisse die hy hen verpacht heeft als voerscreven is. Over dese vrsz seshien vaet rogs, van allen anderen voercommer daer in wesende af te doen, te vrijen erffelycken ende te weren. Ende Ansem ende Henrick pechteren voersz hebben weder geloeft als principael sculderen den eerbareen heer verpechter voersz desen vrsz erfpacht inder vrsz voerwaerden allen iaeren te gelden, te betaelen ende te leveren. Besegelt metten gemeynen zegel ons scependomps

(f50verso)

van Gemert. Inden jaer ons heeren duysent vier hondert twentich ende een, opten iersten donderdach nae sunte Mathysdach.

Jenneske die Mesmeker, nu Joest Vervort syn soen, ende Jan Symons huysvrou Margriet gelden die selve jaerlycx vuyt erffnisse in die Deelstraet gelegen by Jacop Jegers erffnisse was, nu die kynderen, i malder rogge, opt onderpandt te haelen. Opten brieff steet buyten gescreven Melis Maessoen vander Hostadt, folio 29 verso.

Gelden dese persoenen. Inden iersten het een syde neven Jacop Jegers erve, dander syde Everarts Scepers erve, het een eynde neven die erfgenaemen Teuwen Denis, het ander des heerenstraet.

Jennesken die Mesmeker, nu Joest Vervoert syn soen gilt vanden malder rogge vrsz tsjaers, iij vat rogge.

Willem Jacob Jegers soen, nu Jan Jan Marcelis Heywighen soen, nu Jenneske Faessen, gilt vanden voersz malder rogge tsjaers, iij vat rogge.

Willem Lucassen woenende aenden Hoevel aen die Geborde Eyck, nu Aert Lucassoen vuyt synen huys daer hy in woent aen die een syde neven Jan Swrijessen, dander syde neven Dries van Lancvelt, metten eenen eyndt neven Jans Swryessen voersz erve, nu Jan Henricks erve, ende metten anderen eyndt neven nu Willem Brouwers erve, ende soe beneven des heeren straet ende meer andere erven gilt tsjaers, iij mud roggen.

Jan Wouters, daernaer Wouter syn soen, nu Henrick Vosters van Helmont, gilt tsjaers vuyt synen huijs

(f51)

ende hoeff, met erffnisse daer aen geleysen, neven Jan Wouters erffnisse was, die een syde, die ander syde neven Marij Corstgens dochter, heer Jan hevet vuyt gegeven anno duyssent vierhondert ende seventhien, daer syn twe brieven aff aen een gevest. Daer steet boeven op huys ende hoff dat Wolfs was, xvi vat rogge.

Copie vande twe brieven aen een gevest. (afschrift van AKDOG 693, regest 130, dd 5-6-1408)

Wij Korstiaen vanden Mortel, Dierck vanden Bleeke, Ansem Goessenssoen, Geret Fyensoen, Wynric Geretssoen, Henric Queden ende Johan Karrel scepen in Gemert tuegen in desen opene brieve dat voer ons is coemen Johan Wolf wylen eer was Geret Wolfssoen in synen heelen bedde met Haywijghen synre moijen die Geret syns vaders suster was met haeren gekoren momber die haer den schoutet gaff metter vonnis ende met recht. Ende hebben saemenderhandt ende over ghescheyden, overgegeven ende opgedraeghen heer Dierck van Bethghenhuysen commanduer tot Gemert tot diere tyt, huys ende hoff metten erve dat daer toe behoerende is, als Johan Wolf voerscreven ende Haywyghen toebehoerende was, dat gelegen is te Gemert aen die Beec metter eenre syden, neven Aleyten Snydders erve vander Beecke ende hoeren kynderen, ende dander syde neven Gielis erve was vanden Broke, ende Jan Soenkens soens erve was metten eenen eynde daer die huysinghe op steet neven des heeren straete, dander eynde neven die steghe aent Goerswinckel, gelyck als dit voersz erve geleghen is bynnen synen paelsteden, ende metter huysinghe die daer op steet. Daerop hebben Johan Wolf ende Haydewych met hoeren momber voersz samenderhant op verteghen met eenen halm met hande ende met monde totten Oerden behoeff. Ende in urber des huys van Gemert. Voert meer soe heeft Johan Wolf voerscreven ende Hadewych met hoeren momber gelooft op hoer ende op al hoer goet, dat overgeven van desen voergenoemden erve. Ende dat verthyen daer op vast ende stedich te houden tot ewelycken daege toe.

(f51verso)

Ende den oerden te weren als men erve schuldich is te weren. Ende alle voercoemmer af te doen, die men van erve schuldich is te doen. Alle argelist of nijevonden altoes vuytgescheyden. In oirconde der waerheyt soe hebben wy scepen voerscreven onsen zegel ons gemeyns scependomps van Gemert aen desen brief gehangen ende gegeven inden jaer ons heeren duysent vierhondert ende achte opten iersten dynsdach in die wedemaent.

Den anderen transfixe brief (afschrift van AKDOG 693, regest 181, dd 23-10-1417)

Wy Dierck vanden Bleeck, Ansem Goessenssoen, Wynric Geretssoen, Bernier Willemssoen, Melis Melissoen, Henric Queden ende Johan Karrel scepen in Gemert tuegen in desen opene brieve dat voer ons is coemen heer Jan Clot commenduer tot Gemert en diere tyt, ende heeft met raede syns overste des eerweerdige heer IJwaen van Cortenbach landtcommendeur inder balyen vanden Biessen ende heer te Gemert, vuytgegeven ende erffelyck verpacht Lambrecht Diercx natuerlycke soen was van Groetel, huys ende hoff dat Hadeghen Willemkens ende Johan Wolfs was hoerts neve, dat geleghen is aen die Beeck metten eenre syde beneven Johan Snyders kynder erve, dander syde beneven Willems Heynnen soens erve, ende Johans erve van Boenic, metter eenen eynde aen des heeren straet, dander eynde aen die steghe neven dat Goerswinckel, ende vuyt desen voerscreven en hoff ende erve met allen synen toebehoerten heeft Lambrecht voersz den voergenoemden commendeur gelooft sestich vaet roggen erffelycken te gelden in urber ende tot behoef des huys van Gemert. Die sal Lambrecht voersz jaerlycx gelden ende betaelen den huys van Gemert ende schuldich syn te leveren op hoeren choren sulre, metter geboeder maete van Gemert. Ende dat huys van Gemert sal Lambrecht dit voersz erve weren voer die xvi vaet erffrogge. Alle argelist altoes vuytgescheyden. In oerconde der waerheyt soe hebben wy scepen voersz onsen segel ons gemeyns scepenstoels van Gemert aen desen brief gehangen ende gegeven inden jaer ons heeren duysent vierhondert ende seventhien, op sunte Severijndach.

(f52)

Jan van Ploesterdonck met synen kynderen, nu die kynderen Maes Aertssoen Versandtvoert off van Haendelt ende Margriet Truyen van Ploesterdonck haer natuerlycke dochter, gelden tsjaers vuyt Ploesterdonck ende vuyt honnen huysse, hoeve ende erve op Ploesterdonck geleghen ende verschynt purificationis, vi vat raepsaets. Opten brief steet buyten gescreven Diederick Troestgoets.

(afschrift AKDOG 785, regest 50, dd 7-5-1368, ook van het origineel is een transcriptie beschikbaar)

Condt sy allen luyden die desen brief sullen sien off hoeren lesen dat Diederick Troestgoets vercoeft heeft ende opgedraeghen den commandeur van Gemert een malder raepsaets erffelyck, der maeten van Gemert ende Diederick vrsz heeft gheleent ende geliet den commendeur vrsz zaet erffelyck te gelden ende jaerlycx te betaelen tot onser vrouwen misse te half ogst vuyt Diedericks erffenissen voerscreven die geleghen is in Ploesterdonck neven Henric syn soens erve aen die een syde ende Johan Knoeps erve aen die ander syde ende vuyt eenen beemde is geleghen neven Ghevarts erve van der Heiden die een syde ende neven Johans erve Wouters swaeger vander Beecke die ander syde. Ende dese vrsz voerwaerde heeft Dederick geloeft ende gemaect in synen heelen bedde. Hier waeren over Gherardt Aertssoen, Willem van Scerpenberch, Willem Arnts Snyderssoen, Aert Maessoen, Ghevaert van Strybosch, Michiel Engelensoen ende Johan die Weelde als scepenen des commendeurs van Gemert ende hebben den zegel hoers scependomps van Gemert voerscreven aen desen openen brieve gehangen in getuijgenisse ende vasthiede der waarheyt. Gegheven inden jaer ons heeren duyssent driehondert achtensestich, sondachs voer sunte Servaes dach inden meye.

Dapt van Epternaeken gilt tsjaers ex novalys, iii mud rogge, Ende die drie mud rogge voerscreven betaelen die thiendeners, die die thienden pachten vanden rentmeester van myn heer van Eptenaeken.

(f52verso)

Buijten pachten, jaerpachten

Inden iersten Mierloe, daer nae die kynderen Wrens Valckeners, daer nae Gheret Michiels, nu ter tijt Mester Jan Loemerssoen (?) gilt tsaers vuyjter hoeven te Mierloe, iij mud roggen

die hoeve is geheyten Steenbeckers hoeve.

Copie vanden brief (AKDOG inv nr 859, regist 78, dd 9-6-1386)

Wij Willem van Middelschoet, Willem van Scerpenberch, Ghevert van Strijbosch, Henrick Ghevartsoen, Jan vanden Groenendael, Michiel vander Heyden, Henrick Emontsoen van Espdonck, scepen in Gemert, doen condt en ijgelycken dat broeder Robrecht van Vrienburch commendeur des huijs van Gemert, met wille ende met raede Heynrick van Leuwenberch lantcommendeur der Balyen vanden Biessen, ende met raede der heeren der Oerden des huijs van Gemert heeft verpacht Peteren Leyten soen van Mirle, die hoeve Mijerle, die den heere toehoret, den choeren was daer aff neghen jaer lanck, een ijegelyck jaer om vj mud roggen, ende om vj mud garsten, ende om iij vaet raepsaets, cusbers pachts tot pachters recht, ende die vj mud gasten ende iij vaet raepsaets sal hij betaelen tot Alre heylige misse ende te brengen alle weghe bynnen Gemert, totter heeren wulle, ende die voergenoemde vj mudde roggen sal hij leveren inder heeren huys tot Ghemert tot Onser Vrouwen Lichtmisse voerscreven pacht roggen, garst, ende zaet sal men ontfangen op den vrsz daghen, met alsulcker geborden maeten als ghenge en gene te Gemert, met alsulcken voerwaerden, off hem des voerscreven Peter niet vort en verdrughn in pacht metten heere, soe soude Peter vrsz op leste jaer vanden neghene sitten in allen lasts recht, voert heeft Peter voerscreven geloeft, desen voerscreven pacht op hem ende op allen syn goet ende op den voerscreven, den voersz heeren te betaelen, Voert sal Peter vrsz die timmeringhe houden in daecke ende in wenden op synen cost, ende daer toe doen als een goet laet

(f53)

schuldich is te doen, ende die heere voerscreven sullen hem leveren ijseren ende hout als men laeten schuldich is te leveren, Voert sal Peter vrsz alle besten te halven houden, ende vlutten, vueren, ende alle vrachten die die heeren te doen hebben, ende Peter voerscreven poet (?) ende loecke winnen, ende xxx wassende poeten setten van welcke levende houte dat hij wille op den voerscreven goede ende twe daeghen nieuwe te decken opt vrsz goede met nieuwen dake, ende sal geven xij ellen goets vlessens lakens Peter den voerscreven heeren, ende eenen hamel voer syn sende, ende Peter sal den commendeur houden noenre, als hy dat begeert, Voert heeft Peter vrsz den Oerden geloeft ende ghezekert met hande ende met monde in ede scat hout ende getrou te sijn, ende verbonden des Oerdens schaede te weren, nae allen synen besten synne, Voert waert dat saecke dat Peter in desen voerscrevenen voerwaerde ende vrsz bidenisse ergent teghen ghinge in worden off wercken, off in enigher saeken, dat men ter waerheyt mocht vinden, soe soude Peters tyt ten naesten Pinxten thoecoemende vuyt syn, Voert wert dat saeke dat Peter voerscreven ontscheecht worde dat van sinet wegen thoe quem, dat sal Peter vrsz affdoen, off wan hijs niet en doet, dat hy dan ten naesten Pinxten vuyt vaeren soude, ende worden Peter ooc onseet dat vanden heeren wegen thoe queem, dat sullen die heeren aff doen, wan sy aff connen ghedoen, ende dan sullen sy haer best thoe doen, wan sys niet aff en connen ghedoen soe sal Peter voerscreven vuyt vaeren, off hy weel acht hy mach blyven sitten op sijn avonture, Voert soe eest voerwaert dat Peter vrsz en gheen landt toelen en sal, than totter hoeven horet metten besten, die hen heeren thoe hoeren ende sy metter heeren wil. In oerconde der waerheyt soe hebben wy scepen voerscreven onsen zegel ons geneyns scependomps van Gemert aen desen brief gehangen ende ghegeven int jaer ons heeren doemen schreeff duysent driehondert tachtentich ende sesse, opten Pinxavont.

(f53v)

Cruijscot

Ghilt die hoeve Henricks van Doerren, nu mijn Joncffrou van Doerren, nu mijn heer van Doeren cum suis, ghelegen onder Baekel bij Helmont iij mud, ij vaet rogge.

(Hierna een afschrift van AKDOG inv nr 808, regest 297 dd 20-8-1451)

Alsoe voertyts discort ende gheschillen opgestaen ende geresen waeren tusschen heer Claes vander Dussen commenduer tot Gemert ter eenre ende Everit van Doerne ter andere sijden van eenen erffpacht van drie mudden ende twe vaeten roggen der maeten van Helmont die Everit voerscreven den huijse van Gemert schuldich sijn soude te gelden vuyt erffnisse gelegen inder prochien van Baekel ter stadt gheheyten die Cruysset, die den voerscreven huysse van een deel jaeren onbetaelt syn soude, soe heer Claes voerscreven seyde, ende die voerscreven heer Claes ter eenre, ende Everit ter ander sijden, hij des gheschils ghekeert hadden in Rutgher van Op (?), Goeyart van Dommelen, Goijart van Erpe, ende Floris van der Dussen, in sulcker voeghen, dat sy aen beyde sijden doen souden, des die voerscreven vier goede knaepen vander vrsz gheschille seggen souden, ende daer nae die voerscreven guede knapen ghesegget hadden, dat Everit vrsz den voerscreven huse erffelyck betaelen soude den voerscreven pacht van drie mudden ende twe vaeten roggen, ende dat Everit vrsz heer Clas voerscreven voer die afterstelle die inde tijden dat hij commendeur tot Gemert geweest heeft onbetaelt stont, soude geven vijftich keijssers gulden, soe die voerscreven vier goede knapen ons scepenen hier onder bescreven dat verclaert ende aenbracht hebben, ende die voersz heer Claes ende Everit vuijt dien sij die vrsz vuytspraeck niet gelyck verstanden en hadden malcanderen gelooft hadden op hen ende allen huer gueden dat sy sulcke verclaeren als die voerscreven vier goede knapen vuytspreken souden, vander sacken vrsz houden souden gelyck dat in scepenen brieve vanden Bosch daer aff die daet begrypt des veertheensten dages der maent van novembri int jaer ons heeren duysent vierhondert

(f54)

ende vyftich volcommelycke begrepen is, Soe syn gestaen voer ons scepenen hier onder gescreven eendrechtelycke vercleert, in deser maeten, dat Everit vrsz den voerscreven huse van Gemert voertaen erffelycken gelden ende betaelen sal den voerscreven pacht van drie mudden ende twe vaeten roggen vuytten erffnisse vrsz ende dat hy heer Claes voerscreven betaelen sal den voerscreven pacht die vijftich Byers gulden voersz, ende daer toe negenthien mudde rogge der maeten van Gemert van afterstelle die verscheenen syn vanden vrsz pacht van drie mudde ende twe vaeten rogge synt ten iersten segge der vier gueden knapen voerscreven, Getuijghe hebben hier over geweest scepenen in SHertogenbosch, Jan Bathensoen, ende Wouter Pijnappel, gegeven opten twentichsten dach der maent van Augusto, int jaer ons heeren duysent vierhondert ende een en vijftich.

(Hierna een afschrift van AKDOG inv nr 808, regest 293, dd 14-11-1450)

Wy Jan Bathensoen, Goessen Heyen, Marten Goevij, Everit vanden Water, ende Wouter Pijnappel, scepen in SHertogenbosch doen condt eenen yegelycken alsoe voertijts discort, twist ende ghescillen opgestaen ende gheresen waren tusschen heeren Claes vander Dussen, commenduer van Gemert in eenre ende Everit van Doeren ter andere syden van erfpachten die die vrsz Everit schuldich wesen soude den huysse van Gemert ende der Duytschen Oerden, des sy gebleven in goede mannen te weten in Rutger van Erp, Floris vander Dussen, Goyart van Erpe, ende Goyart van Dommelen die hoer seggen daer aff vuytgesproeken hadden, ende want die voerscreven jonckeren(?) die vuytspraeck der vrsz goeder mannen niet gelyck verstanden en hadden, Soe syn gestaen voer ons scepenen voerscreven die vrsz heer Claes ende Everit ende hebben gelooft deen den anderen op hen ende op alle hen goede die sy nu hebben ende naemaels vercryghrn sullen, dat sy houden sullen

(f54v)

alsulcke vuchten als die vrsz goede mannen verclaeren ende vuytspreken sullen vander saecken vrsz, by alsoe dat heer Claes vrsz betaelen sal Everit voersz alsulcken costen als Everit vrsz gedaen heeft inde gedinge dat die jonckeren(?) van wegen den Oerden vrsz vander selver Ordenen des hoefs van Luydick voersz, des der oerkonde hebben wy scepenen voerscreven onsen zegel aen dese letteren doen hangen, Gegeven des verthiensten dach der maent van novembri, int jaer ons heeren duysent vierhondert ende vijftich.

Katheryn Mickarts kynder, daernaer Herman Sluijters, nu Jan Heijnnen, nu Corstgen Noyen, Gilt die selve vuyt den goede te baekel gheheyten den Heylecker met huysinghe ende erfenis daer aen gelegen dat Aert Mickarts was, tsjaers iiii mud roggen

Copie vanden erffbrief (afschrift van AKDOG 812 dd 14-11-1525, met daarin een afschrift van inv nr 810, regist 328 dd 27-10-1461)

Wy Jan Hoebrechts, Aert Hannen, Lambrecht Mickarts, Thoemas Huben, Jan Peters, Mathys Noyen, Jan Verbeeck, scepen in Baekel doen condt eenen ijegelycken dat voer ons coemen is Willem Jacops Jegerssoen als rentmeester des commenduers ende huysen van Gemert ende heeft voer ons scepen getoent eenen brief met eenen vuythangende segel van heer Claes vander Dussen lantcommenduer van Bijessen mentie makende van vier mudden erfroggen, die men jaerlycx geldende is vuytten hoeven gheheyten den Cleyden Heylecker in der prochien van Baekel, Heer Claes van der Dussen landtcommenduer der Ballyen vander Biessen een hoeve tooten huijse ende der ballyen den huysen van Gemert als hy seide toebehoerende gheheyten op gheen Hylecker geleghen inde prochie van Baekel tusschen des Heylichs Geest hoeve van Helmont metter eender syde, ende tusschen erffenis

(f55)

der kynderen voermaels Zedewygen gheheyten vanden Ryppelberch metten andere syde van eenen gemeynen waeterlaet die beeck geheyten, streckende op erffnisse Jans gheheyten vander Sculen tsamen met allen synen rechten ende behorten, ghelyckerwys Mickartssoen voertyts Arnts dese voergenoemde hoeve heeft ende beset, als sy sede, heeft dan ghegeven voer eenen jaerlycken ende erffelycken pacht Jannen Mickart voerscreven vanden selven Jannen in erfelycken rechte te hebben ende te besitten voer den chijns vanden gronde, ende eenen jaerlycken ende erffelycken pacht van vier mud roggen der maeten van Helmont te leveren, geven, ende te betaelen den voergenoemden heeren Claes offte den commenduer des voergescr huys van Ghemert van Jannen voergescr alle jaer erffelycken opt hoochtyt van Onser Vrouwen Lichtmisse purificatio tot Ghemert op des voergescr huys choren solder te betaelen ende te leveren vuyten voerscr onderpandt als voerscreven is te pacht vuyt gegeven synde, ghelovende die voergenoemde heer Claes op verbintnisse allen synen Ballyen gueden dat hy Jannen vrsz vanden voerscr goede hem te pacht vuytgegeven hebbende sal doen een gerechte bequeem weringhe, ende allen anderen hynder ende coemmer inden voergenoemde synde ofte thoecoemende den voergenumden Janne altemael af te doen, Voert met dien geloefte Jan voergenumpt weder om als principael schulder te geven ende te betaelen den voersz heer Claes oofte commendeur des voergenoemden huys van Gemert den jaerlycke ende erffelycke pacht vande vier mudde roggen der maeten jaerlycken ende erffelycken opten termijn van betalinghe, ende plaetsen voergenoempt vuytten voersz pacht vuytgegeven als voerscreven is. Getueghen hier over scepen in SHertogenbosch Marcellius van Uden, ende Aert hoer soen, Ghyselbertus, den seven ende twinchsten der maent octobris int jaer ons heeren duyssent vierhondert ende eenensestich, Alsoe is nu coemen Herman die Sluijter als possessor der selver voerscreven hoeve, ende kent ende lyet, ende gelooft den selven voerscreven Willem Jegers rentmeester des heeren van Gemert, dat hy voert aen dese selve vier mud roggen inden selve onderpande voert betaelen sal vuytter selven hoeve nae inhoud

(f55v)

der voerscreven brief, nae ende nae datum ende tenure des selfs brieven, gelooft dese selve Herman op verbyntenis vander selver hoeven alsoe te betaelen, ende alle die ghene die nae hem coemen sullen, dat die verbonden sullen wesen, den selven pacht alsoe te leveren ende te betaelen nae inhoud des iersten brieffs, Sonder argelist, ende want dit altesaemen voer ons scepenen voerscreven geschiet is gelyck voerscreven staet, Doe hebben wy scepenen voersz onsen gemeynen zegel tscependomps van baekel hier beneden aen desen brief ghehangen, Int jaer ons heeren duysent vijfhondert, vyfentwintich opten vierthiensten dach novembris der maent.

Jan Peter Sluyterssoen, nu die weduwe woenende te Doeren, met dat goet leet te Baekel, modo Anneken Jan die Sluytersdochter. Ghilt tsjaers vuyt synen erve te betaelen des huysse van Ghemert viij vt rogge

Copie vanden erffbrief (afschrift van AKDOG inv nr 811 dd 1513)

Wy Ansem van Oerle, Aert Celen, Goert vanden Goer, Goert Peters, Gheret Meertens, Willem Janssoen, Jan Hoybrechs, scepen in Baekel doen condit eenen uegelycken dat voer coemmen syn, alsoe myns heeren rentmeester des commenduers van Gemert had doen beslaen Jan Peters Sluyterssoen allen syn goederen inder kercken van Baekel voer sekere afterstede pachten, van eenen erffpacht van acht vaet roggen jaerlycx, naeden welcken jairdach genoemmen heeft inder bancken van Baekel ende dat recht daer aff soe verre becoemmen istusschen aenspraeck ende antwoord, ende getuygenisse dat vonnis Jannen voerscreven tegen ghegaen is, ende mynen heer off procuratoer myns heeren der commenduer mede, naeden welcken tusschen spreken vanden schoutet van Baekel ende synnen scepen in eenen gheban, ghedynch

(f56)

ende vierschare sittende, ende veremcht hebbende den joncere(?) myns heeren den commenduer ende Jannen voerscreven, Woe dat Jan van nu voert aen betaelen sal den commenduer ende synen naecolighen ten eweghen daeghen, dese selve acht vaet roggen, gelyck hy daer af te boecke ghecommen is, ende betaelt heeft over twentich jaer, ende daer te voeren Aert die Sluyter te boeck aff stont ende syn huysvrou, gelyc dat bleeck in die vierschare voer schoutet ende scepen, tot meer sekerheyte des huys van Ghemert ende naemaels tot sekeren onderpande te commen, soe set Jan vrsz voer dees acht vaet roggen huys ende hoff geleghen inder prochien van Baekel, ontrent den dorp metten eenre syden Drees Bret.. ende metter andere syden Henrick Celen, metten eenen eynde Aert Goeben, ende ander eynde die ghemeyn straet, Item noch een stuck lants geleghen aen Ghehoft metter eenre syde Gherets van Amstel dander sy Jan Hoybrechs met meer anderen, dat een eynde die ghemeynen wech, dander eyndt die weduwe Jan Sluyters met hoeren kynderen, Bezegelt metten gemeynen zegel ons scependomps van Baekel, Ghegeven int jaer ons heeren duyssent, vyfhondert ende derthien inder maent Sporkel.

Jaerpachten Baekel

Heyn Celen, daernae Aellart Henrick Celensoen, nu Andries Gheefkens soen plach te woenen op die Kijebesbrake, modo Peter van Aldenhoeven, Ghilt tsjaers vuyt syne erve daer hy te Baekel in woent viij vt roggen

Copie van den erfbrieff (afschrift van AKDOG inv nr 827, dd 15-1-1536)

Wij Thomas Peterssoen, Jan vanden Nouwenhuys, Rutgher Wouters, Aert Maes Aertssoen, Marcelis Janssoen, Peter Janssn ende Aert Joesten, scepen in Gemert tueghen in desen openen brieve dat voer ons

(f56v)

is commen Aellart Henrick Ceelen soen ende heeft gelooft als schulder principael op hem ende op allen syn goet nu ter tyt hebbende ofte naemaels vercrigende dat hy geven sal ende betaelen Willemen Jacop Jegerssoen rentmeester des huys van Gemert seventhien dalven rynsgl, twentich stu stuck, tot drie terminen te weten die ierste termyn van sestalven rynsgulden nu te Paeschen toecoemende, ende die ander termyn nu Sunte Jacopsmisse thoecoemende ooc sestalven rynsgulden, ende die leste termyn van nu lichtmisse toecoemende over een jaer, welcke sesthiendalven rynsgl syn van acht mudden roggen ende drie vaet roggen tachter staende van elff jaeren, des jaers negen vaet erfroggen, Welcke negen vaet erfroggen die voerscreven Aellart kendt ende lydt alle jaer den huysse van Gemert te vergelden erffelycken ende alle jaer te betaelen op onser liever vrouwen lichtmisse dach van ende vuyt synen huysse hoff ende erfenisse ghelegen bynnen die prochien van Baekel op Hoech Baekel aldaer beneven erfenisse Jan Thijs die een syde, die ander syde neven dat Hooch Waterlaet ende voert die ghemeynt aldaer eest als sy sede.

Voert alsoe heeft Aellart verscreven helmelinghe vertegen op desen nege vaeten erfroggen pachs voerscreven tot behoefs des huys van Gemert voerscr , geloevende voert Aellart vrsz als sculder principael op hem ende op allen syn goet, hebbende off vercrigende dit kunnen, lyden, toeseggen ende vertyen voerscreven eewelyck vast ende stedig te houden, sonder wederseggen, ende dir onderpandt vrsz altyt goet ende wael doegende te maken als voer desen negen vaet erfroggen pachs vrsz, ende te vrijen, ende te weren, als men erfrogge schuldich is te weren, Sonder argelist bezegelt metten onsen gemeynen zegel ons scephendoms voerscreven, ghegeven int jaer ons heeren duysent vijfhondert, ses ende dertich, den vijfthienden dach januarij.

(f57)

Hoe die Duytsche heeren syn coemmen aen die thiende van Milheze onder Baekel.

(Hierna volgt een afschrift van AKDOG inv nr 865, regest 23, dd 17-9-1334)

Wij Jan vanden Broeke ende Herman die Pesser, scepen van Sunte Oden Roij doen condt hen allen die desen letteren sullen sien off hoeren lesen, dat voer ons sijn commen Mathys vanden Broeke, Wouter syn broeder, Henrick Mathyssoen voerscreven hebben gheloevet op hen ende op hen goet, gesamender handt ongescheyden ende een yegelyck voer al eenen Ersamen man heer Jan vander Voeren commenduer van Gemert tot behoeff des goetshuys van Gemert vanden coepe die hy gedaen heeft tegen heer Jannen van Scepstal als van der thienden van Milheze met hoeren thoebehoerten alsoe verre alst heer Jans was ende hy se vercoeft het vaen aff alle naescap ende alle voercoemmer aff te doene gegherecht werschap gelycke als men erve schuldich is te weren te jaere ende te daghe te doen tegen alle die te rechte willen commen off sullen. Besegelt met onsen segelen in dien jaere ons heere als men scrivet duyssent driehondert dertich ende vijer op sunte Lambrechts dach bisschop.

Op Grootel onder Baekel ghelegen ghilt men den huysse van Gemert tsjaers ij mud rogge

Wy en kunnen daer egheen brieven aff vinden, mer wy vinden vredelyck possessie van vyftich jaeren vuytten registers dat noit weygeringhe gedaen en is, te weten vuyt Jannes Vermoelens register ende noch van Willem Jegers register, die alle beyde langen tyt rentmeesters geweest hebben ende nu ick Joannes Henrici ende noit weygheringe gedaen en is geweest. Gelden dese persoenen hier nae bescreven.

(f57v)

Katheryn vander Asdonck, daer nae die kynderen, nu ter tyt Jan Roeverssn, nu Thonis Geret Lucassoen

ghilt van de twe mud roggen voerscreven xvj vt rogge

ende is geleghen op Grotel onder Baekel.

Cornelis van Grotel, daer nae Ghysbrecht over brugghe, ghilt vande twe mud voersz tsjaers, nu Peter Gerets, modo die weduwe Frans die Wilt iij vt rogge

Marten Berckers, daer nae Heyn Aert Belyen, nu Marten Berckers woenende te Vlierden onder Doernen op een Byndersche hoeve, nu Jan die Cuester ghilt tsjaers vande twe mud rogge vrsz iij vt roggen

Tgoet te Vesten onder Baekel ghelegen tsjaers x vt rogge

Daer en vinden wy ooc egheen brieven aff, anders dan die registers, wael van vyftich jaeren, dat dat huys van gemert goede vredelycke possessie heeft gehad. Gelden dese persoenen hier nae bescreven.

Inden iersten Noij Corstghen Maes, nu die kynderen vrsz gelden van de x vt roggen vrsz tsjaers nu Jan Thijs xj vt ende twe derdendeel van eenen vaet.

Melken die Snijder, daer nae Lijbrecht van Plees, daer nae die kynderen Lybrecht van Plees, nu Hilleken van Amstel, modo Willem Schaeten iij vt ende een derendeel van eenen vaet rogge.

(f58)

Boekel

Gheret Jacops, nu syn kynderen, gelden tsjaers een Bosch malder rogge, ende negen vaet rogge Boscher maeten ende wy en hebben daer egheen brieven aff, mer wy hebben registers van Huben den rentmeester ende Jannissen Vermoelen ende Willem Jegers, wael van sestich jaeren ende meer vredelycke possessie af als blyckt metten registers.

In de kantlijn:

Opt register der heeren scepen van gemert de anno 1591 den 27e fb syn desen aengaende sekere schep. ende deel brieffen registreert.

Symon die Snijder, alias van Erp ghilt tsjaers vij Bosch vaet rogge ende is ooc vredelycke possessie aff als voer tsaemen iij Bosch malder rogge.

Donckersfoert

Inden iersten Jan die Cuijper, daer nae Franciskan syn swaeger, nu Franciskens huysvrou, nu Jan Sissen ghilt tsjaers van Jannen den Cuypers wegen haeren broeder, die Jan vrsz syn goet overghegeven heeft ij mud roggen

Wy en hebben daer egheen scepen brieven af nisi registerum ende het is wael geweest bij die vijftich jaeren vredelycke possessie, datter noit weygeren aff gedaen en is geweest, noch nu ter tyt oeck.

(f58v)

Thienden bynnen Gemert

Inden iersten die thienden in Goerswinckel ende dat haer pachter Joannes Henrici, nu syn huysvrouw ghilt tsjaers xv mud roggem

Item noch xxxix st alle jaer tot hantgelt.

Die thiende aen die Heij, pechters Dierck Dierckssoen van Gemert, ende die weduwe Henricks van Gemert, nu Peter die Glaesmeeker, ende Barbara Valcx xviiiij mud roggem ende xxxvii st hantgelts

Die helft heeft Dierck van Gemert, nu Peter Ariaens alias Glaesmeeker beloept hem viiii mud ende iii vt roggem ende dat hantgelt xviiiij st.

Item die ander helft heeft die weduwe Henricks van Gemert, nu Barbara Valcx stjaers voer viiii mud ende iii vt roggem ende xviiiij st handtgelts

Die hoeve Jans van Nouwenhuys, nu syn kynderen Peter van Nouwenhuys ghelegen aen die Heij ghilt die thiendt daer aff ii mud roggem ende v st. handtgelts.

(f59)

Buijten thienden

Item die thiende van Doeren gilt tsjaers lxx mud roggen. Pechter der thiende van Doeren Thoenis Rutten, nu Rut Jan Rutten, Item noch die smaelyhienden gelden tsjaers xviii gl.

Item van de xviii gl voersz boert die vicarius van Baekel ende Doeren tsjaers viiii gl.

Compt myn heer alle jaer van den smaelthiende viiii gl.

Item dese lxx mud roggen voerscreven doet mijn heer haelen mette laeten ende synen waegen tot mijns heeren cost snoenents te Doeren, ende die pechter voersz reket mynen heer ende verleget mynen heer, ende myn heer cortet hem, ende savons wanneer die laeten boeven comen soe geeft myn heer hoer den cost mette peerden.

Onder Baekel

Item noch een cleyn thienghen onder Baekel, geheyten op Sciepstal, pechter Jan Reijnerssoen, nu Joest van den Sandt woenende te Baekel ghilt tsjaers iij mud roggen

Item noch een cleyn tienghen oeck onder Baekel gelegen heyt ooc Sciepstal, pechter Peter Willem Hoeffnaegelssn custer tot Baekel, nu Jan Reijnerssn gilt tsjaers iii mud roggen.

(f59v)

Thiende van Vlierden

Item noch heeft dat huys van Gemert vuytter thiende van Vlierden, onder Doeren gelegen, geheyten Vlierden, ende heyt die thiende van Floderacken, plegen te boeren die kempts luyden, daer nae Frans Paueter, nu Lemmen Rutten die hevetsche ghecoeft, gelden die thienderers tsjaers mynen heer vuytter selver thienden xvij vt roggen.

Pechters Lemmen Rutten die heeftsche gecoeft woenende tot Helmont, ende Goert Snabben woenende te Doeren, nu Goert Tonkens ende Frans Lenartssoen Verhoeven.

Vlierden

Item noch hevet huys van Gemert vuytter thienden van Vlierden ghelegen onder Doeren, ende heyt oock die thioende van Floderacken, hoert die erfgen. Henricks van Deventer xvij vt roggen

Pechters Enx Jegers woenende op myns heeren hoeve bynnen Gemert op Melschot, ende syn swaeger woenende op Scepstal, nu Thomas Mathyssoen, ende Lenardt vande Sandt.

Item noch ghilt men den huys van gemert tsjaers vuytter thienden op Brouhuys xv st.

ende die die thienden pachten moeten die xv stuv. betaelen tsjaers.

Nistelraij

Item die thiende van Nistelre behoeren den Duytschen heeren thoe te Gemert, ende gelden dat een jaer meer ende min dan ander, ende werden verpacht metten boert ende licht, ende steet ewelyck acht daeghen tot hoechsel ende daer werden verpacht vier coeten. Inden iersten die velthiende die is die meeste, ende daer staet op

(f60)

xii peter, elcken peter gerekent xviii st. tot lijcop.

Item noch eenen coet gheheyten den overloep, daer staen op te lycop, drie gouwen peters, elcken peter gerekent xviii st.

Item den derden coet heyt die hoeven, daer staen op te lycop drie gouwen peters elcken peter xviii st.

Ende den vierden coet heyt Vorstenbosch. Daer staen op te lycop drie gouwen peters elcken peter xviii st.

Vuyt deser thienden voersz gilt dat huys van Gemert tsjaers den pastoir tot Nistelre xiii mud rogge.

Item men en plach den pastoir niet meer te geven dan x mud roggen, maer myn heer saliger heer Wynant van Breyel hevet den pastoir tsjaers verbetert drie mud roggen. Item noch ghilt men vuytter thienden van Nistelre tsjaers den Heyligen Geest te Bosch, ende den kuysten buyden ten Bosch tsjaers xi mud roggen.

Item noch ghilt men tsjaers vuytter thienden van Nistelre der kercken iii malder roggen, al Bosch maet.

Item noch ghilt men vuytter thienden van Nistelre tsjaers den custer tot Nistelre voer wyn ende misbroet i mud roggen.

Item noch ghilt men vuytter thienden van Nistelre tsjaers pro plac.. absen.. xxj gl eenen halven stuyver min.

Item in archidiaconatu xi gl, xiii st, i oert

In sigillo viii gl, xvi st, i oert

Ende dat moet mijn heer bestellen op synen coest te Loeven, ende waert hoff ghelegen is, ende moet ewelyck anno Egidii soevens betaelt syn, off het dupliceert altyt.

Item noch ghilt men tsjaers vuytter thienden van Nistelre obsoninum et cathedratium ende wort ewelyck betaelt totten Grave by den lantdeeken of synen gedeputeerden ante co..versconis Pauli voer die noennen of het dupliceert. ende commen grote kosten op, ende moet ewelyck betaelt syn co..versconis Pauli voer den noenen.

Ende wanneer dat is annis bisextil.. ende dat ander jaer daer nae, dan en gheeft men nimmermeer obsoninum off cathedratium. Mer plac.. absen.. moet ewelyck betaelt syn Egidii voer die noennen.

Item noch gheeft myn heer vuytter thienden van Nistelre, den naebuere eenen maelyt, wanneer die thienden verpacht werden vuyt elcken huijse twe menschen den cost, off myn heer, off syn dienders moeten accorderen met hoer luyden. ...

(f61)

Item noch heeft myn heer te Nistelre die lamerthiende ende dat een jaer ghilt sy meer, dan ander jaer, daer nae dat die scapen goet syn.

Item heer Mathys pastoer tot Nistelre xii gulden moet mijn heer ooc betaelen.

Baekel ende Doeren

Item die kerck van Baekel ende Doeren est integra ecclesia, ende en gheeft niet plac.. absen... , mer moet ewelyck betaelen obsonium et cathedraticum, ende wort betaelt tot Eyndoven ewelyck anno co..versionis Pauli snoenens off het dupliceert, ende dat moet myn heer ooc betaelen.

Item noch betaelt myn heer van Baekel ende Doeren den Abdt van Epternaeken tsjaers semper illo die Fransisci vier gulden current ende xiiii st, ende plach ooc ewelyck te betaelen een pont was, mer nu in ses off soeven jaeren te leen, en is niet ghegeven. Ende die commenduer van Gemert moet betaelen ende ontfangen het leen van den Abdt van Epternaeken wanneer die commenduer sterff, of die opt leen steet, nu ter tyt steet daer op die scheffener.

Thienden tot Haeren inde Graefschap Megen

Item die thienden van Haeren behoeren ooc den Duytschen heeren off den huysen van Gemert toe.

Item die thiende van Haeren ghelden tsjaers lxx gl current, elcken gulden twentich stueffer.

Item noch i mud terwen

Item noch i mud erweyten

Item noch iii mud haeveren al Bosch maet

Item voer dat mud terwen vrsz gheeft myn heer hoer wederom, wanneer sy betaelen i mud rogge.

Item de thiende van Haeren hebben gepacht dat cloesterken bynnen Haeren geleghen Jan Zyberts ende Rut syn broeder.

Item die smaelthienden heeft myn heer ooc ende plegen te gelden tsjaers iiiij gl, ende die vier gulden ende eenen halven gl boerden die thieneners, ende des moesten die thieneners den naebuere te vreden stellen van den maeltyt tsjaers.

(f61)

Item nu willen sy den maelyt hebben alle jaer, die naebuere, off sy en willen niet te vreden syn, ende dien maelyt steet den thiedenaers wael tsjaers op xiiii of xv gl, ende die betaelen die thiendenaers, ende gheven hoer den maelyt voer die vyfdalven gl vrsz die myn heer plach te boeren van der smaelder thiende ende plach absen., obsonium, cathedratium wordt betaelt met Nistelre, quia est nisi quarta capella.

Haever Rendt

Rent der haeveren inden iersten Jan van Schuyl, daer nae Peter van Schuyl syn soen, ende Jan Jacobs syn swager gelden tsjaers vuytter Leuecker vij mud haeveren

Copie vanden erfbrieff (afschrift van AKDOG 747, regest 169, dd 25-7-1413)

Wy Korstiaen vanden Mortel, Dierck vanden Bleeck, Ansem Goessenssoen, Wynric Geretssn, Geret Fyensoen, Henrick Queden ende Johan Karrel, scepen in Gemert, tueghen in desen opene brieve dat voer ons is coemen heer Jan Clot commenduer tot Gemert tot diere tyt, heeft verpacht erffelycken met syns oversten wille heer Ywaen van Cortenbach landtcommenduer der Balyen vanden Biessen een overste des huys van Gemert ende des dorps ende met raede der brueders des huys van

(f61v)

Gemert eenen goeden sekeren man Aert gheheyten van Middelschote, die Aert Ghiebensoens soen was van Baekel eenen ecker landts heyt die Leuecker met synen toebehoerten die ghelegen is metten eenre syden beneven die straet, die gheet ter Wedereycken waert, ende met eenen graef van vyf voeten wyt beneven die voerscreven straet ende teynde beneven Willem Heynsoens erve ende Dierck erve van Gemert al tot dien weghe thoe die gheet van der Vroyende ter moelen waert ende voert van dijen weghe wederomme beneven Gherets kynder erve van der Vondervoert al totten weche thoe by der Wedereycke ende vuyt desen voerscreven erve heet Aert voersz den voergenoemden commenduer gheloeft in orber ende tot behoef des huys van Gemert soeven mud haeveren erffelycken te ghelden ende jaerlycx te betaelen, altoes op onser vrouwen lichtmisse dach ende te leveren metter ghebeder maeten van Ghemert bynnen hoere woeninghe te Gemert opten choeren sulre. Ende den Orden ende dat huys van Gemert off die dat bewaeren sullen Aert voerscreven off syns erfgenaemen dat erve weren erffelycken als voer die voerscreven soeven mud haeveren ende Aert vrsz heet den huys van Gemert die soeven mud haeveren voersz veronderpandt met eenen erff mud rogs in eenre erffnisse heit die Vossenberch deen helft daer aff dat ghelegen is aen ghenen Mortel metter eenre syden neven des heeren straet dander syde beneven Johan Steechmans erve ende Korstiaens erve van de Mortel ende Maes syns swaegers dander eynde neven Willems erve van der Loet(?) ende die voerscreven erve heet Aert voerscreven den Orden vrsz gheloeft te weren voer dat erff mud roggen ende daer thoe goet ende wael doegende te maeken op hem ende syn goet. In orconde der waerheyt soe hebben wy scepen voerscreven onsen zegel ons gemeyns scepenstoels van Gemert aen desen brief ghehangen ende ghegeven inden jaer ons heeren duysent vierhoondert ende derthien op sunte Jacops dach.

Vuytten Strepen in die Haghe ghelegen vuytghegeven by Eynattens tyden gelden dese persoenen hie nae bescreven

Inden iersten

(f62)

Wouter Joerdens, nu syn kynder gelden tsjaers vutten Strepen in die Haghe ghelegen
iiij mud haeveren

Rut Wouters van Gerwen, nu syn huysvrou of syn kynder, nu Jan Thys Gyessen oeck
in die Haghe ghelegen iiij mud haeveren

Hylleken Kaelis, nu haer kynder ghilt tsjaers vuyt hoeren huys, hoeve ende landt in
die Haghe ghelegen v mud haeveren

Copie vanden erffbrief van acht mud haeveren ende iiij mud haeveren ende syn twe
brieven aen een ghevest ende transfix

(Hierna volgen twee afschriften. Het eerste van AKDOG 742, regest 128, dd 10-5-
1407; in het afschrift is de datum foutief weergegeven; van het origineel is ook een
transcriptie beschikbaar)

Wy Korstiaen van den Mortel, Dierck vanden Bleeck, Ansem Goessenssn, Wynric
Geretssn, Geret Fyen soen, Henrick Queden ende Johan Karrel scep en in Gemert
tueghen in desen openen brieve dat voer ons is commen heer Jan Clot commenduer
tot Gemert in diere tyt, heeft vuytgeheven ende erfelyck verpacht met raede ende
met wille syns overste des Eerweerdighen heer Reynarts van Husen
lantcoemmenduer der Ballyen vanden Biessen ende een overste des huys van
Gemert ende met raede der broederen des huys voerscreven eenen goeden sekeren
man Henrick Wolf wyl en eer was Gheret Wolfssn een erffenisse is gheheyten
Kempken, bede lande ende bempde ende metten voerscreven steghe die ghelegen is
metten eenre eynde aen des heeren straete ende metten anderen eynde aen dat
voerghenoemde erve, dat Heyn gheerffpacht heeft, welck erve vrsz ghelegen is, after
neven Heynen Wolfs hoff, alsoe voert beneven Marien dochter erve ende Martyn
Eyckmans erve, alsoe wederom beneven der heeren Groeten Bempt, met eenen
grave vyf voeten wyt, buyten den wal vanden grave beneven dyen voergen beempt al
totten eynde thoe vanden auwen bempt des Ordens was erve voerscreven, ende van
daer alsoe wederomme des Oerdens erve dat men heyt Maesbempt, ende metten
halven waeterganck

(f62v)

dien holen grave, die leet tusschen desen voerscreven bempt ende Heynen erve, dat hy gepacht heeft totter steghe thoe, alsoe wederomme neven die steghe al totter voerscreven steghen thoe, die Henrick vrsz met desen erve gepacht heeft totter steghen thoe ende over die vuytterste steghe behoeret denden Oerden ende dat huys van Gemert eenen erffwech te vaeren ende te drijven ende hoer erve dat daer after ghelegen is, Maesbempt geheyten voerscreven, daer over te ghebruijcken sy off die ghene die dat voerscreven erve hantplichten off erfpachten. Ende Heyn voerscreven heeft dit vrsz erve gheerffpacht tijnde vrij te hebben, want den Oerden ende dat huys van Gemert, dit lant selve ghebout hebben van horsten ende van bempden, ende vuijt desen voerghenoemden erve of gelyck als ghelegen is bynnen synen paelsteden, ende met allen synen thoebehoerten heeft Henrick voersz gheloeft den voergenoemden commenduer in orber ende tot behoeff des huys van Gemert erffelycken te ghelden acht mud haeveren des jaers, ende die te betaelen jaerlycx altoes op onser vrouwen lichtmisdach, ende die haver Henrick schuldich te brenghen ende te leveren, metter gheboeder maten van Gemert bynnen der heeren woninghe te Gemert op hoeren sulre die Henrick daer gewijst sal worden vanden ghenen die dat huys van Gemert bevoelen is, off bevoelen sal werden, off van hoeren boden, ende die Orden voerscreven sal Heynricken voerscreven dat erve weren thiende vrij, ende houtwasch datter opsteet off wassen sal. In oerconde der waerheyt soe hebben wy scepen voerscreven onsen zegel ons gemeyns scependomps van Gemert aen desen openen brief ghehangen ende ghegeven inden jaer ons heeren duysent vierhondert ende seventhien daghen in die mej.

(Dan volgt een afschrift van AKDOG 742, regest 172 dd 12-7-1414; van het origineel is ook een transcriptie beschikbaar)

Wij Korstiaen vanden Mortel, Dierck vanden Bleeck, Ansem Goessenssoen, Wynric Geretssoen, Geret Fyen soen, Henrick Queden ende Johan Karrel scepen in Gemert tueghen in desen openen brieve dat voer ons is commen heer Dierck van Betgenhuijsen commenduer tot Gemert in diere tyt, heeft vuytgegeven ende erffelyck verpacht met raede syns oversten des Eerweerdighen heeren Ywaen van Cortenbach landtcommenduer der Balyen

(f63)

vanden Biessen ende een overste des huys van Gemert eenen goeden sekeren man Henrick Wolf wylen eer Gherit Wolfs soen was eenen plack beempts die in Maesbempt ghelegen is, gelyck als hy Leynen voerscreven daer ghelevert is ende ghemeten is voer anderhalven boenre ende een half zylle ende Heyn begraven heeft bynnen syne paelsteden metten twe syden, ende metten eenen eynde is die vrsz plack beempts ghelegen beneven des Ordens erve voerscreven, dander eynde is ghelegen beneven Heynen Wolfs erve vrsz ende beneven den auden beempt, behoeret Heynen voersz dat hoel vanden grave thoe, ende vuyt desen voerscreven plack beempts heet Henrick voerscreven gheloeft den voergenoemden commenduer vierdehalf mud haeveren tsjaers erffelycken tot behoeff des huys van Gemert ende die sal Henrick vrsz jaerlycx betaelen altoes tot onser vrouwen lichtmisdach purifivatio ende schuldich syn te leveren hy ende syn naewcolinghen bynnen der heeren woeninghe te Gemert opten sulre die men hem daer wysen sal vanden gheenen die dat vrsz huys te Gemert bevoelen is off bevoelen sal worden of van hoeren dienderen ende dat orden sullen Heynricken voerscreven dat erve weren voer die vierdehalff mud haeveren vrsz ende alle hout dat sal Heyn verden tot synnen orbaer. In oerconde der waerheyt soe hebben wy scepen voerscreven onsen zegel ons gemeyns scepenstoels van Gemert aen desen brieff ghehangen ende ghegeven inden jaer ons heeren duyssent vierhondert ende verthien op sunten Margrieten avont.

Op ten brieff steet buijten gescreven Goessen Wolfs, Aengaende dat Kempken van viij mud haeveren, nu Wolfs Strepen gheheyten van iiij mud haeveren inden brief begrepen by desen in gevest synde.

Moelenbroeck

Ghilt Claes Melkenssn vanden Wau tsjaers voer die helft vanden Moelenbroeck van Meelken syns vaders wegghen ende van Schoen Aerts wegghen vuytten Moelenbroeck ende Hilleken synder suster dochter, die ander helft van wegghen der persoenen voerscreven coemmende v mud haeveren.

(f63v)

Ghelden dese persoenen hier nae bescreven. Inden iersten Dierck van Gemert, daer nae syn kynder, nu Willem Diercks van Gemert soen ghilt tsjaers vanden vyf mudden haeveren voersz iij mud haeveren

Claes Meelkens, nu Melis syn soen, nu die kynder Hilleken Quedens ghilt van den vyf mudden voerscreven tsjaers iij mud haeveren

Opten brief steet buyten ghescreven Aelbrecht Hyllen soen v mud haeveren, Aengaende een erff gheheyten dat Haendelsche Moelenbroeck

Copie van den erffbrief (afschrift van AKDOG 666, regist 170, dd 24-8-1413)

Wy Korstiaen vanden Mortel, Dierck vanden Bleeck, Ansem Goessenssoen, Wynric Gheretssoen, Gheret Fyen soen, Henrick Queden ende Johan Karrel scepen in Gemert thuegen in desen opene brieve dat voer ons is commen heer Jan Clots commenduer tot Gemert in diere tijt, ende heeft vuytghegeven ende erffelyck verpacht met rade syns oversten den Eerweerdighen heer IJwaen van Cortenbach landtcommenduer vanden Balyen vanden Bijessen ende een overste des huys van Gemert eenen goeden zekeren man Aelbrecht Timmerman Hyllen soen was vanden Boegart een erffnisse dat heer Dierck van Betgenhuijsen hadde doen maken tot eckerlande, welck erffnisse die ghelegen is tot eender steede heyt in dat Haendelsche Moelenbroeck, metter eenre syden ende metten eenen eynde beneven des Ordens erve voerscreven dander eijnde aen Willem Heynen soens erve ende metter ander syden beneven Willems kynder erve vander Woude, Jacop Michielssoens erve, Aelbrechts erve voerscreven, Maes Scrivers erve, Michiel Engelensoens erve was, ende dit voerscreven erve heet Aelbrecht gepacht erffelycken, thiende vrij te hebben voer vijf mud haeveren des jaers te betaelen altoes op onser vrouwen lichtmisdach purificatio, metter gheboeder maete van Gemert te leveren bynen der heeren woeninghe te Gemert opten choeren sulre, Ende heer Jan Clot voerscreven als commenduer tot diere tyt

(f64)

heet Aelbrecht voersz gheloeft dit vrsz erve te weren vryen van enigher choerenthiende saer aff te geven erffelycken, Aelbrecht noch syn erffgenaeme vanden orden voerscreven, Ende Aelbrecht vrsz heet den huysse van Gemert tot eenen erffelycken onderpandt geset omme te sekere te weesen, in vijf erffmud haeveren voersz syn erve op die heyde ghelegen metten eenen eynde aen des Ordens erve was, dander eynde aen dien Campe die Everet Stoelwrijters was, metter eenre syden beneven Jacop Michiels soens erve, dander syde is ghelegen beneven Lemmen Poeijtvens erve was, ende dat onderpandt heet Aelbrecht vrsz gheloeft den huysse van gemert te weren op hem ende op syn goet als men onderpanden schuldich is te weren, ende allen voercommer aff te doen, uutghescheyden des heeren chyns vanden gronde en een erffmalder rogs, dat Aelbrecht vuyt desen voerscreven onderpande schuldich is te gelden Peter Claessoen, Alle argelist altoes vuytghescheyden. In oirconde der waerheyt soe hebben wy scepen voerscreven onsen zegel ons scepenstoels van Gemert aen desen briefff ghehangen ende ghegeven inden jaer ons heeren duysent vierhondert ende derthien op sunte Bartholomeus dach.

Noyen kynderen vanden Goer

Gheelden die selver vuytten erven daer Noe vanden Goer in bestorven is, te weten eenen ecker landts, die coemmen is van der hoeven te Scherpenberch ghelegen bij Boecout op die Alde straet met beyden syden iij mud haeveren

Item opten briefff steet boeven gescreven Peter Claessn, den erffbrief boeven gescreven fol. 28.

Gelden die vyf kynderen Noe van den Goer van den selven iij mud haeveren, ij mud haeveren, ende dat ander mud haeveren gelden Jan ende Jacop Jegers ende Jacop Goessens dochter elck j mud haeveren

Hier nae volgende bescreven salmen vinden elck besonder.

(f64v)

Lamgs neven des heeren straeten metten eenen eynde aen Peter Claessoens erve, modo die erfgenaemen, Ansem Peters hoff, metten anderen eijnde neven eenen acker thoebehoerende totten hoeven te Gruenendael, sc..dun tenorem litterarum boeven gescreven inden erffbrieff fol. 28.

Vyff kynderen Noe vanden Goer

Item gelden die selve kynder metten erfgenaemen Ansem Peters mede metten synnen vuytten selven ecker tsjaers xxvi vaet roggen

Daer thoe die erfgenaemen Ansem Peters iij mud haeveren

her by der hoeven ter Ynden al boeven gescreven byden erf brief, fol 14 verso.

Die vyf kynderen Noe vanden Goer gelden tsjaers van de iij mud haeveren vrsz nu syn erfgenaemen ij mud haeveren

Inden iersten Henrick Slaets gilt tsjaers van de ij mud haveren, nu syn erfgenaemen iij vt haveren

Teuwen Denis, nu die erfgenaemen Teuwen Denis gelden tsjaers van de iij mud haveren voersz iij vt haveren

Lyn Noyen, nu die erfgenaemen Lyn Noiien, gelden van de iij mud haveren voerscreven iij vt haveren

Peterken Noyen, nu syn erfgenaemen, Peter Goessens ghilt van de iij mud voerscreven iij vt haveren

Jan die Jeger, daer nae die erfgenaemen, nu Enx Jegers myns heeren wyn ghilt van de iij mud haveren vrsz van wegen Noyen kynderen vanden Goer tsjaers j mud haveren

Jacop Goessens, daer nae syn dochter, nu die erfgenaemen Jacop Goessens, nu Willem Ansem Peterssoen gilt van de iij mud haveren voersz tsjaers j mud haveren

(f65)

Ende wordt bet. nu ter tyt doer Rutken Verhofstadt

Willem Ansems swaeger, nu doer syn kyndere, ende steet getekentby der hoeven ter Ynden, fol 15 verso, art. ultimo

Die erffgenaemen Dierck Emonts ende Henrick Mickarts gelden tsjaers den heeren j mud haveren

Gescreven bij hoven rog pacht, ende den erffbreif daer bij gescreven van eenen mud roggen ende j mud haveren, fol. 43

Jan ende Alart Roeloff Gerets kynderen, daer nae Alart, nu ter tyt Jan Maessoen vander Zantvoert cum suis gelden tsjaers xvij vt haveren

Copie van den erfbrief. (afschrift van AKDOG inv nr 675, regist 177, dd 1-8-1416)

Wy Dierck vanden Bleeck, Ansem Goessenssoen, Bernier Willemsn, Melis Melissn, Wynric Geretssn, Henrick Queden ende Johan Karrel scepen in Gemert tueghen in desen opene brieve dat voer ons is commen heer Jan Clot commenduer tot Gemert tot diere tyt, ende heeft vuytghegeven ende erffelycken verpacht met rade syns oversten den Eerweerdighen heer Ywaen van Cortenbach lantcommenduer der balyen van den Byessen ende heer des dorps van gemert ende met rade der brueder des huys vrsz eenen goeden sekeren man Gheret Ruelkenssoen eenen buenre beempts die ghelegen tot eenre steet heyt in Maesbeempt metten eenre eynde aen Gerets erve vrsz, dander eynde aender heeren erve van Gemert, metter eenre syden beneven Dierck Timmermans erve, dander syde beneven Emonts ende Hueben erve Emonts soenen, ende vuyt desen voersz erve heet Geret voersz gheloeft voer hem ende syn naecomelinghe den voergenoemden commenduer tot behoef des huys van Gemert soeven thien loepen haveren ende die heeft Geret geloeft erffelycken te gelden ende jaerlycx te betaelen altoes op onser vrouwen lichtmisdach purificatio, ende te leveren metter gheboeder maten van Gemart, op des huys choeren sulre, Ende dat huijs

(f65v)

van Gemert vrsz sal Geret ende synen naecomelinghen dit voergenoemden erve weren erffelycken voer die soeventhein vaet haveren tsjaers, Alle argelist altoes vuytghescheyden. In oirconde der waarheyt soe hebben wy scepen voerscreven onsen zegel ons gemeyns scepenstoels van Gemert aen desen brief ghehangen ende ghegeven inden jaer ons heeren duyssent vierhondert ende sesthien, op sunte Peters dach ad vincula.

Op ten brief steet boeven gescreven Geret Ruelkens xvii vt haveren.

Gherit Ruelkens, daer nae Margriet syn huysvrouw, daer nae Willem Ansems mette erfgenaemen gelden tsjaers vuyt Gerets gueden voersz, te weten vuyt eenen eusel theyden hoer erve ghelegen xx vt haveren

Steet boeven op ten brief gescreven van der xx vt haveren aengaende diere tyt, den commenduer van Gemert.

Copie van den erfbrief (afschrift van AKDOG inv nr 675, regest 178, dd 1-8-1416)

Wij Dierck vanden Bleeck, Ansem Goessenssoen, Bernier Willemssoen, Melis Melissoen van der Hofstadt, Wynric Gheretssn, Henrick Queden ende Johan Karrel, scepen in Gemert tueghen in desen opene brieve, dat voer ons is commen heer Jan Clot commenduer tot Gemert tot diere tyt, ende heeft vuytghegeven ende erffelycken verpacht met rade syns overste den eerwerdeghen heer IJwaen van Cortenbach, lantcommenduer der balyen van den Byessen ende een heer des dorps van Gemert, ende met rade der brueders des huys van Gemert voerscreven, Eenen goeden sekeren man Dierck Timmerman die men heit van Borlare eenen buenre beempts ghelegen tot eenre stede heyt in Maesbeempt metten eenen eynde aen Dierx erve voersz alsoe voert beneven des ordens erve deen syde ende metten eenen eynde, dander syde beneven Gerit Ruelkenssoens erve, ende vuyt desen vrsz erve heet Dierck voerscreven gheloeft voer hem ende voer syn erfgenaemen den voergenoemden commenduer tot behoef des huys van Gemert twentich loepen haveren ende die heet Dierck gheloeft erffelycken te betaelen den huysse van Gemert ende alle jaer te leveren op onser vrouwen lichtmisdach purificatio op des huys choeren

(f66)

sulre te Gemert, metter gheboeder maeten ende dat huys van Gemert sal Diercken vrsz dit erve weren erffelycken, als voer die twentich loepen haveren. Alle argelist altoes vuytghescheyden. In oirconde der waerheyt soe hebben wy scepen voerscreven onsen zegel ons gemeyns scepenstoels van Gemert aen desen brief ghehangen ende ghegeven inden jaer ons heeren duysent vierhondert ende seshien op sunte Peters dach ad vincula.

Commenduer heer Matteliaen van Eynatten ghecoeft huijs ende hoff op die Aa ghelegen.

Wy Jan Voederarts, Joost die Smet, Ansem Boenenberch, Eymbrecht Michelssn, Henrick Wolff, Henrick Janssoen ende Geret Roelofssn scepen in Gemert doen condt een ijegelycken dat voer ons commen syn, Wynric soen Jan Goessens, Heylwich ende Katelyn ghesusteren met horen gecoren momber, die haer ghegeven was van den heer, met vonnisse der scepenen als gewoonlyck is, wittighe kynder Jan Goessens voerscreven, die hy ghewonnen ende vercregen hadde by wylner Lysbetten synder wittiger huysvrouwe, dat een natuerlycke dochter was wylner Ansem Heynenssn, mede ghelovende die vrsz voer Gertruyt hoen suster ende hebben ghesamender handt erffelycken opghedragen ende overgegeven Jannen Goessenssn honnen wittighen vader alle alsulcke ghedeelte, als hoer aen verstorven maech syn, of in scepene brieven hoer gemaect mach wesen, van eenen huijs ende hoff daer aen ghelegen in Gemert ter stede gheheyten op die Aa, aldaer beneven die gemeynt van Gemert, metter eenre syden ende metten eenen eynde, metter andere syen beneven Goessen Goessens kynder erve ende metten andere eynde op Aert Stewichs kynder erve, eest als sy seden, Voert hebben die vercoeper ende die vercoeperssen met hoeren mombers vrsz helmelyck berteghen op dese ghedeelten voerscreven ende voert op allen rechten hoer ende Ghertruyden vrsz daer in thoebehoerende tot behoef Jans vrsz, mede geloevende als principael schulder ende schuderssen, d'opdragen, d'overgheven

(f66)

sulre te Gemert, metter gheboeder maeten ende dat huys van Gemert sal Diercken vrsz dit erve weren erffelycken, als voer die twentich loepen haveren. Alle argelist altoes vuytghesheyden. In oirconde der waerheyt soe hebben wy scepen voerscreven onsen zegel ons gemeyns scepenstoels van Gemert aen desen brief ghehangen ende ghegeven inden jaer ons heeren duysent vierhondert ende seshien op sunte Peters dach ad vincula.

Commenduer heer Matteliaen van Eynatten ghecoeft huijs ende hoff op die Aa ghelegen.

(afschrift van AKDOG inv nr 653, regest 396, dd 25-6-1483)

Wy Jan Voederarts, Joost die Smet, Ansem Boenenberch, Eymbrecht Michelssn, Henrick Wolff, Henrick Janssoen ende Geret Roelofssn scepen in Gemert doen condt een ijegelycken dat voer ons commen syn, Wynric soen Jan Goessens, Heylwich ende Katelyn ghesusteren met horen gecoren momber, die haer ghegeven was van den heer, met vonnisse der scepenen als gewoonlyck is, wittighe kynder Jan Goessens voerscreven, die hy ghewonnen ende vercregen hadde by wylner Lysbetten synder wittiger huysvrouwe, dat een natuerlycke dochter was wylner Ansem Heynenssn, mede gheloevende die vrsz voer Gertruyt hoen suster ende hebben ghesamender handt erffelycken opghedragen ende overgegeven Jannen Goessenssn honnen wittighen vader alle alsulcke ghedeelte, als hoer aen verstorven maech syn, of in scepene brieven hoer gemaect mach wesen, van eenen huijs ende hoff daer aen ghelegen in Gemert ter stede gheheyten op die Aa, aldaer beneven die gemeynt van Gemert, metter eenre syden ende metten eenen eynde, metter andere syen beneven Goessen Goessens kynder erve ende metten andere eynde op Aert Stewichs kynder erve, eest als sy seden, Voert hebben die vercoeper ende die vercoeperssen met hoeren mombers vrsz helmelyck berteghen op dese ghedeelten voerscreven ende voert op allen rechten hoer ende Ghertruyden vrsz daer in thoebehoerende tot behoef Jans vrsz, mede geloevende als principael schulder ende schuderssen, d'opdragen, d'overgheven

(f66v)

ende t vertyen vrsz ewelyck vast ende stedich te houden, sonder enich wederseggen ende coemmer van hoenen ende Gertruyden hoerder suster weghe. Inden voersz huys ende hoff wesende Jannen voersz altemael aff te doen op hen ende op allen hon goet, hebbende off vercrygende, sonder argelist bezegelt metten gemeynen zegel ons scependomps voerscreven ende ghegeven inden jaer ons heeren duysent vierhondert tachtentich ende drie, den vyfentwentigsten dach in junio der maent.

Eenen transfixe brief

(afschrift van AKDOG inv nr 653, regest 397, dd 26-6-1483)

Wy Jan Voederarts, Joest die Smet, Ansem Boenenberch Eymbrecht Michielssoen, Henrick Wolf, Hanrick Janssoen ende Geret Roelofssoen scepen in Gemert doen condt eenen yegelycken dat voer ons commen is Jan Goessens ende heeft erfflyck opghedragen ende metten alden brieven overghegeven onsen Eerweerdigen heer, heer Jannen van Eynatten commendeur tot Gemert een huys, hofstadt ende hoff daer aen ghelegen inder heerlyckheyt van Gemert ter steden geheyten op die Aa aldaer beneven die ghemeynt van Gemert metten eenre syden ende metten eenen eynd metter anderen syen beneven wylnen Goessen Goessens kynder erff ende metten anderen eynde op Aert Stewichs kynder erff ist als sy seden. Voert heeft die vrsz vercoeper helmelyck verteghen opt vrsz huys, hofstadt ende hoff op allen scepenen brieven daer af mentie ende gewach aff makende ende voert op allen rechten hom daer in thoebehoerende tot behoeff des coepers voerscreven mede gheloevende doe voersz vercoeper den vrsz coeper als principael schulder d'opdragen, d'overgheven ende t vertyen vrsz ewelyck vast ende stedich te houden sonder enich wederseggen ende coemmer van synen ende Gertruyden synre nichten weghe int voerscreven huys, hofstadt ende hoff wesende den coeper voersz altemael aff te doen op hom ende op allen syn goet hebbende off vercrygende sonder argelist. Bezegelt metten gemeynen zegel ons scependomps voerscreven ende ghegeven inden jaer ons heeren duysent vierhondert tachtentich ende drie den sessentwentichsten dach in junio der maent.

(f67)

Jan die Guliker van den Hameleusel ghelegen byt Moelenbroeck

Copie

(origineel niet voorhanden, dd 9-10-1456)

Wy Everaet van Hanelt, Lambrecht Eymbrechtssoen, Peter Goessenssoen, Dierck Waltgertssoen, Jan Voederartssn, Henrick Wolff ende Dierck Aertssoen scepen in Gemert tueghen in desen openen brieve dat voer ons is commen Goijart van Erp wilner Goyartssoen ende heeft erffelyck vercoeft opghedragen ende overghegeven Jan natuerlyck soen wilner Jans van Loen anders gheheyten die Guliker eenen plack groesvelts ghelegen in die prochie van Gemert aldaer aen die Laren, streckende metten syden neven der heeren erve gheheyten dat Moelenbroeck ende neven Willem Heynesens kynder erve metten andere syden neven Goyens erve vanden Bleeck dat een eyndt neven Willem Wyntkens kynderen erve dat ander eyndt neven een waterlaet. Voert soe eeft Goyart voerscreven op desen voersz plack groesvelts vertegen tot behoef Jans vrsz, ende Goyart voersz heeft Jannen vrsz gheloeft desen voersz plack groesvelts te weren als men erve schuldich is te weren ende allen voercoemmer inden vrsz plack groesvelts wesende off sal doen algaeder. Geloevende Jan voerscreven dat opdraghen, overgeven ende vertyen ewelyck vast ende stedich te houden te ewighen daghs. Besegelt metten zegel ons gemeyns scephendoms van Gemert int jaer ons heeren duysent vierhondert vyftich ende ses, op ten negenden dach inden october.

(volgt een afschrift van AKDOG 1520, dd 3-2-1484. Ook van het origineel is een transcriptie)

Wy Jan Voederaerts, Joest die Smet, Ansem Boenenberch, Eimbrecht Michielssoen, Henric Wolff, Heynrick Janssn ende Gheret Roelofssn scepen in Gemert doen condit eenen yegelycken dat voer ons coemmen is Willem wittighen soen Jans van Loen die men heyt die Guliker ende heeft opgedraghen erffelycken ende overghegeven Jannen wittige soen wylner Symon sBrouwerssoen den austen een heelft van eenen eusel daer aff dat heel ghelegen is in Gemert ter steden gheheyten aen Hyllekens Vonder aldaer beneven Diercks erve van Driel metten eenre syen, metter andere syen beneven Roelofs Gerets erve metten eenen eyndt op Everarts erff

(f67v)

ende metten anderen eyndt een gemeyn waterlaet, eest als sy seden. Voert heeft die vercoeper voersz helmelyck verteghen opt voerscreven halfeusel ende voert op allen rechten hen daer in thoebehoerende tot behoef des coepers voersz mede gheloevende die voersz vercoeper den vrsz coeper als principael schulder d opdraghen, d overgheven ende verteyen vrsz ewelyck vast ende stedich te houden sonder enich wederseggen ende te weren als men erff schuldich is te weren, vrij ende loss voer alle die ghene die daer met recht op spreken mogen, op hem ende op allen syn goet hebbende off vercrygende sonder argelist. Besegelt metten gemeynen zegel ons scependomps voerscreven ende ghegeven int jaer ons heeren duysent vierhondert tachtentich ende vier, die derden dach in die sprockel die maent.

(volgt afschrift van AKDOG inv nr 1521, dd 3 juli 1499. Ook van het origineel is een transcriptie)

Wy Joest die Smet, Peter Arts, Marcelis die Haess, Jan van Hout, Art Mickart, Alart Wynboem, Jan Gerets Sscepen in Gemert tueghen in desen openen brieve, dat voer ons commen is Willem ende Hadewich met hoeren momber hoer ghegeven vanden heer, als dat ghewoenlyck is, ende hebben ghesamender handt die wittighe kynder Jans van Ryel als erfgenaemen Ermgarden wittighe huijsvrouw wylner Jannen Symontssoen ende hebben ghesamenderhant erfelycken opghedragen ende metten alden brieven overgegeven Jannen Symontssoen den jongsten, hon ghedeelt van eenen stuck eusels ghelegen in Gemert ter steden gheheyten aen dat Moelenbroeck off Hyllekens vonder aldaer dat heel beneven Diercx erff van Drijel metter eenre syen, metter andre syen beneven erffenis der kynder wijlner Roelof Geretssoen, metten eenen eynde op Jan Everaerts erf, metten anderen eynde op een ghemeyn waterlaet, welck erffenis vrsz den voierscreven vercoepers ende vercoeperssen aenghenomen ende verstorven is van der doet Ermgarden wittighe huysvrouw wylner Jannen Symons voerscreven den austen, voert soe hebben dese vercoepers voerscreven helmelyc vertegen op dit vrsz stuck eusels ende op allen rechten hen daer in thoebehoerende tot begoef des coepers voersz als principael schulders dat d opdraghen, dat overgheven, dat vertyen ewelyck

(f68)

vast ende stedich te houden, sonder enich wederseggen ende coemmer van honent wegen aff te doen elckelycken tot synen gedeelt op hon ende op allen hon goet, hebbende of vercrygende, sonder argelyst. Besegelt metten gemeynen zegel ons scependomps van Gemert Int haer ons heeren duysent vierhondert tnegentich ende negen den derden dach in julio.

Item myn heer saliger heer Henrick van Eynatten hadde lange ghedingt tegen die van Arle aengaende verloepende pachten van der hoeven tot Aerle van den xvij mud roggen tsjaers die verloepen waeren. Soe goude Peter Daems van den selven xvij mud rogge voerscreven tsjaers x vaet roggen vuyt eenen ecker aenden Valckendick ghelegen, die hy ghebruijckt heeft ende van after stellen pachten geloeft heeft een jaerlycke rent van eenen gl ende eenen halven gulden tsjaers.

Copie van den principael brief

(Afschrift van AKDOG inv nr 802, dd 20-12-1543; in de inventaris staat als jaar 1545)

Wy Claes Anthonissn, Dierck Moels, Lambrecht vander Cruyscoet, Wyllem Stayeckers, Marcelis Coelen, Dierck Thoemaessn van Zon ende Henrick van Royecker scepen in Aerle doen condt eenen yegelycken dat voer ons coemmen is Peter Daems ende heeft erffelycken overgegeven ende opgedragen heer Jasperen Moers priester tot behoef des goedthuys van gemert onderhalven Carolus gulden stuck tot twentich stv alle jaer op onser liever vrouwen lichtmisdach te vergelden ende te betaelen ende den iersten taelpacht tot lichtmisse anno ses ende vertich van ende vuyt huijs, hoff, schuer, meeten camp daer aen ende by gelegen in die prochie van Aerle int dorp, deen syde ende deen eynde beneven erffenis der erffgenaemen Ansems van der Asdonck, dander syde ende dander eynde beneven die gemeyn straet met meer anderen, als hy sede, ende Peter heeft opten voerscreven rente van anderhalven gulden helmelinghe vertegen tot behoef des goethuys voerscreven, beloovende d opdraghen, d overgheven ende het vertyen den voerscreven ewelyck vast ende stedich te

(f68v)

hauwene sonder wederseggen ende donderpanden voerscreven voer die betaelinghe die vrsz aanderhalven gulden altyt goet genoch ende wael doegende te maeken op hem ende op allen syn gueden hebbende ende vercrijgende ende al sonder argelist. Bezegelt met onsen gemeynen scependomps zegel van Aerle ghegeven int jaer ons heeren duysent vyfhondert ende vertich ende drie den twentichsten dach decembris.

Drie doersteken brieven

(eerst afschrift van AKDOG 792, regest 419 dd 20-12-1488)

Wy Joest die Smet, Ansem Boenenberch, Eymbrecht Michiels, Peter Artssoen, Marcelis tshasen, Aert Ghevarts ende Ansem Zeelensoen scepen in Gemert doen condt eenen ijegelycken dat voer ons commen is Jan Michielssoen ende heeft erfelycken opghedragen ende metten alden brieven overghegeven Henrick Lauwrenssn dochter van den Wolfspuit een malder roggen erfspachts der maeten van Gemert datmen den voersz Jannen erfelyck schuldich was te vergelden ende jaerlycx te betaelen op purificatio van ende vuyt drien erff malder roggen pachts. Welck drie malder voersz Everaet van Strybosch erfelyck gheloeft heeft te vergelden van ende vuyt synnen erffenisse op Strybosch ghelegen ende die vrsz vercoeper voermaels vercreghen heeft teghen Marten die Smet ende soe aen verstorven vander doot syns vaeders Michielen Smets, ende die die voerscreven Michiel voermaels vercreghen hadde in eenen erfcoop tegen wylnen Jan Berch, ende Sloeff Dierkssoen wylnen Dierkssoen van Strybosch, ghelyck in die alde coopbrieve begrepen is. Voert heeft die vercoeper voerscreven helmelyck verteghen opt vrsz malder roggen op ten alden coepbrieff vrsz ende voert op allen rechten soe daer in thoebehoerende tot behoeff der coepersschen vrsz mede gheloevende die voersz vercoeper der voersz coepersschen als principael schulder d opdraegen, d overgegeven ende t vertyen voerscreven ewelyck vast ende stedich te houden sonder ennich wederseggen ende coemmer van synnen wegen af te doen op hem ende op allen syn goet hebbende off vercrygende, Sonder argelist. Bezegelt metten ghemeynen zegel ons scependoms vrsz ende ghegeven int jaer ons heeren duysent vierhondert tachtentich ende acht, den twe en twentichsten dach in december der maent.

(f69)

Den anderen brieff

(afschrift AKDOG inv nr 792, regist 400, dd 26-2-1485)

Wy Jan Voederats, Joest die Smet, Ansem Boenberch, Eymbrecht Michielssoen, Heynrick Wolff, Heynrick Janssn ende Gheret Roeloffssoen scepen in Gemert doen condt eenen yegelycken dat voer ons commen is Merten wittighen soen wylnen Michiel Smeets ende heeft erfelycken opghedragen ende overgegeven metten alden brieven Jannen Michielssoen een malder roggen erfspachts der maeten van Gemert van ebde vuyt drie malderen roggen erfspachts der selver maeten voerscreven, welck malder vrsz den voersz vercoeper aengecommen ende verstorven is van wylnen Michielen Smets synen vader voerscreven ende die voersz Michiel voermaels vercreghen hadde in eenen erfcoep teghen wylnen Jan Berch ende Sloeven Dierckssn, wylnen Dierckssoen van Strybosch gelyck in scepene brieven van Gemert daer voer opgemaekt volcoemmelyck begrepen is. Voert heeft die voerscreven vercoeper helmelyck vertegen opt voersz malder roggen op den alden coepbrieff vrsz als tot den vrsz malder roggen thoe, ende voert op allen rechten hoem ende synder moeder daer in thoebehoerende tot behoef des coepers vrsz mede gheloevende die voers vercoeper den vrsz coeper als principael schulder, d obdragen, d overgegeven ende t vertyen voerscrevben ewelyck vast ende stedich te houden sonder enich wederseggen ende coemmer van synen ende synder moeder wegghen voerscreven den coeper vrsz aff te doen int voerscreven malder roggen erfspachts wesende off coemmende op hoem ende op allen syn goet hebbende off vercrygende. Sonder argelist. Bezegelt metten gemeynen zegel ons scependomps vrsz ende ghegeven int jaer ons heeren duijsent vierhondert tachtentich ende vyf, den sesentwenticsten dach in sprockel der maent.

Den derden brieff

Eynatten

(afschrift AKDOG inv nr792)

Wy Thomas Peterssoen, Jan vanden Nouwenhuys, Rutgher Wouterssn, Aert Maes Artssn, Willem van Zelant,

(f69v)

Willem van Hout, Goyart Jan Moyensoen scepen in Gemert tueghen in desen openen brieve dat voer ons commen is Thomas Roeffs Connickssn als wittich man ende momber Katherinen synder huysvrouwen, dat was een wittighe dochter Jan Michiels ende heeft wittelyck ende erffelycken vercoeft, opghedragen ende overghegeven heer Henricken van Eynatten ridder ende commenduer des huys van Gemert Duyts Ordens van onser liever vrouwen van Jherusalem twe scepen brieven van gemert mentie makende van eenen erff malder rogge, welck malder erffroggen ghesproeten is van drie erffmalder roggen gelyck Marten Michiels Smeetssoen opghedragen hadde ende metten alden brieven overghegeven Jannen Michielssoen ende die voersz Jan Michielssoen voert opghedragen hadde Hanrick Lauwrenssoen dochter vander Wolfspuit, van ende vuyt drie malder roggen. welke drie malder erfroggen vrsz Everaet van Strybosch erffelycken gheloeft hadde te vergelden van en vuyt synen erffnisse op Strybosch ghelegen gelyck inden alden coepbrieven daer aff gemaect volcoemelyck begrepen is, daer dese teghewordige doer gesteken is. eest als sy seden. Voert alsoe heeft Thomas vercoeper voersz helmelinghe vertegen op dit erff malder roggen pachts voerscreven ende op die alde brieven vrsz ende op alle letteren ende rechten hem daer inne thoebehoerende tot behoef heer Hanricks commenduer voerscreven ende des huys van gemert voerscreven. Geloevende voert Thomas vercoeper vrsz als schulder principael op hem ende op allen syn goet nu ter tyt hebbende off naemaels vercrigende dit vercoepen, d obdraghen, d overgeven ende t vertyen vrsz ewelyck vast ende stedich te houden ende alle commer ende clangie van des vercoepers wegghen in dit malder erffroggen coemmende of wesende altemael aff sal doen sonder argelist. Besegelt met onsen ghemeynen zegel ons scependomps vrsz. Ghgeven int jaer ons heeren duysent vijfhondert een ende vertich op ten negen en twintichsten dach novembris der maent.

(f70)

(afschrift van AKDOG 679, regest 151, dd 14-2-1409)

Wy Korstiaen vanden Mortel, Dierck vanden Bleeke, Ansem Goessenssn, Gerit Fyen soen, Wijnric Geretssn, Henrick Queden ende Johan Karrel scepen in Gemert tueghen in desen openen brieve dat voer ons is commen heer Joest van Middelborch priester, bewaere des huijs van Gemert tot diere tyt, heeft vuytgegeven ende erfelyck verpacht met rade syns overste heer Reyners van Husen lantcommenduer vanden Byessen ende met raede der bruederen des huys van Gemert eenen goeden zekeren man Johan Henrick Corstyenen soens soen was, een deels der hoeven te Scherpenberch, dat is te weten huys ende hoff met eenen campe erfs heyt die Neijlant, welck erve vrsz ghelegen is aen Boecout metten eenre syden lancx neven des heeren straet dander syde vanden selven erve ende metten eenen eijnde neven Melis Maessoens erve, dander eynde is ghelegen beneven den huijsecker des ordens erve vrsz thoebehoerende den goede ten Broeck, Item dae toe twe stucken landts, die ghelegen syn op die Boeckensecker dat een metten eenre syden neven Johans erve vander Sandtvoert, dander syde is ghelegen beneven erffenisse ghehoert totter hoeven ter Eycken, deen eynde aen Smets erve, dander eynde aen des heeren straet, dat ander stuck lants is ghelegen metter eender syden neven Jans erve vander Zantvoert voersz, ende voert neven Aert Eyckmans kynder erve, ende neven erve heyt Mussenberch, deen eynde aen dese voerscreven straete, dander eynde aent goet tot Haselbosch, Item noch een stuck lants ghelegen metten eenen eynde aen die Mortelsche straet, ende aenen dat goet tot Haselbosch voerscreven, gelyck als alle dese vrsz erffenissen ghelegen is bijnnen haeren paelsteeden ende met alle hoere thoebehoerten, ende metten rechten die dit vrsz goet heeft dat is te weten dat Johan voersz of syn naecoemelingen den heymaet hebben sullen gelyck den anderen laeten, heyde ende weyde te meijen op des ordens Alde Harde, Haenrevelt of waert ghelegen is bijnen den paelen van Gemert, tot behoef des voerscreven erffs dat daer mede missen ende te bruijcken ende niet voerder, ende voerscreven beesten daer Johan off syn

(f70v)

naecomelingen dat voersz erve met bedrijft ende myst te maeken, ende op die vrsz goede helt te Scherpenberch, die sullen des ordens ghemeynt te Gemert heyde ende weyde bruycken ende besinghen, ende daer op weyden, gelyck den anderen laeten beesten, ende daer niet af te gelden vander ghemeynt hueren, ende off Jan voerscreven off syn naecomelinghe andere erve off have hebben bynnen den voerscreven dorpe daer aff sal hy doen, ghelyck den anderen ghebueren, ende Johan off syn naecomelinghe voerscreven sullen allen ghebuerlycke rechten houden ende doen, ghelyck den anderen ghebueren op dat voerscreven goet te Scherpenberch, ende der kercken van Baekel haer rechten te blijven ende vuyt dese voerghenoemde goede heeft Johan vrsz gheloeft voer hem ende voer syn naecomelinghe heer Joesten voersz tot behoeff des huijs van Gemert soeven mud roggen tsaers erffelycken te gelden, ende te betaelen jaerlycx altoes op onser liever vrouwen dach purificatio, ende te leveren op ten huijse van gemert op ten solder metter gheboeder maeten van Gemert, Ende Johan vrsz heeft den orden ende den huysse van gemert dit voersz goet veronderpandt met twe mudden roggen ende vier vate, dat is te weten een en twentich vate roggen erffelycken die Johan geldende heeft van Dierck Pluchaes zoens kynderen, vuyt eenen goede aen gheen Hoge IJnde ghelegen by Middelschote, ende vuyt eenen stuck landts heyt die Rulle, ende voert soeven vate erffroggen in eenen plack beempts ghelegen int Goerswinckel tusschen erffenisse Johan Karrilis ende Jans vander Zantvoert ende in eenen plack beempts ghelegen after Middelschote tusschen des ordens erve voersz metten eenen eynde aen Johan Loyen neefs erve ende desen voerscreven onderpanden heeft Johan vrsz den orden gheloeft te weren als men onderpanden schuldich is te weren, ende alle voercommer daer aen aff te doen vuytghescheyden des heeren chyns vanden gronde, ende daer thoe goet ende wael doegende te maken op hem ende op syn goet ende op desen voergenoemden onderpanden, daer hebben op vertegen met eenen halm, met hande ende met monde, tot behoeff des huys van Gemert Wynrick Hanrick Gerets, Jans brueder voerscreven ende Jacop syn swaeger ende Korstine, Kathelyne, Geertruyt

(f71)

ende Agnesen syn susteren met haeren momber, die hoer met vonnis ende met recht ghegeven wart, ende aen dese voerscreven onderpanden, daer Johan vrsz dat voersz goet te Scherpenberch mede veronderpandt heeft, daer en heeft der orden egheen recht aen, voer ander tyt, dat hon dit voerscreven goet te Scherpenberch metten onderpanden op queem als voer den pacht, off dat den orden saer metten recht aen queem, Alle argelist off nijevonden altoes vuyt ghescheyden, In orconde der waerheyt soe hebben wy scepen voerscreven onsen zegel ons gemeyns scependomps van gemert aen desen brief ghehangen ende ghegeven inden jaer ons heeren duysent vierhondert ende neghen verthien daghe in februario.

Henrick Dierck Cremers, nu Jan Aerts syn swager gilt vutten erve daer hy in woent tsjaers xvj vt rogge

Copia Copie van den erffbrief

(afschrift van AKDOG inv nr 693, regest 181, dd 23-10-1417)

Wy Deryck vanden Bleeck, Ansem Gossens zoen, Wijnrick Gerits zoen, Bernijre Willems zoen, melis Melis zoen, Henrick Queden ende Johan Karle, scepen in Gemert tuijgen in desen opene brieve dat voer ons is commen heer Johan Clot commenduer tot Gemert in dier tyt ende heeft mit raede zyns overste des eerwerdighen heer Ywaen van Cortenbach lantcommenduer inder Balleyen vanden Biessen ende heere tot Gemert vuytgegeven ende erffelyck verpacht Lambrech Derycx natuerlycke zoen was van Grootel, huys ende hoff dat Hadegen Willekens was, ende Johan Wolfs was haers neffen, dat ghelegen is aen die Beck met einder syden beneven Johan Schnyders kynder erff, dander syde beneven Willem Heynen zoens erff, ende Johans erve van Bonne metten eenen eynde aen des heeren straet, dander eynde an de steghe neven dat Goerswinckel, ende vuijt desen vrsz huys ende hoff ende erve mit allen synen theobehoerten heft Lambrecht voersz den voergen commenduer gheloeft seshien vaet roggem erffelyck te gelden in orber ende tot behoeff des huys van Gemert, die sal Lambrecht

(f71v)

voersz jaerlycx gelden ende betalen den huysse van Gemert ende schuldich syn te leveren op hueren coeren sulder metter geboeder maeten van Gemert, ende dat huijs van Gemert sal Lambrecht dit voersz erve weren voer die seshien vat erfrogen. Alle argelist altoes vuytghescheyden. In orkonde der waerheyt soe hebben wij schepen coersz onsen segel ons gemeyns scepenstoels van Gemert aen desen brief ghehangen ende gegeven inden jaer ons heeren duysent vierhondert ende seventhien op sunte Severynsdagh.

(f72 t/m f74 betreft leengoederen van de Commanderie Gemert. De transcriptie ervan in een afzonderlijk bestand)

(f74v)

Die ses hoeven vier binnen Gemert ende twe tot Baekel te weten Grootel ende Esp metten thienden die sy daer bij hebben ghepacht te weten Baekel, Milheze ende die thiende van Doeren beloepen tsaemen in rog pacht dat mynnen heer alleen aengaet beloept tsaemen in rog ij c lxx mud, vi vt roggen Peelschen maeten.

Die ses voerscreven te weten Haendelt, Voegelsanck, Meelschoot, Nouwenhuijs, Groetel ende Esp beloepen tsaemen in haver xxxxi mud haveren

Item die ses hoeven voerscreven beloepen tsaemen in boeckwyt xvi mud boeckwyts

Item die ses hoeven voerscreven beloepen tsaemen in raepsaet xvij vt ende ses nyer sacken

Die ses hoeven voerscreven beloepen tsaemen in gasten xviiiij mud garsten

Item die ses hoeven voerscreven beloepen tsjaers in lynen laeken tsjaers vlessens laekens lxxij ellen

Item die ses hoeven voerscreven beloepen tsaemen in boteren tsjaers i c xxxiiiij pont boteren

Item die ses hoeven voerscreven beloepen tsjaers in pinxt hoender lij hoender

Item die ses hoeven voerscreven beloepen tsjaers in eyeren vijf hondert ende xc

Item die ses hoeven voerscreven beloepen tsjaers in torff in te vueren van myns heeren torff xxxviiij voeder

Item die ses hoeven voersz vanden heelen beesten ende vanden handtgelt ende vander smaelder thienden Baekel, Milheze, ende Doeren ende drie hoernsgulden voer drie steen vlas van Esp mynnen heer alleen aengaende beloept tsamen in gelde ij c xxx gl ende xj st.

(f75)

Die vuytgegeven hoeven te weten tgoet ter Watermoelen, Gruenendael, die twe Haselbosschen, metten goet dat Heyntghen van Wert vuytgegeven van den orden, tgoet ten Broeck, tgoet ter IJken, tgoet ter IJnden ende dat goet tot Arle buijten Gemert

Tgoet ter Watermoelen ghilt tsjaers in rogpacht viij mud

Tgoet ten Gruenendael gilt tsjaers in rogpacht iiiij mud ende iiiij vat roggen

Die twe hoeven te Haselbosch gelegen aenden Mortel metten goede dat die heeren Heynrick van Wert vuyt hebben gegeven gilt tsjaers in rogpacht vij mud roggen

Tgoet ten Broeck gilt tsjaers in rogpacht xi mud roggen

Tgoet ter IJken gilt tsjaers in rogpacht v mud roggen

Tgoet ter Ynden is vuytgegeven vanden orden tsjaers voer vij mud roggen

Nu isser by gescreven dat compt van Jacop Goessens wegen iij vt roggen, ende ij vt compt van Lysbeth Ansems wegen ende een mud roggen, dat welck betaelt Roeloff Verhofstadt, tsamen viij mud ende iiiij vt roggen

Tgoet tot Aerle gilt tsjaers xvij mud roggen

Summa het goet ter Watermoelen, tgoet te Gruenendael die twe Haselbosschen ende Heyntghen van Weert goet, tgoet ten Broeck, tgoet ter IJken, tgoet ter IJnden, tgoet tot Aerle beloepen tsaemen in rogpacht aengaende mynnen heer lxij mud ende ij vt roggen

Item dese voergenoemde hoeven te weten beloepen tsjaers in raepsaet xxiiij vt raepsaets

ende twe sacken welcke twe sacken betaelen tgoet ter Ynden ende tgoet ten broeck

Ende vi vt raepsaets van Ploesterdonck tsamen metten vuytgegeven hoeven xxx vt raepsaets, maer Ploesterdonck en geeft genen sack.

(f75v)

Item dese voergenoemden hoeven gelden tsjaers in boteren lxxxiiij pont boteren

Item dese voergenoemden hoeven gelden in vlessen lynen laeken alle jaer lxxxiiij ellen lynen vlessens lakens

Item dese voergenoemden hoeven gelden tsjaers in boeter lxxxiiij pont boeteren

Item dese voergenoemden hoeven gelden tsjaers in jonge hoenderen te weten pinxt hoenderen lvi jonge hoendere

Item dese voergenoemden hoeven beloeven tsjaers in eijeren vii c

Item dese voergenoemden hoeven beloeven tsjaers in torff in te vueren van myns heeren torff lvi voeder

Item die hoeve ter Ynden, die hoeven tot Haselbosch, , die hoeve ter Yken beloeven tsjaers in haver xvi mud haveren

Die jaerpachten binnen Gemert beloeven tsjaers mynnen heer lxx mud ende ii vt roggen

Buyten jaerpachten

Inden iersten Mierloe iii mud rogge

Baekel, die Cruyset iii mud ende ii vt roggen

Die kynderen ver Asdonck cum suis woenende op Groetel onder Baekel ghelegen tsjaers ii mud rogge

Tgoet ter Vesten gelegen onder Bakel, ..weten Noyen Corstgens, nu syn erfgen. Hilleken van Amstel gelden tsjaers x vt rog

Die cleyne Hylecker ghelegen onder Baekel, Jan Heynen behoert dat goet toe, ende woent opt selve goet gilt tsjaers iiiii mud rogge

Jan die Sluytter, nu Luytghen syn huysvrou, woenende tot Doeren, mer dat goet leet tot Baekel bewoent nu Jan Otten, gilt tsjaers viii vt rogge

Dries Geffen, woenende te baekel gilt tsjaers viiii vt roggen, ende daer is eenen scepen brieff aff.

(f76)

Donckerfoort gelegen onder Beeck gilt tsjaers ii mud rogge

die erfgenaemen Jan die Cuijper, ende Jan die leeft noch, mer Jan hevet synder suster overgegeven, ende die betaelt die pachten.

Boekel gilt tsjaers iii Bosch malder roggen, gelden dese persoenen.

Geret Jacobs off Geret int Olyvenne gilt een Bosch mud ende i Bosch vaet roggen

Symon die Snyder alias van Erp gilt tsjaers vii Bosch vt roggen

Somma soe belopen die buijten jaerpachten te weten Mierlo, Baekel, Donckerfoort tsamen xvi mud ende v vt roggen

Two thienghens gelegen binnen Gemert, inder iersten die thiende int Goerswinckel ende dat Laer, pechter Johannes Henrici, gilt tsjaers xv mud roggen

Item noch tsjaers tot handtgelt xxxix st.

Die thienden aen die Heij, pechters Dierck van Gemert ende Aelken van gemert syn geswye gilt tsjaers xviiiij mud roggen

ende tot handtgelt alle jaer xxxvii st.

Item die erfgenamen Jans van Nouwenhuys gelden tsjaers iij mud roggen

ende tot handgelt v st.

Summa dese twe thientghens in rog xxxvi mud roggen

met Jans van Nouwenhuys hoeve

Summa in handtgelt iii gl xix st.

(f76v)

Item noch cleyn buyten thiengens

Baekel

Item Jan Reyners tot Baekel heeft een cleyn thienghen op Scepstal voer iij mud rogge

Peter Willem Hoefnaegels soen custer tot Baekel heeft gepacht een cleyn thiengen ooc op Scepstal tsjaers voer iii mud roggen

Item vuyt de thienden van Vlierden boert myn heer tsjaers xvij vaet roggen, ende heyt die thiende van Floderacken, pechter Lemmen Rutten woenende tot Helmont, ende Goert Snabben woenende onder Doeren ende Vlierden leet ooc onder Doeren.

Item noch vuytter yhienden van Vlierden gelegen onder Doeren boert myn heer tsjaers ooc xvij vt rogge ende heyt oock die thiende van Floderacken, pechters vander thienden Enx Jan Jegerssoen myns heeren laet woenende tot Gemert, ende Enx Jegers swaeger woenende by Helmont, ende dit thienghen behoeret Herman van Deventer

Somma viii mud ende iii vt roggen

Item het een jaer meer, het ander jaer min dorsset men vuytter schueren vander schyven, die myn heer in doet vueren vijftich mud roggen wael.

Item die moelens gelden tsjaers lxiiii mud roggen, ende ses gulden voer cruijt

Item dat jaergelt beloept tsjaers ontrent xiii gl

Item die smaelthienden gelden tsjaers xx gl

pechters Arnoldus Andreen, Enx Jegers ende Johannes Henrici, des syn myns heeren yhienden vrije ende syn hoeven.

(f77)

Dit is copie van eenen Bosch brief aengaende eenen erfmalder roggen dat Thoens van Asten over vyftich jaeren ende meer den orden gegouwen heeft. secundum vera registra vide sup fol.

Notum sit universis , quod cum Anthonius filius quondam Johannis de Asten, relictus legitimus Catharinae suae uxoris filiae quondam Theodorici die Cuijper fructi.. sibi competent.. in domo, area, orto ac hereditatibus sibi coadjacentes pariter dicte lopinate terre et tres pastus dicte scharen vel circiter continu... sitae in parochia de Gemert en loco dicto die Deelstraet inter hereditatem Jacobi dicti die Jeger ex uno latere, et inter hereditatem Petri dicti vanden Berge et pluribus alieribus, ex alio latere legiyime supportassit Mechteldi filiae Anthonii et quondam Catherinae predictorum prout in literis scabinorum de Buscoducis super hoc confectis pleni.. continetur Constituta igitur coram scabinis infrascriptis dicta Mechtildis cum suo tutore ad hoc ab ea electo, et ei a iudice rite data legitime et hereditarie vendidit Marcelis filio quondam Henrici Geretssoen annu... et hereditarium censum trium flor.. renen... rynsgl communiter vocatorum viginti den. stuivers communiter vocatum. vel valorum eorundem in pecunia quemadmodum iam valuata est. Pro quolibet hon.. flor.. computa... solven... anno quolibet hereditarie in festo nativitatis domini, de et ex dictis domo, area, horto, hereditariis sibi coadjacentes pariter decem lopinatas et tres pastus dicti scharen continente.. predict.. ut dicebat ab eodem emptore jure hereditario haben... et possiden... dictumque censum dicta venditrix prefato ab eodem emptore supportavit et effestinan... resignavit modo in talibus consueto, promittens dicta Mechtildis et cum ea dictus Anthonius eius pater ut debitores principales indivisi super se et bona sua ab eis ad primus habita ac in poster,, ab eis haben... et acquirere... quod ipsi dicto emptore de dicto censu debitam ac iustam prestabunt warandam, et quod ipsi oe.. alias obligationem et impetitionem in dictis contra piguoribus exiatentes eidem emptori deponet.. omnis

(f77v)

excepto censu fundi domino commendatori in Gemert ad unum brasdenarium et unum pullum consuale asceden... hereditaria pactione, unius maldri siliginis dicto domino commendatori in Gemert hereditaria pactione duorum maldrorum siliginis Petro dicto Willemsen hereditaria pactione unius et dimedii vasorum siliginis personatii ecclesiae de Gemert prius ex promissis e iure solven... atque quod ipsi dicta contra piguora pro solutione dicti census perfato emptori annuatim exinde et permittitur solven.. sufficien... beneq.. valen.. semper efficiet et satissecura. Testes interfuerunt scabini in Buscoducis Joannes Monix et Fransiscus Toelinx datum vicis... nona die mensis decembris onno domini millesi.. quingentesimo vicesuno(?). Kuijsten

In die Haeghe Dierck Verrennen van twe mud roggen Copie vuyt synen brief gescreven van woert te woert

Wy Joest die Smet, Jan van Hout, Jacop van Hügevoert, Eymbrecht Michiels, Aert Mickarts, Gerit Roelloefs, Jan Geretssoen scepen in Gemert tügen in desen opene brieve dat voer ons coemmen is Aert Hanrickssoen van Tuynen wylnen als man ende momber Koenen synder wittigher huysvrouwen ende heeft opgedragen ende overghegeven Jannen vander Moelen ende Jenneken synder wittigher suster, beyde wittigher kynder Jannis vander Moelen rentmeester des commenduers van Gemert een huys ende schuer ende meer ander huysinghen daer op staende ende metten camp daer aen ghelegen aldaer in die Haeghe tusschen erffenis der weduen Jan van Steyn ende hoeren kynderen met meer anderen aen die een syde, ende die ghemeyn straet aen dander syde, dat een eynd op Ruijsche, dat ander eynd op die straete, Item een stuck erfs met eenen huys aldaer ghelegen in die Haeghe tusschen erffenis Jordan Woutersen ende Hanrick van Tuijnen aen deen syde, ende erffenis der heeren van Gemert aen dander syde ende metten eenen eynde, dat ander eynde op die gemeyn straet, eest

(f78)

als sy seeden, Welcke erffenissen voerscreven Aerden voersz aencoemen ende vercregen heeft in eenen vonnis brieff vanden heeren van Gemert. Voert soe heeft Aert voersz helmelinghe vertegen op dese erffenisse vrsz ende op allen rechten hem daer in thoebehoerende tot behoeff Jans ende synder suster voerscreven, Geloevende noch Aert vrsz Jannen ende synder suster voerscreven als principael schulder dat d opdragen, dat overgeven, dat vertyen voersz ewelyck vast ende stedich te houden sonder ennich wederseggen ende te weren als men erff schuldich is te weren voer allen de ghene die daer met recht op spreken moegen, vuytgenoemen twe mud roggen jaerlycx pachts te vergelden vuyt eenen stuck erffs dat ghelegen is beneven Jordan Wouters ende Hanrick van Tuijnen erfs, ende den chyns vanden gronde te weten vyff pennick auts ende eenen pennick pajments ende een chyns hoen, welcken chyns voersz jaerlycx gaende is vuyt den erffenis ghelegen beneven erfenisse der wedue Jan van Steyn ende gheheyten is den Brugman, ende voert alle voercoemmer inden voergenoemden erfenissen van synder weysen daer in commende altemael aff sal doen den coeper voersz, vuytgenoemen den commer voerscreven, Sonder argelist op hem ende op allen syn goet hebbende off vercrygende, Bezegelt metten gemeynen zegel ons scependomps van Gemert int jaer ons heeren duijsent vyfhondert ende drie, den xxxi dach van januario.

Opten brief die sy hebben steet gescreven boeven opten brief Jan van der Moelen.

(f78v)

Gelt pacht

Dit is den geltpacht die men gilt den huysen van Gemert op onser liever vrouwen dach purificatio, ende vuyt dit boeck anno duijsent iii c lxxvii voer sinte Lambrechts misse die ierste letter van betalinghe van den jaergelt de anno lxxviii is A gheweest.

Inden iersten Goyaert van Lancvelt vuyt huys ende hoff aen die Deelvoert ghelegen, doe wilnen Hanrick Puijsnis, daer nae die weduwe Goert van Lancvelt, daer nae die jongen Goert van Lancvelt, daer nae Syken van Lancvelt, nu Goert Goertssoen van Lancvelt xviii st ende drie deel van eenen st den gro.. voer xvi den. gerekent, ende iii hoenre, Item die selve Goert van Lancvelt ende is comen van Dierck Timmermans Hanrick Puyfnis erve voerscreven vi st ende i vierdeel st. i hoen, den gro.. voer xvi denm. gerekent tsamen xiiii st vel circiter.

Willem Jan Geretssn, daernaer Aert Ghoben, daernaer Jan van Cuyck, nu ter tyt Huijbrecht die Leydecker van Tricht ende Heylwich Geret Hoegers dochter gilt tsjaers vuyt huys ende hoff aen die dele, dat Jans Weelden was xxx st den gro.. voer xvi den. facit xvij st. j bl.

Willem die Jeger vuyt huys ende hoff aen die Deelvoert ghelegen, nu syn erfgenaemen, te weten Ansem Jan Gegerssoen xvi st den gro.. voer xvi den.

Item die selver vuyt huys ende hoff aen Deelvoert ghelegen dat Hanrick Sween was, daer nae Jan die Jeger xvi st den gro.. voer xvi den. tsamen xviii st

Ansem Jegers viiii st ende Wreyns van Waerle viiii st.

(f79)

Matheus Queens, Teuwen Denis, nu die erfgenaemen Teuwen Denis vuyt den Rietecker aen Deelvoert gelegen viij gro.. den gro ... voer xvi den. vj st, i blanck

Jan Queens vuytten Reytecker, Teuwen Denis kijnder, nu die erfgenaemen Teuwen Denis iiij gro.. den gro.. voer xvi den. iii st, j blanck

Anthonis Goerts van Lancvelt, daer nae die weduwe Goerts van Lancvelt, daer nae die kynderen Goerts kynderen van Lancvelt vuyt huys ende hoff gelegen op die Ruyps, dat Melis van der Eynden was xxv st den gro.. voer xvi den, xiiii st aut circiter

Peter die coster, daer nae Thomas Maessn tot Baekel, nu die weduwe, vuyt eenen ecker gelegen tot Baekel aen den Hoevel dat Willemen was Art Goijkenssoens xxv st pajments, xiiii st ende een half negemenneken

Alit Gertruyden dochter vuyt huys ende hoff gelegen aen die Vondervoert dat Hillen vander IJnden was, daer nae Jan Hanrickssoen ix gro.. den gro.. voer xvi den

Goert Dierck Roeffssoen daer nae ende nu ter tyt Anna syn huysvrou cuyt huys ende hoff aen die Vondervoert gelegen dat Alyten Gertruyden dochter van Beijeren was voer Hillen vander IJnden ix gro.. tsamen.

Gerit Jan Henricks ende Anna Jans dochter van Nouwenhuys xiiij st, elck vi st ende i blanck

Aert van den Hoerick vuyt huys ende hoff en lande gelegen aen die Vondervoert xx st den gro..

(f79v)

voer xvi den, daer nae Willem Jan Knoepssoen, nu Dierck Ansem Smetsen gelegen aen die Vondervoert neven erfensse Loyaen van Nuenen x st den gro.. voer xvi den, xvij st, v placken

Wyff Willem Fyen soens, daer nae Jan Cnoep, Jan Jan Aertssoen, nu ter tyt Vreyns Jan Cnoepssoen, vuyt hueren huys, hoff ende erve dat Blanckarts was, x st den gro.. voer xvi den, Aert Spruyts daer nae Jan Cnoep, alias Jan Jan Aertssen, nu Vreyns Jan Cnoepssen vuyt eene hove die ghelegen is heven Spruyts erve x st, den gro.. voer xvi den, betaelt tsamen Vreyns Cnoeps xi st, i oert

Waltger van den Eenswinckel, daer nae Ansem Marcelis Ansemssen, Jan Jan van den Eenswinckel soen vuyt eenen stuck lants ghelegen in den Aerle binnen Gemert aen den Mortel x st den gro.. xvi den, vjst, i negemenneke

Bernier Willemsen daer nae ende nu ter tyt die kinderen Noijen van den Goer vuyt eenen stuck lants op ten Grooten Ecker gelegen by syn huys dat Rutgers van den Mortel was, iii gro.. den gro.. xvi den, Gerit Fyen soen nu ter tyt Noyen kinderen van den Goer vuytten selven lande opten Groeten Ecker gelegen by Boecout, iii gro.. den gro.. voer xvi den tsamen iiiij st.

Jan van Hout, daer nae Jan van Schuyt, nu ter tyt Peter Janssoen van Schuyt, voer Willem Fyen soens kynder vuytten selven lande voerscreven ij gro.. den gro.. voer xvi den, tsamen j vuerijzeren

Jan Aertssoen van Schuyt van wegen Willem Fyen, nu ter tyt die erfgenaemen Jenneken van Schuyt vuytten selven lande voersz j vuerijzeren.

(f80)

Johan Fyen soen, nu ter tyt Jan Jan Voegelssoen vuytten selven lande iii gro.. voer xvi den, ii st, i oert

Ansem Jan Berchssoen, daer nae Emmis Michielssn, daer nae Lenart van den Bleeck, ende nu ter tyr Goert Lenarts, ende die jongen Jan Aertywaens, vuyt eenen stuck lants ghelegen aen den Mortel geheyten Scherpenberchs hoff, xii gro.. voer xvi den. facit ix st.

Jan Jacopssoen van Uden, voer Henrick Stevens, nu ter tyt die kynderen Jan Jacops van Henrick Stevens weegen, i boddreger ende iii pl.

Willem Engberchs soen, daer nae die weduwe, Aert Loyen, daer nae Jan Jacops van Uden, nu ter tyt Jacop Jan Jacopssoen van lande aen den Mortel gelegen dat Schuytters was ende vrou Heylwighen hoff ende lant vi gro.. den gro.. voer xvi den. maeckt iiiij st.

Lode Lodens Smollerssn, Jan Loyen, Jan Jacopssoen, nu ter tyt die weduwe Jan Loyken Loijen van den lande aen den Mortel dat Schuytters was, heyt vrou Heylwighe lant, vi gro.. den gro.. voer xvi den. iiiij st.

Tysken Belyen, Dierck Jan Mathyssoen, nu Agnees syn moeder vuyt eenen stuck lants gelegen aen den Hoevel neven Hannen Cnoeps erve, ende neven Loy van Nuenen erve, j pont payments facit ij boddreger is j.. braspennick of ii st. min een negemenneke.

Johan Peter Cnoeps, Lemmen Jan Peterssoen, nu ter tyt Cornelis Heyn Dircks, scripsit Willem Jegers, gelegen by den Hoevel neven Jannen Cnoeps erven ende Thysken Belien erve, modo neven Peter Coemans erve j pont payments, dat is ij boddreger.

(f80v)

Hanrick van Wel, Dierck die Cremer, ende Weltghen Emmen, Peter die Cremer, nu ter tyt Peter die Cremers erfgenamen vuyt eenen stuck lants gelegen in de Aerle neven Maes kynder erve van Haselbosch metten eenen eynde aen die Vlaes te betaelen opten heylegen Pinxdach i pont pajments maect drie boddregers te weten drie braspenninck.

Jan ende Willem Kaerle, vuyt hoeren erve heyt die Eldonck, dat Jan ende Willem erf-pachten teghen Dierck van Gemert ij anderhalven vrancken vorschon schilt, welcken ij schilt voersz Goedert van Gemert overghegeven heeft in scepenen brieven van Gemert. Op ten brief steet buijten gescreven ij schilt. Daer nae Aert Mickarts, Jan die Becker ende die Jans van der Moelen, nu die erfgenaemen Hanrick Mickarts, jaergelt van Aert Mickarts knd. beloept des tsjaers xxii st, ij oert.

Item die jaergelt is gedeelt, item Hanrick Aert Mickarts ghilt die helft van den xxii ende ij oert voersz.

Item die kynderen Dries van Wynboem gelden van den selven jaergelt iij st, vyf moerkens.

Item die kynderen Denis Matheussoen sc.. Aelken Mickarts iij st, vyf morkens

Item die kynderen Jacop Emons woenende te Milheze iij st, vyf morkens.

Item Luyt Aert Mickarts, nu die erfgenaemen te weten Aelken Mickarts haer suster iij st, i oert.

Item van den ij schilt voerscreven ghilt Jan van der Luet, nu ter tyt Roeloff Aellarts woenende in die Panthelaer vj st, i negemenneken.

(f81)

Jan van Gemert, vuyt erffenisse heyt den Waeterbempt ende was Diercks van Gemert eenen Brabantsche dobbel malloen, secundum litteras scabinales datum MCCCC ende drie, op vincula Petri, twe Hollantsche gulden, Desen chyns voersz heeft Goedert van Gemert ooc overghegeven den huysen van Gemert voersz. Op ten brief steet buyten Brabantsche dobbel malloen. Dan Jan Henrickssoen van den Nouwenhuys, nu ter tyt Luyt Jan Henricks dochter van Nouwenhuys, ende heeft Thoemas Cremers woenende in die Molenstraet voer die helft, ende May Jans van Nouwenhuys dochter ende heeft getrouwt Dierck Ansem Smetssoen woenende aen Boecout tsamen xlv st.

Spijrinck van Gemert vuyt synen huijse ende hoeve dat Kelkens was, xl schillingen, welck xl voersz Goedert van Gemert ooc overgegeven heeft cum litteris scabinalibus de Gemert den huysen van Gemert als voer erfrogge, die Goedert van Gemert voersz vuytter Haseldonck plach te gelden den huysen van Gemert voerscreven. Op ten brief steet xl schillingen Goessen Stewich die Heyllighe Geest van Gemert, Steenhuys ende nu ter tyt Jan Lenart Valckssoen, maeckt xxiii st.